


SHALOM

 Twasakidila, wa manza tente, Mwaneetu Isaacson. [Mwaneetu Isaacson ùdi ùbanga kwakula wàmba bwa muntu kampanda udi ne disaamà dya kansere. Katupa kàà mukaba wa mèyi munda mutupu—Muf.] . . Isaacson.

Mwoyi wenu awu mu dinda emu, balunda bàànyì, nudi mwa kusòmbelaayi panshi. Eyowa. Mbîmpè mutùdì baalukile lwà mu ndekeelu mwa cipeela emu. Nudi bamanye's, twètù. . . Ngeela meeji ne, musangu wa ndekeelu wûmvwà mwaba ewu, mvwa mwinyike mwaba ewu dîna ne, “mu ndekeelu mwa cipeela.” Mwômô amu ki mutùtù pa ciibidilu tu—tupeta Mukalenge, anyì mwàkapeeciibwàCi musangu kampanda pàvwà Mòsà wènda ùdîisha mikooko mu ndekeelu mwa cipeela.

Muntu udi apa ewu, mvwa mumumone, mu lumwenu lwa dimwena paanyima, kùkaadi katanci, pâmvwà ngenda ndwa apu. Mvwa muumvwe, dituku adi, bwa ne yêyè ùvwa mubwele mu lupitaadi. Mvwa mmusambidila, kadi nyêyè ewu musòmbe kaaba aka, mu dinda emu. [Muntu kampanda ùdi wàmba ne: “Ùdi ne mubidi tumatuma.”—Muf.] Ee, abi's mbilenga. Ndi ne disanka dyàbûngì. Ùvwa ne mashi alwa munda. Ne pa nanku, tudi ne disanka dyàbûngì bwa kumumona mulwe, mu dinda emu.

Bidi bintacisha bwa kuumvwa ne mwaneetu wa balume uvwa neetu ewu, musangu mushààle kaaba aka, ne ùdi ne disaamà dya kansere, mu lupitaadi. Tudi bamanye ne tudi ne mùsèèsù anu wumwepele wa dipatukila mu cyôci eci, mmùsèèsù wa lufu. Aci, twètù bônso bikèngela twèndelè mu kôkò kajila aku, nansha twètù biikàle bàdi batambe bwakane, batambe cijila bàà kutùdì, tudi twambulungana muntu ukashiya mukwèndè ku lwèndè lukita. Kadi nansha nanku Yesu wàkamba ne: “Ewu udi ungiitabuuja Mèmè kaadyakufwaku to.” Kadi cidi “lufu” mwaba awu, ki nciùdì twètù tubiikila ne ndufu aci to.

2 Byenze bu pààkaakulà Yesu ku lukita lwa Lazàrò, Yêyè wàkamba ne: “Mmulaale.”

Ki bôbò kwamba ne: “Ee, netwikalè mwa. . . Yêyè ùdi wènza anu bîmpè piikalàbi ne mmulaale.”

3 Dìbà adi Yesu kwamba, kukengelabi bwa kubambila mu ngaakwilù uvwabo bôbò bamanye awu, nwamonu's: “Mmufwe.” Yêyè ne: “Kadi bwenu nwènù, Ndi ne disanka bu Mûmvwà nciyipù to, kadi Nyààya kamubiisha.” Nwamonu anyì?

4 Nenku ki pòpò apu pààkambàYe dîyì dilenga menemene ditùtù twenza kwambulula mu Mifundu adi dya ne: “Ewu udi umvwa, ewu udi ungiitabuuja Mèmè, ùdi ne Mwoyi wa kashidi;

kaakupicila ku cilumbulwidi to, kadi ùkaadi muumuke ku lufu muye ku Mwoyi. Mémè ndi dibiika dya ku lufu ne Mwoyi. Ewu udi ungiitabuuja Mémè, nansha byôbì ne mmufwe, kadi neikalè ne mwoyi. Ne ewu yônsò udi ne mwoyi ne ungiitabuuja Mémè, kaadyakufwaku to.” Nwamonu anyi? Kàyi mwa kufwaku to! Kakwenaku . . . Mu bulelela kakwenaku lufu bwa mwena Kilisto to. Yéyè . . .

Lufu mbwena kwamba ne “ditapuluka dya Cyendèlèlè.”

⁵ Nénku mpindyewu byenze bu patùdì . . . tufwa apa, bu mùdì mu mubidi wa musunya bu mutùdì mpindyewu emu, tudi batapuluke muntu ne mukwèndè. Kadi, anu mubidi ewu ngùdì cintu cimwepele cìdì citumanyishisha muntu kùdì mukwèndè, bwalu tudi baswikiibwe mu byumvwilu bitaanu: lumono, lulabulu, lulengu, lununku, ne luumvu. Nénku bu mùdìbì anu ne tudi tumonangana anyi tulengangana muntu ne mukwèndè, mona’s, tudi ne cileejì cya ne tudi mwaba ewu. Nwèù biikàlè mpofo ne kanùyì mwa, ne—ne kanùyì mwa kumona to, dìbà adi nudi mwa kulengangana muntu ne mukwèndè, nénku tudi . . . anyi kuumvwangana muntu ne mukwèndè. Nénku byumvwilu bya pa buloba mbìdì bileejangana patooke eci ne eci.

⁶ Kadi, mu bulelela, bwa kwamba menemene, kacyakacya katùtukù banji kumonangana muntu ne mukwèndè to. Nukààvwakù bamanye nanku anyi? Kacyakacya katùtukù banji kumonangana muntu ne mukwèndè to. Nudi nuumvwa cintu kampana cyàkwila mu mubidi mwaba ewu ciikàlè cìdikija cyônsò cìdì munda aci. Nénku ki bwa cinyi, patùdì twakula muntu ne mukwèndè apu, mu bulelela kì mmubidi wutùdì—wutùdì twambila to. Nnyuma udi munda, kadi mubidi ncintu cìdì cìmanyisha nyuma udi munda awu. Nénku ki bwa cinyi, patùdì twakula muntu ne mukwèndè apu, tudi . . . tudi mwa kuumvwa anu ne lukasa lwônsò ní tudi beena Kilisto anyi to, bwalu kùdì bwobumwe mu nyuma kutùdì twakwila, nudi numona ne, cìdì cìtùtukila kùdì muntu ne mukwèndè, bwa ne, tudi beena Kilisto anyi to. Ki bwa cinyi kacya katùtukù banji kumonangana muntu ne mukwèndè to.

⁷ Yesu. “Muntu nansha umwe kàtukù mwanji kumona Nzambi musangu nansha umwe to, kadi mulela umwe wa Taatù ngudi muMuleeje patooke.” Nwamonu anyi? Mu ngaakwilù mukwabo, Nzambi ùvwa mumanyishìbwe. Mupersona wa—wa Nzambi ùvwa mumanyishìbwe mu Mubidi, Mukalenge Yesu Kilisto, pa nanku Yéyè ùvwa cimfwànyì cya pyòpyopyò cya Nzambi. Anyi, Nzambi ùDileejila patooke ku cimfwànyì kampana, nwamonu’s, ku cimfwànyì kampana, Muntu. Nzambi muDileeje patooke kutùdì, ne Yéyè ùvwa Nzambi. Kàyi mupersona mwisàtù anyi mupersona mwibìdì to; Yéyè nguvwa Mupersona awu, Nzambi. Ùvwa Nzambi Yéyè mwine, ùDìmanyisha, bwa twamona mwa kuMuumvwa ku byanza.

⁸ Timote wa Kumpala 3.16: “Kakùyi dikokangana to,” mbwena kwamba ne *makokyanganyi*, “bwalu busokoka bwa difwana dya Nzambi mbunene, bwalu Nzambi wàkamwèneshiibwa,” anyi *wàkamanyishiibwa*, “mu mubidi.” Abi kî mbilenga bya dikema anyi? Nzambi! Nenku kacya katùvwakù bafwànyine kuMumvwa Nzambi pàvwàYe ùtentemukila mu Dikunji dya Kapya apu to, ne bikwabo, pàvwàYe ùcyènza apu. Kadi twàkaMuumvwa pààkalwàYe umwe wetu, nwamonu’s, pààkalwàYe Muntu apu. Dîbà adi Yèyè ùvwa mwa kwakula neetu, ne twètù bafwànyine kuMuumvwa ku byanza, kuMukwata ne byanza, kuMulenga, ne bikwabo byònsò. Nenku anu mùdì Mufundu wàmba patooke ne “tudi bakwate Nzambi ne byanza” amu, nwamonu’s, ne byanza byetu ebi’s, baMulenge ne byanza byetu.

⁹ Nzambi ùdi mu muntu. Ne Yèyè ùdi ùDìmanyishila leelu ewu mu Ekeleeziya Wendè. Mu mwena Kilisto mulediibwe cyakabidi, mmùdì Nzambi ùDìmanyishila Yèyè mwine ne, Ùdi ùshààla anu Nzambi. Ne bantu bàà pambelu bàà pa buloba nebamanye Nzambi anu pàdìbo bamwena Nzambi mu wèwè awu ne mu mèmè. Awu ki mushindu wumwepele wamanyabo Nzambi, mpatùdì twètù biikàle mikanda mifundilangana, mukanda mifundilangana wa mu Mifundu, bàtùbala kùdì bantu bònsò. Nenku nsòmbelu utùdì nendè ùdi ùleeja patooke cìdì munda mwetu. Muntu ùdi ùmanyikila ku byenzedi bidìye wènza. Pa nanku bivwa bikèngela bwa byenzedi byetu kwikalabi bìmpè, nwamonu’s, anu bìmpè misangu yònsò, bwalu tudi tuleeja mpala wa Mukalenge wetu Yesu Kilisto.

¹⁰ Ncintu cilenga kaayipu’s we, nangananga pàdì muntu mu—mukulumpe bu mèmè ewu ngiimana mwaba ewu ne—ne ngeela meeji ku mwoyi wa panu wùdì munkaci mwa kujimina ewu, wùkaadi mupite kale awu, ne—ne twètù tudi kumpala kwetu ne matuku àcilwalwà a Cyendèlèlèlè kampanda. Nenku bu mùndì mumanye ne pìikalàbi ne mwoyi ewu wòwò nkààyaawù ki cimwepele cìmvwà mutekemene, s’ndi mufwànyine kwikala mutambe kwikala mwena dikenga mu dinda emu. Kadi mèmè mumanye ne mwoyi ewu wùvwa anu mu—mundidimbi cyanààna wa—wa cìdì cìkèngela bwa twètù kwikala. Ncimfwànyì, bwalu kacyna mwa kwikala cintu cipwangane cìvwà Nzambi mwenze to. Nzambi kèna wènza cintu cìdì cìbùtuka to. Nwamonu anyi? Nzambi ngwa Cyendèlèlèlè. Nenku, ki bwa cinyi, ewu mwoyi wutùdì tusanganyibwamu ewu, wùdì wùleeja anu cìdì kumpala kwetu. Mulelela wùdì kawùyi mwa kufwa to. Mubidi wùdì kawùyi mwa kubutuka to. Mwoyi wùdì kawùyi mwa kwangaciibwa to. Nwamonu anyi? Nenku ki bwa cinyi Mifundu mmilelela, pàdìYi yamba ne tudi ne Mwoyi wa kashidi, tudi ne Mwoyi wa Cyendèlèlèlè. Twètù katwadyakufwaku to. Nwamonu’s, bwalu wèwè udi ulwa...Paùdì ulediibwa cyakabidi, udi ulwa citupa cya Nzambi. Wamonu’s, udikù

kashidi bwa Cyendèlèlè, bwa kùyi mwa kupangilaku to. Udi citupa cya Nzambi, bwalu udi mwan'Èndè wa balume.

¹¹ Mpindyewu, ndi mufwànyine kwangata dìnà dya cyanààna, ne kwamba ne dyànyi dìnà ndikwabo dìnà pàadi. Ndi mufwànyine kwangata dìnà dya mààmù, Harvey, didi difwànyine kutamba kwikala pabwìpì nànyì menemene. Pa buloba, mààmù ùwva Harvey, ne díbà adi mèmè mufwànyine kwangata dìnà dya Harvey. Kadi nansha nanku mashi mmawànyine anu kujaadika ne mèmè ndi Branham. Nwamonu anyi? Bwalu ndi citupa cya tàatù. Ne pàndi anu ne mashi awu mu mèmè, nêngìikalè anu citupa cya tàatù. Nwamonu's, ncyà bushuwa. Ne pàndi ndediibwa kùdì Nyuma wa Nzambi, ndi citupa cya Nzambi, kwajiki; ndi mufwànyikijìibwe Nendè, nwamonu's, bwa ne Yèyè n'Taatù wanyì. Díbà adi's bìwva bikèngela bwa nsòmbelu wanyì kwikalaye ùMuleeja Yèyè; anu mùdì nsòmbelu wanyì ùleeja taatù wanyì wa pa buloba mu cimfwànyì cìwwaye yèyè ùsanganyìibwamù aci. Ndi...Bàtu bàmba ne mèmè ntu mufwane tàatù bikole, pa nanku ki bwa cinyi cimfwànyì cyèndè ncidi díbà adi cidileejila mu mèmè. Nenku tatwèbè wèwè—wèwè mmudileejile mu wèwè, ne baledi beebe. Ne, pa nanku, Nzambi Taatù wetu mmudileejile mu twètù patùdì balediibwe ne—ne bakumbananganane panwapa ku cimfwànyì Cyèndè.

¹² Mpindyewu, ndi muditwe mu dyakula, ncìciyikù mwa kuya ku cyena-bwalu cya bìmvwà njinga kunwambila to.

¹³ Ntu mèmè misangu yònsò ngaanyisha didisangishila dya mu nzubu, disangisha dya milombo dya mu kabutabuta bu mùdì aka, kutamba—kutamba ngeela meeji mùdì bantu bafwànyine kudyambidila ne ntu mufwànyine kwanyisha amu, bwalu masangisha a matambe kwikala malenga ne bikondo bitù bitambe kwikala bya bilenga bya bwobumwe bitù pa ciibidilu mmu disangisha dya milombo dya mu kabutabuta kakese bu mùdì aka nunku. Múnkaadì mutàmbe kudyùmvwà sheemàsheemà ne Nzambi, mmùdì anu dyanza dikese dya beena kwitabuuja bàdisangisha, ne mwòmò amu tukuukwila.

¹⁴ Mpindyewu mu dinda emu, ndi ncinka ne tudi basòmbe kaaba aka, makumi asatu, makumi anaayi, makumi asatu, mùndì ncinka, anyì cintu cya mushindu awu, tubadilaku ne bàna. Ncyèna mufwànyine kumanya to. Ncitu mushikuluje menemene mwa—mwa—mwa kubala búngì bwa bantu to, anu kukùpa mèsù cyanààna pa kasumbu kakese kàà bantu, bwalu kùdì bibambalu bikwabo kaaba aka, nudi numona's, mùndì nciyi mmona bantu bàdimu to. Mpindyewu, kadi patùdì tudisangisha mushindu ewu, ndi ngumvwà ne tudi tupeta sheemàsheemà utùtù katùyikù tupeta patùtù pambelu mu disangisha dya dinene, dya dyalabale to. Twètù, tudi mwa kupatulaku patooke bitùdì twètù biine naabi. Ki bwa cinyi, mu dinda emu, mwà ndyambidila, mu dilwa dya kaaba aka ne, nêngàakulèku ne

disangisha kaaba aka mu dinda emu, kabidi ne mpaasata wadi mukese wa maalu malenga ewu. Ndi ne disanka dyàbùngì dya kumona bààbùngì bàà ku balunda bàànyì kaaba aka, ba-Strickers ne bônso bâmvwà—bâmvwà nciyikù mumone kùkaadi cikondo kampanda aba.

¹⁵ Nunku ndi muswe kunwambilaku mu dinda emu Mukenji wànyì wa cidimu cipyacipyà wùmvwà mulongolole bwa kuyiisha dyalumingu dilwalwà edi mu mapingaja mu disangisha dya mu Phoenix, mu dibalaasa amu. Bwalu, munda emu, mvwa ngeela meeji ne pàmwàpa bàdi bakwata mikaba ya mèyi pa ciine aci kunùdi aku. Bwa mèmè. . . Pàmwàpa Nyuma Mwimpè mmufwànyìnekù kumpa meeji a—a matambe bwimpè kaaba aka munkaci mwa anu kaamusumbà kàà beena kwitabuuja aka, pàmwàpa kutamba mùdìbi bifwànyìne kwikala mu Phoenix munkaci mwa, nudi bamanye's, mùdi diitabuuja ne bupidya, ne diitabuuja dya majimbu ne—ne byònsò bibwelakanangane. Nunku dîbà adi bu ne bânà beetu bàvwakù ne, bu bôbò mwa kupatulaku mikaba ya mèyi ayi, mbifwànyìnekù kwikala—mbifwànyìnekù kwikala bitambe bwimpè bwa kubyenza mushindu awu, bwalu nudi bafwànyìne kupeta mukaba wa mèyi mutambe bwimpè mufumine mwaba ewu. Mvwa mulombe nsongààlùmè ayi bwa kwanjibo kukenketa dyambedi bipatudi bya mèyi abi. Nunku pàngààbwedi mu dinda emu, Mwaneetu Terry wangambidi ne bipatudi bya mèyi bìvwà bìmpè. Pa nanku, abi—abi mbimpè. Pa nanku mpindyewu twànjàayi, kumpala kwa twètù kulenga bwalu bùdi kabùyì bwa tuseku ebu, ne mèmè ndi mumanye ne. . .

¹⁶ Ngeela meeji ne mbambe ne bamwe bàà kunùdi nebashaale bwa didya dya mundaamuunya, ne nebadiile didya dya mundaamuunya adi kaaba aka mu mbanza emu anyì kumbelu eku, anyì cintu kampanda, bônso pamwe. Abi's mbilenga bya dikema. Ncya bushuwa ne mèmè ndi ngaanyisha bwa kunumona bônso basangile pamwe.

¹⁷ Nunku ndi ndyumvwa bu ne—ne Mukenji wànyì wa mu dinda emu ngwà dyambila Ekeleeziya wa Nzambi udi ne mwoyi, nwamonu's, bwalu ndi ngiitabuuja ne eci nciitupa Cyèndè cisòmbè kaaba aka mu dinda emu. Nunku kumpala kwa twètù kufika ku citupa cya kaciyi cya tuseku aci, twìnyìkààyìkù mitu yetu bwa katanci kakese cyanàànà bwa kusambila.

¹⁸ Taatù wetù wa mu Dyulu, tudi ne dyanyisha dîngyàdîngyàlè Kùdi, bwa dyèsè mene dya kuKubiikila ne Taatù wetù, bwalu *Taatù* mbwena kwamba ne tudi balediibwe kùdi Nzambi munene wàkafùka maulu ne buloba awu. Nunku tudi ne disanka dîngyàdîngyàlè bwa diine dyèsè edi, dya twètù ne mushindu wa kudyambidilaku munda mwa myoyi yetu, kabidi, dîbà adi ne, tudi bânà Beebe bàà balume ne bàà bakaji. Ne pathiishe patùdi mwa kuKumona ùDìmanyisha ne dîsù dikole munkaci mwetu ne, Wèwè udi Taatù wetu, mwikàlè ùkùdimuna meeji etu

uwumusha ku maalu a pa buloba, ne ùkùdimuna tubingila twetu ne twipacila twetu ne lwidi lwetu, ne katupa kònsò kàà citùdi, bwa kuKunanga ne kuKwitabuujà Wèwè, ne—ne kumanya ne milayi Yebe mmilelela.

¹⁹ Tudi badisangishe apa mu dinda emu mu mwaba ewu wutùdi biinyike dîna ne “mu ndekeelu mwa cipeela” ewu, anyi mêmè ngudi muwinyike dîna adi, ndyàmbedila nanku awu. Cidi cyenza ne ngàmbe nanku, Mukalenge, kî mbwà mêmè kuleeja cintu kampanda pa kasumbu kakese kàà bantu aka to, kadi, bu ne ncintu kampanda ngamba bwa bukese bwaku to.

²⁰ Kadi ndi nteeta kwela meeji ne Mòsà, musadidi Webe awu, nguvwa mu ndekeelu mwa cipeela, pàmwàpa anu yèyè ne mikooko yèndè, pàmwàpa mukàjèndè, Seforah awu, ne—ne—ne Ngeelèshòmà, mwanèndè wa balume awu, mbàvwà bafwànyine kwikala nendè. Mêmè . . . Aci ncyèna mumanye to. Kadi kwòkò aku nkwaKapetelàbo dilabula adi dyàkashintululà muprofeta awu, kumuumusha ku munyeemakanyi mutebelele, kumufikisha ku mudimu wa dyenzela Nzambi ukààvwa mumulongolole bwa mwine mudimu awu awu, mu ndekeelu mwa cipeela amu. Mwòmò amu mmùvwà—mmùvwà Dikunji dya Kàpya dimwènèshìbwe bwa musangu wa kumpala mu nsòmbelu wetu wa bantu ewu, bwa citùdiku peetu bamanye, Kàpya aku kàvwa kasanganyibwa mwamwa mu kaacipuka kakese kàà mu cipeela, kadi kakàyi kwoshika to. Kadi—kadi bùvwà m’Butumbi bwa Nzambi bùDileejila mu kaacipuka aku; pàvwà muprofeta Mòsà ùkòpola bisabaata byèndè, ùseemena pabwipi naaKu, ne kutumiibwaye ne mudimu kùdi Nzambi bwa kuyaye kasungila cisàmbà cya bantu bàà Nzambi.

²¹ Swaku bìkalè cyakabidi nanku leelu ewu, Mukalenge, mu ndekeelu mwa cipeela bwa tukòpola, mutudi mwa kwamba, bisabaata byetu, ne bifulu byetu, ne byònsò bitùdi naabi, ne tubitèeka panshi kwinsi kwa nkuruse wa Kilisto, twamba ne: “Ki mêmè ewu, Mukalenge, ntùmàku.”

²² Beneshaku mpaasata ewu, Mwaneetu Isaacson, mwaneetu twètù. Tudi tulomba bwa Wèwè kumubeneshaku yèyè ne mukàjèndè, ne bânà bèndè; Mwaneetu Stricker, mukàjèndè ne bânà bèndè; ne bakwabo bònsò bàdi baleejiibwe mpala mwaba ewu mu dinda emu abu.

²³ Nunku nyewu tudi badisangishe kaaba aka; to, Mukalenge, kabùyi bwa butumbi kampanda bwa bunene, anyi bwa kumanyika bu balombodi anyi—anyi baakampanda to . . . muntu wa bukookeshi wa cintu kampada cya cinène. Tudi—tudi kaaba aka anu bu beena kwitabuujà bàà badipwekèshe. Tudi kaaba aka mbwalu tudi baKunange, ne tudi banangangane muntu ne mukwèndè. Nunku patùdi tumonangana muntu ne mukwèndè ne patùdi tukungwila pamwe apa, tudi tusangana ne bìdi bimweka anu bu Nzambi wàbùngi mudisangishe pàdi mwena kwitabuujà

yônsò mudisangishe mu mwaba umwe kampanda. Ne Yesu mmwambe ne: “Nwênù benze cyôci eci mu Dîna Dyànyì, dîbà adi Mêmè nêngìikalè munkaci mwenu.” Nenukudi bamanye ne Wèwè udi kaaba aka.

²⁴ Akulaku neetu, Mukalenge. Nenukudi pìikalàbi ne tuntu tukese tûndi mufunde kaaba aka etu, ne Mifundu ya kwikala kuleedila eyi, byôbi bipatuke mu njila, mu dinda emu, wa meeji aùdi Wèwè muswe bwa twètù kwikala twela, dîbà adi, Mukalenge, tudi anu tushiya aci ku luseke, ne twenza mùdi Wèwè utwambila bwa kwenza amu. Tùbènèshàku mpindyewu, bwalu tudi tulomba nunku mu Dîna dya Yesu Kilisto. Amen.

²⁵ Mpindyewu, mu kubala kwa Mifundu, pa ciibidilu bìvwa ne mêmè... kumpala kwa mêmè kupeta bùngi bwa bidimu bînkadi naabi ebi, mvwaku mwa kwikala mvuluka bîmpè. Nenukudi mu miine matuku awu, mêmè... matuku a ku bunsonga awu, ncìvwa ngangata diyiiisha dileepa to, pàmwàpa tusunsa makumi asatu anyi cintu kampanda, mvwa ngungwijila maalu mu dyeji dimwepele kadi kuàlamina mu mutu. Kadi mpindyewu nkàadi... cidi cyenza ne ngìikalè ngenza masangisha maleemale aa mpindyewu, mbwalu ndi nkwaata pa mikaba ya mèyi. Nwamonu anyi? Ne mukaba wa mèyi ewu, nsongàalùmè yidi yiwùkwàta ayi, neyiwùbangè pa dîbà kampanda, pàmwàpa mpindyewu, ku ntwadijilu kwa disambila, ne wùdi wùya mu myaba yàbùngi menemene pa buloba bujima mu myaba pabwìpi ne yônsò. Pa nanku netwakule mpindyewu mu dinda emu pa cyena-bwalu cyànyì cya cidimu cipyacipya... citùdi tubiikila ne m’Mukenji wànyì wa cidimu cipyacipya. Mvwa nteeta, mvwa ne mayiisha a Noèl asatu, kadi ndi mumanye ne nwênù bàdi mu ndekeelu mwa cipeela emu aba nutu nupeta mikaba ya mèyi ayi. Kadi mu Mukenji wànyì—wànyì wa ndekeelu ku ekeleeziya, anyi wùvwà mulondele Mukenji wànyì wa ndekeelu awu, wùvwa pa *Bukênkè*. Nenukudi pawikalà kùyi mupete mukaba wa mèyi awu to, ndi mutwishiiabwe ne newukusankishe. Mêmè wùvwa munsankishe bikole bya dikema, disonsodiibwa dyàwù, divwà Mukalenge mumpeeshe adi.

²⁶ Mpindyewu leelu ewu, patùdi tukungamangana ne cidimu cipyacipya apa, ndi—ndi muswe mêmè kukwelela meeji kabiya bu mushindu wa kale to, kadi ndi muswe kwikala mutangile ku matuku àcivwawà. Nwamonu anyi? Bu mwàkambà Pòlò ne: “Mpwa mwoyi bintu bikaadi bipite abi, ndi nkolesha mutangile ku kiipacila,” nwamonu’s, “kàà dibiikila ditumbuke.” Nenukudi anu mùdici cyambiabwe emu, mbyenze bu kutangila paanyima utangidila mu lumwenu lwa mashinyi. Tudi tutangila ku bitùkaadi bapite, patùdi tutangila mu lumwenu lwa mashinyi lwa cìmònànyimà alu. Mpindyewu katwena tuteeta kuteeka Mukenji leelu ewu bu bàdi bàtàngidilà mu lumwenu lwa cìmònànyimà to. Ncifwànyìne kwangata mukùngulù mupitepiteme bule, nwamonu’s, bintu bìdi Mukalenge mwenze. Ne nwênù

bônsò nudi bamanye bintu binene bidì Mukalenge wetu wenza, mbimwe bya ku bintu bitambe kwikala bya bukole binkaadiku mêmè mumonemone mu nsòmbelu wanyì, Yêyè anu—anu mu ndambu wa ngondo mishààle eyi mmùdibi byenzèke. Nenku, kadi mpindyewu tudi ne kusakidila bwa bikaadì byenzeke, kadi mpindyewu tudi batangile kumpala. Tudi batangile kutuyaaya, ne mu cidimu eci cya 1964.

27 Nenku mpindyewu panwikalà mwaba ewu baswe kubala, anyi—anyi, ndi muswe kubala ndambu wa Mifundu, bwalu byònsò ebi mbishindameene pa Dîyì dya Cijila dya Nzambi.

28 Nenku cìdi cìnshiila mpindyewu bu dîbà dijima ne tusunsa dikumi ne tutaanu nanku, bwa mukaba wa mèyi ewu. Nenku, bu Mukalenge mwa kwanyisha, nênteetè bwa kuwupatula bwa nwâpeta mwa kudya cyakudya cyenu cya mundaamuunya. Ndi nzwela twasakidila bwa dingambila dyenu dya ne mvwa mwa kuyiisha too ne pa dîbà isambombo diloolo edi. Abi's bivwa bilenga bya dikema.

29 Mpindyewu tùbuululàayi mu Bible mu myaba yibidi, mikanda ayi mmitwangane nkundù. Mmu Dipungila Dikulukulu. Ndi ngangata cyena—bwalu bwa dibala, mu yôyi myaba yibidi ayi, Yeshàayi 62 ne Misambu 60. Mpindyewu mu Yeshàayi 62, ki mutwâbululà kumpala bwa kubala. Nenku mwômò emu, badi batuvulwija makole manene a Mukalenge Nzambi wetu, ne mushindu—mushindu wùdìYe munene, ne mushindu wùdì Nzambi wetu mwikàle wa bukole. Numfwilaayiku luse, n'Yeshàayi 60 pamutu pàà 62. Yeshàayi 60. Eyo, mpindyewu tudi tubala cyôci eci, Yeshàayi 60.1 ne 2.

Juuka panshi, ne kenka, bwalu bukênkè abu bwafiki, ne butumbi bwa MUKALENGE bwakubândidi.

Bwalu, mona, . . . mîdimà neyibwikile buloba, ne mîdima ya mupimbu neyibwikile cisâmbà, kadi MUKALENGE neakujuukile wêwê, ne butumbi bwèndè nebumwenekele pambidi peebe.

30 “Mîdimà ya mupimbu pa bantu.” Bwa eci, mu bushuwa bwa bwalu, eci ndiyi dya ciprofeta dya dituku ditùdì twètù ne mwoyi mpindyewu edi.

31 Mpindyewu pashiishe tùbuululàayi mu Misambu. Ngeela meeji ne ndi mwa kwikala mubwejakaje ndambu mwaba wùndì mufunde Mifundu yànyì mwaba ewu, pâmvwà mu dilwijakaja makeelela diloolo awu mu diyifunda, mu difunda dya cyôci eci. Misambu 62.1 too ne ku 8.

Bulelela musuuka wànyì mmwindile Nzambi; kùdìye nkùdì kufumina lwànyì lupandu.

Anu yêyè ki lubwebwe lwànyì ne lupandu lwànyì; yêyè ngudi ngabu wanyì; ncyakunyungishiibwaku bikole to.

Nwènú nenùdìfànyìkìjìlè díkebela dya muntu ntatu too ne ku díbà kaayi? Nenushebeyiibwe bwónsò bwenú, bu mùdì lumbu lusendame—lusendame lwìkalà . . . lùdì, ne bu mùdì lupangu lùdì lwàmba kuupuka.

Bàdi bakonkangana anu bwa mushindu wa kumwela panshi kumuumusha ku buneeme abu; bàdi basankila mu mashimi; bàdi babenesha mwabo . . . ne mukana mwabo, kadi beela milawu mundamunda. Selah.

Musuuka wànyì, ikàla wèwè mwindile anu Nzambi; bwalu dyànyì ditekemena dìdì difumina kùdiye.

Yèyè nkààyèndè ki lwànyì lubwebwe ne lwànyì lupandu; yèyè ùdì ngabu wanyì; mèmè ncyakunyungishiihwaku to.

Mu Nzambi mmùdì lupandu lwànyì ne butumbi bwànyì; lubwebwe lwa dikanda dyànyì ne cinyeemenu cyànyì, bìdì mu Nzambi.

Ikàlaayi bamweyemene yèyè misangu yónsò; nwènú bantu, pùmunàayi myoyi yenu kumpala kwèndè; Nzambi ùdì cinyeemenu bwetu twètù. Selah.

³² Mpindyewu, panwìkalà batabaleele mu kubala kwa Mifundu mu Misambu amu, mbatungunuke anu ne kwamba ne: “Nzambi ùdì lubwebwe lwànyì.” Nudi bamanye cidì lubwebwe luleeja mu Bible anyi? *Lubwebwe* mu Bible, kaaba aka, lùdì luleeja “dibuulula dya Nzambi.” Nwamonu’s, “Nzambi ùdì dibuulula dyànyì.” Ki cidìYe, nwamonu’s. Dibuulula dya Díyì dìdì lubwebwe.

³³ Bwalu, Peetelo dîngà dituku pàvwà . . . Yesu ùvwa mwele lukonko elu ne: “Bantu bàdi bàmba ne Mèmè Mwànà wa muntu ndi nganyì?”

³⁴ Ki umwe wa kùdìbo kwambaye ne: “Udi . . . Bamwe bàà kùdìbo bàdi bàmba ne Wèwè udi Mòsà, anyì Eliya, Yelemiya, anyì umwe wa ku bapofeta.” Kadi kí ng’aci cìvwà lukonko to.

“Nudi *nwènú* nwamba ne Mèmè ndi nganyì?”

³⁵ Yèyè awu, Peetelo kwakulaye ne díyì dikole, mèyì àtù mendè luumu aa, kwambaye ne: “Wèwè udi Kìlìsto, Mwànà wa Nzambi udi ne mwoyi.”

³⁶ Yèyè kwamba ne: “Udi mubeneshiibwe, Simona, mwànà wa Yona, bwalu kí mmunyiinyi ne mashi bìdì bikubuulwìle eci to, kadi n’Taatù Wanyì udi mu Dyulu. Nenku pa lubwebwe elu!” Nwamonu anyi?

³⁷ Nenku Davidi mu dyakula dyèndè kaaba aka: “Nzambi ùdì lubwebwe lwetu.” Nzambi ùdì lubwebwe lwetu pàdì Nzambi mubuulùdìibwe kutùdì. Aci cidì cìlwa lubwebwe, nwamonu’s. Nzambi ùdì lubwebwe lwetu.

³⁸ Mpindyewu, cyena-bwalu cyanyì, bwa mu dinda emu, mmwaku wa pabwàwù: *Shalom. Shalom*, mu cyena Ebelu, mbwena kwamba ne “ditalala.” Nenku ki cîndì ngambila Ekeleeziya mu dinda emu ne: “Shalom!” Mbwena kwamba ne ditalala.

³⁹ Mu mwakulu wa ci-Finois bàdi bacibiikila ne *Yumalan rauha*, ciikàle cyumvwija ne “ditalala dya Nzambi” kunùdi. *Rauha*. Nzambi, nwamonu’s, ditalala dya Nzambi, shalom.

⁴⁰ Mukenji wànyì wa cidimu cipyacipya mmutùmina Ekeleeziya musungula mu Yesu Kilisto, bwa cidimu cya 1964. Kacyi—kacyi anu bisumbu bya ekeleeziya nkààyaabi to; kadi Musungula awu, Inàbànzà awu, Inàbànzà awu wa—wa Ekeleeziya, Mukaji-musela wa Kilisto, nwamonu’s, ki ùndì mèmè ngambila.

⁴¹ Tudi kumpala kwetu kaaba aka, mu byena-bwalu byetu bibidi bitwabadi, Mifundu yibidi’s we, eyo, ne dipangakana dya dikema, eci cipangakana ne cikwabo. Mu Yeshààyi, mbambe ne: “Juuka panshi, ne kenka, bwalu butumbi bwa Nzambi bwafiki pambidi peebe. Bukènkè bùdi kaaba aka.” Kadi pashiishe anu mvensa mene udi ulonda awu, ùdì wàmba ne: “Mîdimà ya mupimbu yidi pa cisàmbà eci.” Ne dîbà adi patùdi mu disambakanangana dya Bukènkè ne mîdimà, nenku dîbà adi dîyì dîndì mèmè ngambila Ekeleeziya ndya ne “shalom, ditalala,” tujandulàayi ne ciine cyònsò aci ncyà bwalu kaayi, nwamonu’s. Cidimu eci, tudi kumpala kwetu ne byònsò bibidi mîdimà ne Bukènkè. Tudi . . . buloba bùdi busanganyiinwa mu cimwe cya ku bikondo bya cimvundu cya citambe bunene cya mîdimà mùdîbu kacya kabùyikù bwanji kusanganyiibwa to; kadi nansha nanku bùdi busanganyiibwa, cyakabidi, mu Bukènkè bwa butambe kubeneshiibwa butù kabùyikù bwanji kuteemenamu to. Nenku kùdi . . .

⁴² Dishiihangana dîdi menemene anu mùvwàbi ku cibangidilu amu, pàvwàku mîdimà ya mupimbu pa buloba. Ne Nyuma wa Nzambi ùvwa wèndakana pamutu pàà màyi ne kwambaYe ne: “Bukènkè bwikalèku.” Ki Nzambi kutapululaYe bukènkè ne mîdimà. Ne mèmè ndi ngiitabuuja ne tudi mpindyewu ne mwoyi mu dyòdi dîbà adi cyakabidi, mùdi Nzambi munkaci mwa kutapulula Bukènkè ne mîdimà, ne mùdiYe munkaci mwa kuyisaka ku lukwabo luseke lwa buloba, bwa Bukènkè kumonabu mwa kumweneshiibwa. Nenku tudi . . .

⁴³ Pashiishe, E—Ekeleeziya, cîndì mèmè mufwànyine kubambidila ne “Shalom,” mbwalu n’Ditalala dya Nzambi. Ki cîndì muswe kunutwadila mu dinda emu, bwa cidimu cipyacipya, katùyì tutangila paanyima to, kadi biikàle tutàngila kumpala ku dicya dya dituku dipyadipya. Mu mushindu wa ne, kùdi cintu kampanda cya cinene ciikàle cisanganyiibwa kumpala kwetu, kùdi disanka, diseemena ne dilwa dya Bukènkè

bunene bitũkaavwà bindilëndile munda mwa bidimu abi. Nenku mpindyewu tudi mwa kucimona cimwenekela kuulu kwa ntwangeenu wa dyulu ne buloba, mu cipaapu cya ntwangeenu wa dyulu ne buloba, cimwènekela pankaci pàà difwa ne dibenga kufwa. Tudi tucimona cibwayikila pankaci pàà maulu ne buloba, cyumuka ku buloba bwa màsaamà àdì àsanganyiibwà pa buloba ne bantu bàdì ne meeji alubakana, cìkabwela mu dituku dya bukênkè bunene dya Mwoyi wùdì kawùyi wùfwa ne mubidi wùdì kawùyi wùfwa ne buloba bùdì kabùyi bùfwa bwikalà kabùyikù mwa kujimina to. Cìdì—cìdì n’“Shalom,” kùdì—kùdì Ekeleeziya. Mpindyewu, ncikondo cya Bukênkè ciikàle cìlwa bwa beena kwitabuuja, kadi mîdimà ya mupimbu bwa bantu. Mêmè. . .

44 Dituku adi tuvwa twakula, mêmè ne mukàjàànyì, twakula pa bìdì bitàngilà dî—dîbà ditùdì ne mwoyi edi. Mpindyewu, kabingila kàdì kenza ne ngiikalè musungule kaaba aka, mvwa ndyumvwa anu bu ne mvwa mufwànyinekù kudilekelela kadi kwakula neenu, nwamonu’s. Nwamonu anyi? Cìdì, mbimweke anu bu ne kùdì cikondo cìdì pa bantu cya citambe kwikala cya cyenza luse cìdinku mêmè mufwànyine kudyelela meeji.

45 Misangu yònsò nkàadi mwenzenze ne mwànyì mwònsò bwa kuditacisha, mu dibenga kupetangana ne bantu mu ngaakwilù ya mu ntendeleelu; kadi byòbì ne paanyima ncyèna mufwànyine kumukwataku ku cyanza, nansha cintu aci cìfwànyine kwikala cya citàpa bishi, ne kumukwata ku byanza, kwamba ne: “Eci ncipeta cya dyumvwa ditambe bwimpè munkaci mwetu,” ne kutungunuka anu ne kunanga muntu awu (nciyi ncyambila anu ku mishiku cyanààna to, kadi ncyàmba byumukila munda mwa mwoyi wànyì), dîbà adi ncyèna mukumbaneku to nansha—nansha kakese bwa kupatuka kwaka kadi kuteeta kwakula ne bantu. Bwalu, nwamonu’s, tudi ne cya kwenza nanku, tudi ne cya kunanga muntu awu. Nwamonu anyi? Kadi kuya munkaci mwa bantu bàà bipidi bya mishindu yònsò, ne tusumbu twa ntendeleelu ne byòtà bishiileshiilangane, ne ntendeleelu ne bikwabo, ne kuteeta kuteeka Bible panshi, ne kwamba ne: “Tùlekelààyi—tùlekelààyi kukokangana pa bwalu abu biimanyine pa twitabàayi wenu anyi pa mukanda wenu wa mèyi malongolola a nsòmbelu wa bukalanga to, kadi pa Bible.” Ne pashiishe kabiyi. . . Pàmwäpa misangu mikwabo bantu bàtu bàlwa anu ne mèyi a nkabukabu a menemene; kadi bu mêmè mwa kupeta dyeji dimwe dya ne ncyèna munange muntu awu to, dîbà adi—dîbà adi’s ndi mmanya cintu cimwe ne, Nyuma wa Kilisto ùkaadi munguumuke. Bu mêmè—bu mêmè mwa kudyumvwa ne ncyèna munange muntu awu to, kùdì cintu cipampalamuke mu mêmè.

46 Bwalu Nyuma wa Kilisto, pàdibo. . . kùdì. . . dîbà dya—dîbà dya diMupoopela dya pa nkuruse, ne bânà Bààbò Yèyè mwine munkaci mwa dipoopela misonso ayi, ne—ne bufuki Bwèndè

bwakafukaYe mbùvwà munkaci mwa kupoopela misonso, bwine bwakafukaYe abu, mu mubidi Wèndè wa buntu awu. Kadi nansha nanku, ne mwoyi mùle tente ne dinanga, Yèyè wàkeela lubila ne: “Taatù, bàfwilè luse, kî mbamanye cidìbo benza aci to,” nudi numona’s.

⁴⁷ Ne mêmè—mêmè ndi mufike pa kaaba aku. Ndi ngiitabuujja ne bantu kî mbamanye cidìbo benza to. Bìdi bifika pa cikondo cya ne muntu, bwa pa kumona, mmushààle mudifile ku bubi mu mushindu wa ne cikaadi—cikaadi cintu cya cyènta luse. Mbimweke anu bu ne kùdi—kùdi mundidimbi wa mîdimà, anu kumutu menemene kwa bantu aku, mwikàle wùbàsàka.

⁴⁸ Bu mùdi, cileejilu, cintu cimwepele eci. Nkosolola ditunga eku ne eku ngaakula, ne Mukalenge Nzambi ùmanyisha, ùshìndika Dìyì Dyèndè ne ùleeja ne mbyôbì menemene, ne kàyikù ùshiya kantu nansha kamwe kàmbiibwa kàdi kàkàyi kènzeka menemene anu cidìYe mwambe, wàmba dìyì ne cintu cìfika ku diikalakù, ne bikwabo, bu mùdiYe mwakaci mwa kubyenza emu. Kadi bantu bàshààla basòmbe batangile ciine aci, ne bàtùngunuka anu mu ngiikàdìlù wabo umwèumwè awu. Nwamonu anyi?

⁴⁹ Nwamonu’s, kî ndidyombolangana to, kadi mbyenze bu mùdi bàna beetu bàà bakaji, misangu yàbùngì pàndì mbambila bwa divwala dya bilàmbà abi, ne dikosa dya nsuki yabo, ne tuubintu twa tukese atu. Ne bantu balume, mushindu wùdìbo batungunuka anu mu twitabààyi yabo ayi, ne—ne bakwacila anu twitabààyi ayi mudimu ne bikwabo. Kadi—kadi pààbò’s mbantu bîmpè. Mbantu bàà maalu mîmpè. Kadi nansha nanku mbimweke anu bu ne kabeena—kabeena—kabeena mwa kuumvwaku to, mbimweke anu bu ne kabeena mwa kucyumvwa to. Bwa cinyi? Pàndì ngaalukila cidimu cidì cìlondà, ne, pamutu pàà kwikalabo balengeleku kupita apu, mbibiipe bipange ne mwa kubiipa. Bidi—bidi anu kacya byatungunuka. Ki mwaneetu wa bakaji nyèyè ewu ùvwakù musangu kampanda ne nsuki milenga mile, ùkaadi muyikose. Muntu mulume nyèyè ewu uwa umwèkakù musangu kampanda bu ne ùkaavwakù mwangàte kaaba kèndè ne mupàtùke ùlonda cintu cìvwà cijaalàme; ùkaadi mwalukile buludi mu...byenze bu mùdi mbwa wàlukila ku bilushi byèndè, ne—ne mùdi ngulube wàlukila ku bitoci byèndè. Nwamonu’s, wàlukilamu buludi. Mbimweke anu bu ne kùdi cintu kampanda cidì cilengè cisàmbà cyetu, ncilengè bàà pa buloba, mu mushindu wa kabàyi bamweka bu bàdi ne cyu—cyumvwilu to, kùdi cintu kampanda cipampalamuke.

⁵⁰ Mbyenze anu bu panùdi numona muntu leelu ewu, kanwena nupeta ngiikàdìlù mushuwashuwale awu mu balume to. Kanwena numusangana mu bakaji to. Mpindyewu ncyèna ngaakula bwa...Kabingila kàdi kènta ne nshindameene pa cyòci eci, mbwà kufika ku “Shalom.” Nwamonu anyi?

51 Kadi nudi numona bakaji mu dituku dyetu edi, kabeena bamweka bu bàdi ne ngiikàdìlù wa buuinàbànzà wuwwabò nendè kale wawa awu to. Mbyenze anu bu ne bàdi—bàdi ne dijinga adi, kadi kùdi cintu kampanda ciikàle cibapangisha bwa kucyenza. Bìdi bimweka bu ne kùdi bujitu kampanda. Mu mushindu wa ne, udi wambila inàbànzà kampanda—kampanda ne kabìvwa bìkèngela kwenzaye cintu kampanda, kadi inàbànzà awu ùtàngila Cyôci aci ne wìtabuuja Cyôci aci, mmuswe kwitabuuja Cyôci aci, kadi kwikàle cintu kampanda cimusaka mu mushindu mukwabo. Nwamonu anyì? Mukwacikwetu, mêmè—mêmè—mêmè's ndi mmuumvwila luse. Mmukwaciibwe anu menemene mu bùntàndà bwa Hollywood, ne bwa mamanyisha a ku télévision, ne a ku tudyomba, ne a bibejibeji, mu mùsèèsù, mu—mu madidiishi a makajiinyi, ne mvwadilu wa cyena leelu ne bikwabo, ne mushindu wùdi bakaji bakwabo abu basambakeena nendè. Nenku mbimweke anu bu ne kùdi cintu kampanda cidìbo kabàyi anu mwa kutuukaku to; bansongà beetu, bakùlumpè beetu, ne bantu beetu bàà bàkaadi bashindàme abu.

52 Mbimweke anu bu ne kùdi cintu kampanda munkaci mwa bantu's. Muntu mulume kacyna umweka bu udi, bu udi ne ngiikàdìlù wa bulume wuwwayè nendè pa ciibidilu awu to. Bakaji kabàcyèna ne ngiikàdìlù wa bukaji wuwwabò nendè pa ciibidilu awu to. Paùdi wangata balume leelu ewu, balume kabacyena bapayame mùvwàbo pa ciibidilu amu to. Byònsò bikaadi anu mushindu kampanda wa... Mbaswe kwikala bàvwàla bisabaata bya bwoyòya biikàle bikunzubile, ne—ne biikàle bàjinga kwikala bènza maalù bu bantu bakaji. Mpindyewu aci's ncyà bushuwa. Mbimweke anu bu ne, mu mushindu kampanda, bu mùdi dinyangakaja's. Mukaji ùdi ùjinga kwikala ùkòsa nsuki yèndè ne wènza maalù bu—bu muntu mulume. Ne muntu mulume ùjinga kwikala wènza maalù bu muntu mukaji. Nwamonu anyi? Kadi peebe's udi mwa kuyiikila naabo, ne bóbò biine biikàle bantu bàà maalù malenga bàà kuyiikila naabo, bantu bàà maalù malenga, bàà ngiikàdìlù wa bulunda, bamanyè mwa kusòmba ne bantu naabo. Cidì cyenzèje bwalu ebu ncyinyi? S'mmìdimà ya mupimbu yidi pa bantu ayi, s'ncintu kampanda cidì—cidì cibasakemu aci.

53 Mushindu wùvwà beena Yuda mu matuku àkalwà Yesu pa buloba awu, Yeshàayi ùkaavwa mwambe ciprofeta pa bwalu abu ne: “Nekwikalè, nebiikalè ne mèsù kadi kabàyi mwa kumona, ne maci kadi kabàyi mwa kuumvwa to.” Nenku ki bwa cinyi Yesu wàkalòmba bwa kufwìdiibwabò luse, bwalu bìvwa bìkèngela bwa kwikalabì mushindu awu bwa kuuja Mifùndu.

54 Kadi's neyôci eci citwàlùkidile twètù. Bible mmwakule bwa dituku ditùdi ne mwoyi edi, ne mwambe ne maalù aa nealwe, “mìdimà ya mupimbu pa cisàmbà.” Kabidi tudì tucimona ne,

kùdi cintu kampanda ciikàle anu, anu cyanàànà ne, bantu mbaswe kadi kabàyi bàkumbana to.

⁵⁵ Nikodeme's wàkacyàmba patooke musangu kampanda kumpala kwa Mukalenge ne: "Laabi, tudì bamanye ne Wèwè udi Mulongeshi mufumine kùdi Nzambi, bwalu muntu nansha umwe kî mmufwànyîne kwenza bintu byùdì Wèwè wenza ebi Nzambi kàyi nendè to." Kadi cìvwa mmìdimà ayi, anyì bufofo abu, pa cisà cya beena Yuda, bwa ne Maasiyà ùvwa mwa kulwa bwa kupatula Mukaji-musela mu bàà Bisamba bya bendè. Bìvwa bìkèngela baMubenge.

⁵⁶ Nenku mmìdimà ya mupimbu yìdì pa maekeleeziya ne bikwabo leelu ewu ayi, bwa kupangabo kumona Bukènkè bùdì munkaci mwa kuteema ebu. Nwamonu anyì? Nwamonu's, mbimweke anu bu ne kùdi disakiibwa kampanda dya bujitu. Patùdì twangata bamwe bàà ku batangadiki bàdì bamanyìke bìmpè leelu ewu, bàdi anu beela mbila mikole bàkèba ditabuluja ku musangu ne ku musangu, kadi biikàle bàkwàta mudimu bàCilwisha; nwamonu's, kabàyi bumvwa to, kabàyi ne luumvu to.

⁵⁷ Kadi ncyèna ngamba nanku mu—mu kabingila kàà kuteeta kwamba ne: "Mpindyewu twamonu *Cikampanda*, ne, 'butumbi kùdi Nzambi,' bôbò—bôbò kabeenamtu to." Mèmè ncyèna nteeta bwa—bwa kwamba aci mu... bwa kufikisha bantu ku dyela meeji ne: "Ee, Mwaneetu Branham, wèwè—wèwè ngudi ne Bulelela bumwepele bùdiku pa buloba apa" to. To, aci ncyà mafi. Nwamonu anyì?

⁵⁸ Ndi mèmè ncyamba anu mu Bukènkè bwa dībà mutùdì munkaci mwa kwendela emu, ne ciine aci bwa dyakalenga dya bantu bàdì bàteeta bwa kwenda kukebangana ne bwine Bukènkè ebu. Bulelela, Yesu wàkamba ne: "Muntu nansha umwe kèna mwa kulwa Kùndì, pàdì Taatù Wanyì kàyi mumukoke to." Muntu nansha umwe kaakuBumonaku to. N'Dimiinu dìdì didyànjila kulongolola adi, ne anu dyôdì adi nkààyaadi, ndiikalà mwa kuBwakidila. Kadi twàfikì cyakabidi pa kiine kaaba aku. Bible mmwambe ne: "Nudi bukènkè bwa bàà pa buloba."

⁵⁹ Muprofeta wàkamba ne: "Mìdimà ya mupimbu pa cisàmbà," pa bantu bàà pa buloba pa dībà edi. Ne ki citùdì bapete menemene ncyôci aci, mìdimà ya mupimbu pa bantu.

⁶⁰ Nzambi, mu luse Lwèndè lunene, anu múnkaadiku misangu yònsò muyiisheyiishe ne mucitwatwatwe nyama ku mikolo ne, Yèyè misangu yònsò ùtu anu ùleejila maalu Èndè—Èndè mu dyulu, maalu Èndè a matambe bunene awu, àtu ènzekela mu dyulu kumpala kwa kwenzekawu pa buloba. Yèyè ùdi ùDileejja Yèyè mwine. Mu ngaakwilù mukwabo, kumpala kwa Maasiyà kubwela mu kaaba kàvwà mudimu Wèndè wa bwambi awu ne cya kubangawu, kwàkalwa Mutooto kampanda—kampanda mupatukile mu dyulu wàkalombolà bantu too ne

ku—ku—ku mwaba wùvwàYe ùsanganyiibwa, beena meeji abu. Munùvwà bumvwe mu Diyiisha dyànyi dishààle mushindu wùvwà Nzambi mukwate mudimu ne beena—beena meeji abu, ne—ne mu dituku dyàkabàtùmàYe Yèyè—Yèyè njila mukwabo ku ciloota, ne kwambilaYe Yozefu mu ciloota mushindu wa kukubaye nsòmbelu wa Mwan'Èndè Sungasunga awu. Bwalu yèyè wàkapeta ciloota, kùvwa . . .

⁶¹ Ciloota ncintu cya cilondèle, cintu kampanda cya ku luseke, bwalu bantu's bàdi mwa kuloota biloota bìdi kabiyi bya cya bushuwa. Kadi kakùvwa muprofeta nansha umwe pa buloba na dituku adi to, nwamonu's, kakùvwa muprofeta nansha umwe to, ki bwa cinyi byakakengela bwa Nzambi kukwataYe mudimu ne cìvwà cikèngelà kukwataYe naaci mudimu aci. Nenku cìdi citulongesha ne—ne Nzambi ùdi mwa kukwata mudimu ne cyeledi cya meeji cyònsò ne cintu kanà cyònsò citùdi twenza, piikalàci cilàmbula kùdiYe. Kadi cìdi ne cya kwikala dyambedi cilàmbula kùdiYe. Dyelangana dyebe—dyebe dya meeji, bu mudidi mu bulelela dìleejiibwa mu ciloota cyebe, nwamonu's, bwalu nkandondo keebe kàà mwoyi. Bu wèwè mwa kutangila ciloota, neumone ne ncintu cyùvwà mwelele meeji, anyi cintu kampanda cya mushindu awu. Bwa pa ciibilu, wèwè udi umona. Nenku ikàlà muteeke meeji ebe pa Nzambi, dìbà adi, wamonu's, bwa kuleejawu cintu kampanda Bwèndè Yèyè. Nenku cyònsò cyùdi aci, lekela bwa ciMuleeje Yèyè.

⁶² Mpindyewu, mu maulu muulu mwamwa, nukààvwa bamone ne . . . ? Ndi munkaci mwa kutangila eci, Bukènkè bùdi—bùdi pa fòtò wa cikandakanda cya *Life* magazine, cìdi mwaneetu wa balume ùtu musòmbèle mu nzubu emu ewu mulamike ku cimanu cyèndè, Bukènkè bwa matumba asatu abu.

⁶³ Mbingenzèkèle anu ne ntumèku meeji. Muntu wa kunùdi aku yèyè mwikàle ne nkùdimwinu wa Bible wa Lamsa, bu nwènù mwa kumona pa cizubu apu, pàdi bukènkè pasatu, bwa beena busatu, bukènkè bwa matumba asatu bwenze bu kafulu kàà bukènkè. Nenku pàvwà Docteur Lamsa, mulunda wanyì, mulunda wanyì wa katapula-kateeka, pàvwaye munkaci mwa kukùdimuna Bible, aci ki cimfwànyi cya kale cya Nzambi cya beena Ebelu mu mushindu mulelela wùdiYe wa busatu; kaciyi Nzambi yisatu to, kadi dimweneshiibwa mishindu yisatu dya Nzambi umwèumwè awu: Taatù, Mwànà, ne Nyuma Mwîmpè. Bukènkè abu nkajengu kajimà kàà Bukènkè mu mushindu wa cipaapu cya nseke yisatu, ciikàle cyumvwija ne Nzambi neàsòmbèlè mu myànzù yisatu: cipungu cya buuTaatù, cya buuMwànà, ne cya Nyuma Mwîmpè, byònsò abi Nzambi umwèumwè awu.

⁶⁴ Kadi nukààvwakù bamone ne kumpala kwa Bitampi Mwandamutekete kubuuludiibwabi, kumpala kwa Bukènkè bùdi kabùyi buumwika abu kumwenekabu mu maulu mwaba ewu kuulu kwa Tucson, Flagstaff, mwaba wutùvwà twètù

tusanganyiibwa awu? Mwaneetu Fred, babidi bàà ku bantu abu bàvwà... bantu babidi abu bàvwà naanyi mu diine dinda adi. Piine apu, mpàvwàci cidyanjila kwamba ngondo ne ngondo kumpala kwa dîbà adi, ne necyenzeke. Mwaneetu Fred Sothmann ne Mwaneetu Gene Norman bõnsò babidi bàdì basòmbe kaaba aka mu dinda emu aba, pàvwàci... bàvwapù pàvwà dikubakuba adi dituute, kabàyi nansha bamanye ne biine bintu ebi nebyenzeke to. Ki Yèyè kungaaluja, kwamba ne dîbà dikaavwa pabwîpi bwa Bitampi Mwandamutekete bivwà bilamè maalu masokoka mwandamutekete a Bible mujima awu abi, àvwà makanga ne Bitampi Mwandamutekete ebi awu. Ne mùvwà banjelo bàvwà balonde njila aba, baamusanjeela bàà Bikondo bya Ekeleeziya, bakàngùle too ne ku citupa kampanda cya cyòci aci. Kadi mu dîbà dya mwandamutekete, musanjeela wa mwandamutekete, bwa ne maalu masokoka ònsò aa àvwà ne cya kujika. Nwamonu anyi? Musanjeela wa mwandamutekete wa pa buloba, nwamonu's, mwanjelo udiYe wàmba ewu ùvwà yèyè dîbà adi pa buloba. *Mwanjelo* ùdi umvwija ne “musanjeela.” Ne pashiishe, paanyima pàà aci, yèyè kumona Mwanjelo mukwabo utuuluka, kàyi mwanjelo wa pa buloba uvwa mupeeshiibwe Mukenji panwapa awu to, kadi (mukwabo) Mwanjelo wa bukole wàkatùuluka mu Dyulu mwikàle ne mwanzankongolo kumutu Kwèndè, ne Wàkatèeka dikàsà pa buloba bume ne pa mbù, ne wàkadicipa ku Ewu udi ne mwoyi kashidi ne kashidi awu ne: “Dîbà kadyakwikalaku kabidi to.” Nwamonu anyi? Kadi kumpala kwa Yèyè kutuula Bitampi Mwandamutekete abi bwa kubibuulula, bivwàYe muleeje mu mushindu wa kawùyi wumvwika abi, Yèyè wàkanji kubileeja dyambedi mu maulu.

⁶⁵ Dituku adi baakakwata maafòtò mu États-Unis wa ku sud mwõnsò amu ne mu Mexique. S'ki cyòci aci cilembèlèle mpindyewu mu cikandakanda cya Life Magazine, cicikàle anu bwalu busokoka kùdibo. Kadi Yèyè ùdi ùbileeja mu maulu kumpala kwa kubileejaYe pa buloba. Yèyè ùtu wènza anu nanku misangu yõnsò. Yèyè ùtu wànji kuleeja bimanyinu Byèndè mu maulu dyambedi.

⁶⁶ Nansha mene mu Cidiminanzaji. Ncyèna ngaalukila ku dilongesha dya Cidiminanzaji to, kadi ndi anu nnuleeja cyanàànà ne maulu àtu àCileeja. Mu Cidiminanzaji tudi tusanganamu ne, mu tusumbu twa mitooto amu, Yèyè ùtu muleeje Bible mujima mu tusumbu twa mitooto twa—twa Cidiminanzaji atu. Tudi tusanganamu ne Yèyè ùdi ùbanga, cimfwànyì ciine—ciine cya ntwadijilu mu Cidiminanzaji cidi m'Virgo, ne cimfwànyì cya ndekeelu mu Cidiminanzaji n'Leo Ntambwe; bileeja ne Yesu ùvwà mwa kulwa pa buloba dyambedi ùlwila mu Virgo, Yèyè nealwe musangu mwibìdi bu Ntambwe wa cisàmbà cya Yuda. Nwamonu anyi? Yèyè ùdi ùpicila mu mishipa micyamakane kumpala menemene kwa cyòci aci. Cikondo cya

Kansere, citùdi twètù ne mwoyi mpindyewu eci. “Ne maułu ônsò àdi àMwamba Yèyè,” mùdi Bible mwambe.

⁶⁷ Mpindyewu, kùkaadi ndambu wa ngondo wùndi muyiishe, mu masangisha a mulongolongo ku tabernacle, pa *Bikondo Mwandamutekètè Byà Èkèleeziyà*. Nwènù bònsò, pàmwàpa, nuwva babiteeleje. Kadi ndi mwenze anu njikija dizola dya Bikondo Mwandamutekete bya Ekeleeziya abi ku cibasa cya difundila, mushindu mwine wàkabwelà Bukènkè abu ne mwàkalwà Bukènkè abu kupatuka’s. Ne ndi ngeela meeji ne nudi ne cyòci aci, pàmwàpa, mwaba kampanda kaaba aka; kadi cidi munkaci mwetu, nansha bishi, aci tudi bamanye. Kadi cintu cya cikèmesha, dituku dya ndekeelu òvwà Cikondo cya ndekeelu cya Ekeleeziya cizodiibwe adi, Dikunji dya Kapyà dinene edi (diine didi munkaci mwetu emu adi) ndituuluke munkaci mwa bantu nkama, ne diDìsàke paanyima too ne ku cimano cya paanyima cya tabernacle. Nenku kwòkò aku, kumpala kwa miine nkama ya bantu eyi aku, e kuzoladi Bikondo bya Ekeleeziya abi, eku dyenda divwija mìdimà eku dyenda divwija bukènkè, anu menemene mùmwà mèmè mucizole ku cibasa cya difundila aku. Mu mushindu wa kabìyi byumvwikaku to!

⁶⁸ Mpindyewu, dituku adi, tudi bapete bwalu bwenzèke mu bwalu bulonda bwa ekeleeziya mpindyewu. . . Mu—mu Bible, *ngondo* ùtu ùleeja “ekeleeziya,” ne *dìbà* ditu dileeja “Kilisto.” Bwalu tudi tusangana ne mu Bwakabuulwibwa, nshapita wa 12, *mukaji* uvwa “ekeleeziya” awu, ùvwa musanganyibwe mwikàle ne ngondo mwinshi mwa makàsà èndè ne dìbà kumutu kwèndè, mitooto dikumi ne yibidi ku cifulu cyèndè cya butumbi. Mbwenà kwamba ne, mikenji ya—ya kale ya beena Yuda bàà Orthodoxe yìvwa mwinshi mwa makàsà èndè, yèyè ùvwa mukosolwelemu mukabwele mu bukènkè bwa dìbà. *Mitooto dikumi ne yibidi* yidi “bapostolo dikumi ne babidi” bàtù batutwadile mayiisha abu, mpindyewu, ku bulombodi bwa Nyuma Mwìmpè. Mpindyewu tudi tusangana ne ngondo mu maułu ùdi mbwà kuleeja bukènkè bwa dìbà, pàdi dìbà kadiyipù to. Yèyè ngudi utupeesha—ngudi utupeesha bukènkè bwa twètù kumona mwa kwendakana. Kadi ùcidi yèyè anu. . . Nansha yèyè ùfila bukènkè bùngì kaayi, kabwena anu bukènkè bupwangane to, bwalu yèyè ngudi ubuleeja. Kadi dìbà ndidi dikenkela pa ngondo, ne ngondo pèndè ùleeja bukènkè bwèndè abu pàdi dìbà kadiyipù apu. Kadi pàdi dìbà dipatuka, dìbà adi ngondo katucyena nendè dijinga kabidi to.

⁶⁹ Nenku leelu ewu Ekeleeziya ùdi ùleeja Bukènkè bwa Mwànà wa Nzambi udi kàyipù awu. Ekeleeziya ndidileeja dya Bukènkè. Bwalu Yèyè mmwambe ne: “Mu katanci kakese emu bàà pa buloba kabeena baMmona kabidi to. Kadi nwènù nenuMmone, bwalu Mèmè nèngiikalè neenu, munda mwenu mene, too ne ku ndekeelu kwa cikondo. Byenzedi bìndi Mèmè ngenza,” Makènkè

akamweneshaYe awu. Ne kakwenaku Bukênkè to pa kuumusha ku Dìyì dya Nzambi. Kùvwa . . .

⁷⁰ Dìbà adi dìdì n’Dìyì dya Nzambi. Ku cibangidilu, Nzambi wàkamba ne: “Bukênkè bwikalèku.” Nenu Dìyì dya Nzambi dimwèneshiibwe adi, pàakamwèneshiibwà Dìyì dya Nzambi adi, bukênkè bwakiikalaku. Dyambedi, Nzambi wàkacyàmba. Kadi ambàayi tũng bu ne kabwakamwèneshiibwa? Dìbà adi kacìvwa cyanji kwikala bukênkè to. Kadi pàakacyàmbàYe apu, ne pashiishe kumwèneshiibwaci, kushindikiibwaci, Dìyì Dyèndè kushindikiibwaDi, bukênkè kwikalabu kwòkò.

⁷¹ Nenu mushindu umwepele wùdìbì mwa kwenjiibwa mpindyewu, mpàdì Dìyì dishindikiibwa, Dìyì Difunda dya Nzambi dishindikiibwa, dìbà adi cidì cileeja Bukênkè. Dìdì, katupa nkàdì kateemeshiibwe, anyì kamwèneshiibwe bwa cikondo ne cikondo cyònsò. Tudi tucisangana mu Bikondo bya Ekeleeziya, tudi tucisangana mu bikondo bya ekeleeziya wa Dipungila Dikulukulu—Dikulukulu. Musangu wònsò wùvwàku kùlwa dìbà bwa dimwèneshiibwa ka—kampanda dya lwendu, kùvwa kùlwa muprofeta kampanda pa buloba. Nenu Dìyì dívwa dìlwa kùdì muprofeta awu, ne yèyè úvwa úvwija Dìyì adi ne mwoyi. Ne pàvwà Dìyì adi dimanyishiibwa, cìvwa cileeja Nzambi. Nenu kùvwa ci—cikondo, kùvwa Bukênkè. Nenu mushindu awu ngùdì Bukênkè bùlwa leelu ewu.

⁷² Mpindyewu, ncyèna cilumbu ne dingumba nansha dimwe to, bantu. Kadi mu byònsò bìndìku mèmè mwa kwelela meeji abi ndi cilumbu ne ndongolwelu ayi, bwalu yòyì nyidì mibi. Ne ndongolwelu wa nzànzànzà ukààdikù mujuuke, úvwa nndongolwelu wa—wa Loomo wa ekeleeziya wa Katolike wa cyena Loomo. Yèyè awu ki uvwa bulongolodi bwa nzànzànzà bwàkalongolòlòbo, úvwa ng’ekeleeziya wa Katolike wa cyena Loomo, Nicée, Loomo. Bu bidimu nkama yisatu ne makumi abidi ne bitaanu nanku awu paanyima pàà lufu lwa Kilisto, mu cidimu cya 325, kupatukaku bulongolodi bwa ekeleeziya wa cyena Loomo wàkasanga bantu kaaba kamwe ne kudyombola cikwabo kanà cònsò cìvwà cìbènganganà nendè yèyè aci. Mwaba awu ki wàkapetalàbo malongesha abo meenyi awu ne kubangabo ndongolwelu kampanda uvwa kule ne Dìyì. Nenu mpindyewu ekeleeziya awu, kacya anu ku mwine musangu awu, yèyè útu yèyè anu úleeja mídìmà, bwalu mu cikondo aci, twàkapìcila mu citùdì tubiikila ne, “Bikondo bya Mídìmà,” bidimu bitwe ku cinunu. Aci ncimanya kùdì bafundi bònsò bàà maalù malonda ne bamanyi bàà mabàlà bàà Bible, ne bakwabo ne, m’Bikondo bya Mídìmà, mpàvwà ekeleeziya wa cyena Loomo ùkòntonona byònsò.

⁷³ Nenu ekeleeziya wa cyena Loomo ewu ki “mamwèndè wa—wa bandumba,” mùdì Bible mwambe, mu Bwakabuulwibwa 17 ne, “yèyè úvwa mukaji wa masandi, ne mamwèndè wa bandumba.” Mpindyewu, awu nnsòmbelu wa masandi,

mukooyike wa mukaji. Byônsò bibidi abi bìdi cintu cimwe, byônsò mbya mwomumwe. Pa nanku pìikalàci—pìikalàci ndumba, s'cìvwa cìfwànyìne anu kwikala mukaji's. Ki bwa cinyi, nudi numona ne, kî n'“ndumba” to, kadi, “bandumba.” Nwamonu anyi? Ûdi “yèyè,” ku bumwe, “mukaji wa masandi.” Dìbà adi ekeleeziya ayi yìdi yìbìikidiibwa ne m'“bandumba,” bàna bàà bakaji bàà mukaji wa masandi wa cyena Loomo awu. Yèyè ùdi mamwëndè wa yônsò ayi, mamwëndè wa bulongolodi.

⁷⁴ Nenku kî ncintu cya cikemesha anyi ne, mu dituku ditùdi bapicile mu biine bintu byônsò ebi edi, ne Mukenji mmukosolole buloba bujima wùlwishangana ne bulongolodi, Mubutonokele ku dyabalume ne ku dyabakaji, mu mushindu wa ne, mu dìbà ditù dyambiibwe kacya ku cidimu cya 1933 edi, pààkampèèshà Nyuma Mwîmpè bikeena-kumona abi ne mundeje cikondo cya nshiikidilu apu, bintu mwandamutekete bìngààkambà abi, ne bitaanu bya kùdìbi bìkaadi byenzèke, anu mu byòbi menemene, kantu ne kantu; bu mùdì Allemagne (ùtu ùngambila anu mpuukapuuka menemene pa bintu bya mushindu awu). Kadi mbyenzeke anu menemene mushindu wùvwàYe mwambe ne nebyenzeke awu. Mùvwà Mussolini mwa kuya mu Èthiopie, ne mùvwà Èthiopie mwa kupona ku makàsà èndè, ne pashiishe mùvwàye mwa kufika ku difwishiibwa dya bundu, ne mùvwàbo mwa kumutwila mate kùdì bantu bèndè yèyè mwine; ne ufwishibwa bundu, mwowibwe mutu mwela panshi ne mikolo myela muulu, ne yèyè ne mukaji wa ndumba uvwayè ùsòmba nendè awu, mu mùsèèsù. Mushindu wùvwà Amerike ayi ne cya kulwangana mvita ne Allemagne, mùvwàbo mwa kudya mutuutu wa kalum'a mutuutu mu mwaba wùvwàbo bàbìikila, lumbu lunene lùvwà mwa kwikalaku lwibaka ne cimanu cya nshaamenda kuntwaku, ngeela meeji ne bàtu bàlùbìikila ne Lumbu lwa Siegfried. Kadi kùdì lùdì lùbìikidiibwà ne Maginot, ngeela meeji ne lwòlò alu lùvwà lwa ba-Français. Bivwa nanku anyi? Kadi Lumbu lwa Siegfried lwòlò lùvwà lumbu lwa beena Allemagne. Nenku Mukalenge kumpaye bwa kumona cyòci aci, bidimu dikumi ne cimwe kumpala kwa kwibakiibwalu. Ne bòbò biine kabàvwakù bìitaba ne bàvwakù bàdya mutuutu kwòkò aku to, biine beena Amerike abu, too ne mwàkalwàbo kupwekesha cilwilo ne màyi pamwe ne cyònsò. Pààkabwelàbo muntwamu, beena Allemagne bàkaavwa ne bingoma byabo bimana kuludikila anu pa cisumbu cya mazuwa a mvita aci, nenku kubalekelabo bàbwelamù buludi, kadi ki kwamba kubatukijabo bônsò. Nenku mèmè nkààvwa mumone cyòci aci, bidimu dikumi ne cimwe kumpala mene kwa—kwa cishimikidi kampanda cya lwine lumbu alu kuteekiibwaci, anyi nî ncinyi cyònsò, Lumbu lwa Siegfried lwine alu. Ne bikwabo bintu byônsò ebi, bu mùdì mashinyi ne tudyendelandela, ne—ne mùdì byônsò bilwè kwikala anu pyòpyopyò cìvwàYe mwambe, too ne mùdì muntu

mukaji ùkòòkesha ditunga edi, mwikàle, pàmwăpa, mwikàle ekeleeziya. Ne pashiishe nshiikidilu kulwaye.

⁷⁵ Mpindyewu tudi tusangana ne mu ciine eci, cintu cyônsò eci ne mûndi mutonokele bulongolodi, kí ncintu cya cikemesha anyi mùdì paapà wa ku Loomo muumuke ku Loomo bwa musangu wendè wa madyatambalà bwa kwalukila ku Yelusalema anyi? Ne mu kwenza kwa ciine eci. . . Yelusalema mmumanyìibwe ne ki ekeleeziya wa kale ne kalèlèlè bwa buloba bujima.

⁷⁶ Pààkatuutakeenà Melèkìsèdèkè ne Abraham pàvwàye ùfùma ku dishebeya dya bamfumu apu, Yèyè's ùvwa Mfumu wa Yelusalema, Mwakwidi, uvwa Kilisto awu, ùvwa n'Nzambi; muntu mukwabo nansha umwe kàvwakù mwa kwikala Melèkìsèdèkè to pa kuumusha Kilisto Yèyè mwine, Nzambi Yèyè mwine's we, eyowa, nwamonu's, Nzambi Yèyè mwine, bwalu yèyè nguwwa kàyi ne taatù kàyi ne maamù. Nwamonu anyi? Yesu ùvwa naabo bônsò taatù ne maamù, nwamonu's. Pa nanku ewu Muntu kàvwa ne taatù, kàvwa ne maamù, kàvwa ne cibangidilu cya matuku anyi ndekeelu wa mwoyi nansha. Nenku nansha Yèyè mwikàle nganyi, Yèyè ùcidi anu ne mwoyi. Ne Yèyè ùvwa Mfumu mu ciine cikondo aci, wa *Salètà*, ku dyumvwija mwikàle ne: "Mfumu wa Ditalala, Shalom." Mfumu wa Yelusalema, uvwa mutuutakeene ne Abraham ne mumupeeshe mvinyo ne dyâmpà awu, meesa a Mukalenge, paanyima pàà mvita. Cimfwànyi cilenga cya dikema cìdì cìsanganyìibwà mwaba awu mu nshapita wa 7 wa Ebelu, mutùdì tucisangana. Mpindyewu, kumupeeschaye dyâmpà ne mvinyo paanyima pàà mvita mimane kujika. Bu mùvwàYe. . .

⁷⁷ Aci ki cintu cya kumpala citwàngatà paanyima pàà bamane kubwela mu Bukalenge Bupyabupya, netucidye cyakabidi pamwe Nendè mu Bukalenge bwa Taatù, dyâmpà ne mvinyo. "Neyakunwa kabidi mamuma a mucu wa mvinyo, anyi kudya dyâmpà to, too ne pàNgààcìdya neenu, cyakabidi, mu Bukalenge bwa Taatù, ne mu dituku adi."

⁷⁸ Mpindyewu, mpindyewu patùdì tusangana ne paanyima pàà Mfumu Shalom mwikàle mu. . . mufume ku cimenga aci, dîbà adi ki pààkangatà twitabàayi bukantononyi bwàcì, pashiishe. Ne cìkaadi anu twitabàayi dîbà dyônsò, kadi cìdì cìleeja mpala wa ekeleeziya wa kale awu. Ne twètù tudi bayiile mu Dipungila Dipyadipya, kanupangi kuumvwa eci to, mu Dipungila Dipyadipya ne twètù katwena bàà eci cimenga cya Yelusalema to, pa buloba, kadi tudi bàà mu Yelusalema Mupyamupya, wa kuulu. Pa nanku eci cìdì ne cya kwikala ngondo, Yelusalema, kadi kàyi Yelusalema Mupyamupya, wa kuulu awu to. Pa nanku ngondo ùdì ùleeja mpala wa ekeleeziya, wa pa buloba.

⁷⁹ Nenku kabyenaku bikemesha anyi pàdìbi ne anu kumpala menemene kwa paapà kwasaye lwendu bwa kuya ku Yelusalema,

ngondo mu mau lu mmupete difiikishiibwa dya fitutu, anu matuku makese menemene pabwipi ne kwasaye lwendu alu, lwendu lwèndè alu. Yèyè's nealwe kabidi ne muneemu, nudi bamanye's, nwamonu's. Mpindyewu kacyakacya aci kacitu cimanyiibweku to, nwamonu's. Kadi cidi cileeja cinyi? Ne, eci, yèyè ùdi wènza cyôci eci bwa kupetaye bwobumwe bu mwàkabùpetàye dituku dya paanyima pàà mumane kubwela mu Yelusalema, dyàkatwilanganàye ne balombodi bàà ba-Orthodoxes bàà cyena Ngelika. Ne ciine aci cidi cileeja cinyi? Bwobumwe, bàdi bàkeba bwa beena Mishònyì ne bwena Katolike bìdisangè, cidìbo munkaci mwa kwenza ne nebàcyènzè anu cyònsò mu kaabujima. Nenku Nzambi mmutuleeje cyôci eci, mu ngondo, cya difiikishiibwa dya fitutu aci. Ku luse Lwèndè ne ngàsà . . .

⁸⁰ Kùdikù muntu kampanda wa kunùdi aku mumone cibejibeji aci mwaba wùdibo bakwate maafòtò a ngondo awu anyi? Ndi mèmè naaci kaaba aka. Cyôci kaciyi cimfwànyì cipwangane to, ciikàlè cishiya cikondo cya mwandamutekete ku luseke cidi kaciyi cyanji kwikalaku eci, anu menemene mushindu wùmvwà muzole ku Nyuma Mwìmpè awu, Bikondo bya Ekeleeziya. Ki bisambombo bya kùdibi mbyòbi abi, cya mwandamutekete kì ncyanji kujika to. Ngiiikàdilù yisambombo ya ngondo, mushindu wùdi mu dibalakana dyèndè mu cikondo cya kumpala cya ekeleeziya; ciikàlè midimà mu ciibìdi, mu ciisàtù, mu ciinàyi, mu ciitànù, ne mu ciisambombo; anu menemene mushindu wùvwà Nyuma Mwìmpè mubinzoleje ku cibasa cya difundila awu, ne pashiishe kubifwanyikija ne Yèyè mwine ku cimano cya tabernacle, kùkaadi bidimu bibidi. Ngondo ùdi ùdileeja yèyè mwine, ne maalu a mamanya àdi àkwàta cyakabidi fòtò wa, Bikondo bya Ekeleeziya, anu mushindu wùvwàbo bakwate Bukènkè abu fòtò kuntu kwaka ne bacipatule mu Cikandakanda cya Life, cya dikangula dya Bitampi, cya dibuulula mu cikondo cya mwanjelo wa mwandamutekete. Mu matuku a mudimu wèndè wa bwambi, musanjeela wa mwandamutekete, maalu masokoka a Nzambi, bu mùvwàbi ne maalu masokoka ónsò àvwà munda mwa bikondo awu, àvwa ne cya kubuuludiibwa, kumwenshiibwa, bìvwa bìkèngela bwa kwenzekabi mu ciine cikondo aci. Ne Yèyè mmucyènzè! Méyi Èndè kaena apangilaku to. Aci kì ncintu cidi kaciyi cyumvwika anyi? Nzambi ùzòla mu mau lu cintu anu cyôci cimwecimwe civwàbo balame aci, cidi Nzambi umwèumwè awu munzoleje ku cibasa cya kufundila aci, ne pashiishe kùdi Yèyè mwine. Ayi mmisangu yisatu yidiYe mucimanyishe anu menemene, ne ciine aci pabwipi menemene ne paapà kubwelaye ku Yelusalema.

⁸¹ Nenku, aci civwa ng'ekeleeziya, ngondo ng'ekeleeziya, ùdi ùleeja mpala wa ekeleeziya. Ne kumpala kwa ekeleeziya, mundidimbi wa buloba wùdi wùkòsolwela pa ngondo. Ne mundidimbi wa bwena tusumbu twa pa buloba, mundidimbi

wa ngiikàdilù wa maalu a pa buloba, ekeleeziya wa ngiikàdilù wa maalu a pa buloba, mmutangalake eku ne eku mu mushindu wa kufiikisha Bukênkè bwònsò nkòòng bwa Bible. Maalu a pa buloba mmabwele mu Bukênkè bwa mingìdingìdì. Nudi nuumvwa anyì? Buloba mbukosolwele mu bukênkè bwa ngondo, kadi kufofomija dîbà. Nenku mingìdingìdì ya ngondo yidì ne cya kwikala yifila bukênkè pa buloba ayi, yìvwa mifiikishiibwe fitutu. Nenku Cyôci kubwela e kuzola bimfwànyì abi menemene anu mùvwàCi cyambe, ku disonsodiibwa, kumpala kwa kwenzekaci.

⁸² Mpindyewu aci, ngeela meeji, Mwaneetu wa bakaji Simpson, cìvwa ncibejibeji cya ku Tucson. Ncyèna mumanye Mwaneetu wa bakaji Simpson ní ùvwa mumanye. . . Yèyè kàvwa mucyùmvwè dîbà adi to. Kwambaye ne: “Ndi mukukosele ndambu wa maafòtò, ne ndambu wa maalu mafunda, mu cibejibeji aci,” kubimpeeshaye mu cyanza.

⁸³ Ki mèmè kwela meeji ku cintu kampanda cya cikemesha’s. Mèmè kubwelamu ne kucyambula, ne kucitangila, mèmè kwamba ne: “S’ki cyôci aci, anu menemene, nwamonu’s, anu menemene cìmvwà munkaci mwa kukeba aci.” Nenku’s ki cyôci cìvwà mu cibejibeji aci.

⁸⁴ Mwaneetu wa bakaji Simpson mmufwànyìne kunwambila ne mmu cibejibeji kaayi mùdici cisanganyibwa, panwikalà baswe kupeta pèènù cya bwena cyôci aci. [Mwaneetu wa bakaji Simpson ùdi wàmba ne: “Ncya mu matuku 28 a ngondo wa dikumi ne mwibîdì.”—Muf.] Nenku—nenku wamba ne? [“Ncifunda mu diloolo dya mu matuku 28 a ngondo wa dikumi ne mwibîdì.”] Cifunda mu diloolo dya matuku 28 a ngondo wa dikumi ne mwibîdì.

⁸⁵ Nwamonu’s, kumpala kwa kuyaye ku Yelusalema bwa kufiikisha Bukênkè bwaci, anyì kufiikisha mpungà mwine ùdici nendè awu. Cikondo mene, ne mwaba, ne makenji miine àdiCi naawu bwa kukenkesha, mpindyewu cidì cìBùkòsa bwònsò nkòòng, bwa cikondo cya ndekeelu, cikondo cya mwandamutekete cya ekeleeziya mùdiye ùbwela mu mîdimà. Cintu cinène kaayi cidì Mukalenge munkaci mwa kutwambila’s we. Mu maalu ònsò, kacya kaCitukù cyanji kupangila to kadi Nzambi mu dyulu mmucimanyishe patooke ne mucyàmbè, mutùvwà bacìndile, nenku nyewu mucimanyishe ne mucishindike ne, m’Bulelela bwa kabùyi dyela mpatà to.

⁸⁶ Mîdimà, Cikondo cya Ekeleeziya wa Laodikiya eci. Mpindyewu pàvwà Yesu, udi Dìyì awu, mu Cikondo cya Ekeleeziya wa Laodikiya ùsanganyibwa pambelu pàà ekeleeziya, munkaci mwa kukookola ku ciibi apu, ùkèba bwa kubwela. Mîdimà, mîdimà ya mupimbu pa cisàmbà eci. Bible ùvwa mwambilemu anyì?

⁸⁷ Bupwangane bwa Mifundu, butumbi bwa Dîna Dyèndè dinene. Dilwa kukumbula dya paapa adi divwa ncimanyinu cya maekeleeziya miikàle àfikisha fitutu Bukênkè bwèndè búvwa bumweneshiibwe. . . Bukênkè bumweneshiibwe bwa bàà pa buloba búvwa m'Bible. Yesu wákamba ne Yèyè nguvwa Bukênkè bwa bàà pa buloba. Bible mmwambe ne Yèyè ùdi Dîyì. Ne Mufundu mumwènèshiibwe, anyi mushindikiiibwe, ùdi Bukênkè. Mpindyewu kanwakupeshiibwa dyanyisha dya kucyenza to piikalà cyôci eci cyangàte bukontononyi. Ne twètù tukàadi bacimone cidyànjila kuleeja mu cimfwànyì, cyamba ku disonsodiibwa kumpala kwa kwenzekaci; cidyànjila kuleeja mu cimfwànyì kùdi ngondo, ne cicileeja cyènzeka, kadi's ki cyôci eci munkaci mwa kwenzeka.

⁸⁸ Dìbà ndyedi dyätwákànyinyì neenu, mîdimà, mîdimà ya mupimbu. Mîdimà ya mupimbu pa bantu mpindyewu, ki cìdiku ncyôci aci. Biine byônsò abi bìdi byumvwija cinyi? Tudi biimànyine penyi? Mmu dìbà kaayi mutukaadi emu? Tukàadi pabwipi ne Dilwa mu mushindu kaayi? Ee, wèwè nyawu udi wamba ne: "Piikalà bônsò bapete ditabuluja."

⁸⁹ "Kanuciinyi to, nwènù kasumbu kakese kàà mikooko, mbudiswilè bwa Taatù wenu bwa kunupeesha Bukalenge." Eyo.

⁹⁰ Cidi cyumvwija cinyi? Nzambi wàbangì kutapulula Bukênkè ne mîdimà, nwamonu's, wènda ùyisàka paanyima, mwàkenzàYe ku cibangidilu amu, bwa kuleeja dicya dya dituku dipyadiya. Bikondo bya Ekeleeziya bìdi munkaci mwa kwenda kujimina. [Mwaneetu Branham udi ùkèkemenà—Muf.] (Mfwilaayiku luse.) Bikondo bya Ekeleeziya bìdi munkaci mwa kwenda kujimina. Nzambi ùdi munkaci mwa kusaka mîdimà ùyibweja mu mwaba kampanda, bikèngela yènzè nanku, bwa kujimija malongolodi a ekeleeziya, kujimija maalu a pa buloba. Maalu a pa buloba àdi munkaci mwa kubwikila cintu ciine, ne ngiikàdilù ya maalu a pa buloba mmyangate cintu cyônsò nkòong. Dìbà adi Nzambi kî mmubinge anyi? Ku bintu bya ngiikàdilù ya pa buloba, ne mvwàdilù wa pa buloba, ne ngenzèlù wa maalu wa pa buloba, ne nsòmbelu wa pa buloba, s'mmaalu a pa buloba!

⁹¹ Kanwena bàà pa buloba to, nwènù bàna bakese. Nudi bàà ku Dyulu. Panwapa kî n'Kwenu to.

⁹² Bwa cinyi mùvwàbi mwa kukengela bwa mèmè kutangila, twètù bantu bakole aba, bwa twètù kukeba bwa kutangila paanyima bwa kushàala cyakabidi bàna batekete? Katwena mwa kwenza aci to. Kadi tudi tutangila kumpala, katùyi tutangila paanyima to. Biikàle tutangila apa, ku cikaadiku, ne tudi baswe kumanya ciikalàku aci. Nenku tudi bindile dyôdi dìbà adi, biikàle tukolesha batangile kumpala bwa dyôdi adi.

⁹³ Bantu bààbùngì menemene bîmpè ne bàà meeji matooke leelu wa Ndaaya ewu, mbakwaciibwe mu twitabàayi eyi, mu ekeleeziya eyi ne malongolodi aa, "biikàle ne cimwenekelu cya

difwana dya Nzambi, kadi biikàle bàvila Bukole bwàdi,” mùdi Timote Mwibìdi, nshapita mwi3, wàmba mushindu awu.

⁹⁴ Mîdimà ya mupimbu, difofomijiibwa dya Izaleela, cìvwa mbwà dikenkeshiibwa dya bàà Bisamba bya bendè. Mpindyewu difofomijiibwa dya bàà Bisamba bya bendè ndikenkeshiibwa dya Izaleela. Bidi anu mùdi mundaamuunya ne bufuku; luseke lumwepele lwikàle ne mîdimà, luseke lukwabo lwikàle ne bukênkè; ne pashiishe bukênkè bùlwa luseke lukwabo alu. Pa nanku ngo—ngondo pàdiye ùpita mwàpìciyè emu apu, ne didileeja dya mu cimfwànyì dya mîdimà ya buloba diikàle difofomija bukênkè bwa buloba, ndidileeja dya mu cimfwànyì kutùdi ne cikondo cya ekeleeziya wa bàà Bisamba bya bendè cyajiki. Ekeleeziya ùdi munkaci mwa kudilongolola, ùdi ùdilongolola kùkaadi cikondo kampana, dìbà dyàkànyì bwa Dyambwibwa. Bwalu mîdimà yìkaadi yènda yìjìmina pa bàà Bisamba bya bendè, ne abidi àdi panshi aa kabundubundu nekalwe pa beena Yuda. Dìbà ndyenze lwendu kuumukila ku Esete too ne ku Wesete, ne twètù tudi tusanganyibwa ku Côte Ouest. Bukênkè bùdi mwa kwenza cintu anu cimwepele, kwalukila ku Esete, ku luseke lukwabo kwaka. S’nudi bumvwe, kí mmwômò anyi? Bukênkè bùdi mwa kwalukila cyakabidi anu ku Esete, kùvwàbu bubangìle aku, Izaleela. Nzambi wàkabàfofomija mbwà cikondo kampana, kadi mî—mîdimà mpindyewu yìkaadi misakiibwe pa bàà Bisamba bya bendè mikabwikile pa cintu cyònsò mu kaabujima. Bàà Bisamba bya bendè ne badyatakaje Yelusalema ku makàsà too ne pààjikà cipungu cya bàà Bisamba bya bendè. Yesu ngwàkamba nanku. Nanku patùdi twakulangana apa ncijike, mîdimà ya mupimbu pa bantu! Nzambi ùcileejila mu maulu, mùdiYe mucileejile pa buloba kumpala kwa cyònsò kwenzekaci amu. Ki mwômò mutukaadi emu.

⁹⁵ Bantu bìmpè bakwacike mu cintu eci, bantu bìmpè, bantu bàà meeji matooke. Byenze bu Mariya ne Yozefu, bàvwa ne meeji matooke a menemene, nwamonu’s, beela meeji ne Yèyè ùvwa naabo, Pèndè kàyì naabo to. Mariya ne Yozefu, nudi bamanye’s, pàakayàbo ku difesto adi apu, Yesu, ne bidimu dikumi ne bibidi, bàvwa beela meeji, badicinkila’s, ne Yèyè ùvwa naabo, kadi Pèndè kàyì naabo to. Bantu bìmpè leelu ewu bàdi badyambidila cintu cimwecimwe aci, bôbò, bantu bàdi badyènzè bulongolodi mu Nsangilu wa Maekeleeziya ewu aba, bantu bàdi mu malongolodi aa aba, s’badi—badi badyambidila mùdìbo munkaci mwa kwenza cintu cìmpè. Bàdi bàdicinkila ne Yèyè ùdi naabo, pààbò kabàyi Nèndè to. Nwamonu’s, bantu bààbùngì bàdi badyàmbidila ne Yèyè ùvwa naabo pàvwàbo bàlabula bayiishi ku cyanza ne bàfùndisha mènà abo mu mukanda apu, kadi Pèndè kàyì naabo to. Bantu bààbùngì bàvwa badyàmbidila, pàakabàmyaminàbo màyi apu, pàakangatàbo kòmfirmasiyò, pàakabàtijiibwàbo mu dìnà dya “Taatu, Mwànà,

Nyuma Mwîmpè” apu, bàvwa beela meeji ne Yêyè ùvwa naabo. S’mbantu anu beetu bàà bîmpè aba. Mariya ne Yozefu’s bàvwa bantu bîmpè. Kadi bwalu bùvwa ne, Yêyè kàvwapù to! Kanwîkadi nudicinkila cintu to.

⁹⁶ Bukênkè ncinyi? Dîyî dyakula dya Nzambi, dishindika! Kakùyi aci to, kakwenaku Bukênkè nansha. Nwamonu anyi? Kanwenaku mwa kukenkesha buloba ne myëndù ya tooloshi to. Bidi bikèngela Dîyî dya Nzambi didi dimwènèshiibwe, Mwânà awu.

⁹⁷ Bàvwa bantu bîmpè. Monaayi ndudi yìdì naayi Dîyî Dyèndè, mùdiDi dipwangane. Nukààvwakù bamone cyàkambà Mariya aci anyi? Mpindyewu nwènù beena Katolike bananga, ncyèna neenu cilumbu to. Ncyèna neenu cilumbu to. Bwalu bùdi kùdì ndongolwelu unudi nusanganyibwamu awu. Ne nwènù beena Mishòonyi, bya mwomumwe. Ndongolwelu ayi nyidi ne bwalu!

⁹⁸ “Mariya, maamù wa Mvidi Mukulu”? Kusangana ne, Mwânà wa balume wa bidimu dikumi ne bibidi, mwanèndè mulela’s, byakakengela bwa amulongolole yêyè. Kakwena musangu nansha wumwe mu Bible wùkadìku Yesu mubiikile Mariya bu “maamù” Wendè to. Kàvwa mamw’Èndè to. Mmuniyì mùvwàye mufwànyine kwikala mamwèndè wa Nzambi? Yêyè’s ùvwa anu difu dyàkawkàtâYe naadi mudimu bwa kuvwilamu pa buloba, bwa kumweneshiibwa pa buloba, kupicila ku difu adi. Kakwena cyèndè pèndè nansha cimwe mwaba awu to, kakwena Mufundu nansha wumwe wùkadìku mwambe ne “maamù” to.

⁹⁹ Anji monaayi mùdì Mariya awu mu ntùpàkànyì ya dikema, kadi Dîyî Dyèndè ndipwangane pwàngànèè. Yêyè wàkaMwambila pàvwà... KuMusanganaye mu ntempelu, mu bidimu dikumi ne bibidi, ukokangana ne beena teoloji abu. KubakemeshaYe bikole, bu Mwânà wa balume wa bidimu dikumi ne bibidi; kàyi nansha mu kalaasa to, anyi, bu mwikalemu, katwenaku ne mulubu wa cyòci aci nansha wumwe to. Kadi Mwânà wa balume mutekete wa bidimu dikumi ne bibidi ùbwejakaja beena—beena lungenyi abu mu ntempelu, ku lungenyi Lwèndè Yêyè. Maamù awu kwambaye ne: “Mémè ne tatw’Èbè tudi baKukebe ne binsonji.” “Tatw’Èbè!” Maamù awu yêyè mwine, mwine uvwa ne cya kwikala maamù awu’s, ùjuuka n’á ne: “Mémè ne tatw’Èbè Yozefu tudi baKukebe ne binsonji.”

¹⁰⁰ CyàkamwambilàYe Yêyè ncinyi? “Kanwena bamanye ne Ndi ne cya kwikala mudifile ku maalu a Taatù Wanyì anyi?” Bu byòbì ne maalu àvwàYe mudifile àvwa ngàà Yozefu, nunku Yêyè’s ùvwa mwa kwikala munkaci mwa wenda wibaka nzubu, anyi mu ditanda dya mukoonyi wa mabaya. Kadi Yêyè kàvwa mwânà wa Yozefu to. “Ndi mudifile ku maalu a Taatù Wanyì,” ndongolola mangumba ne twitabàayi ne bikwabo byònsò binkaadiku muumvwe bamba ebi’s. Nwamonu anyi? “Ndi mudifile ku maalu

a Taatù Wanyì.” Yèyè kaakiitabaku ne Yozefu ùvwa tatw’Èndè to. Kadi Mariya yèyè ùvwa mwitabe nanku, kadi Yèyè kukùdimuka e kumulongololaYe.

Yèyè wàkamba ne: “Mémè ne tatw’Èbè tudi baKukebee.”

¹⁰¹ Yèyè ne: “Ndi mudifile ku maalu a Taatù Wanyì,” ùleēja ne kî n’Yozefu awu uvwa tatw’Èndè to. Mèyì Èndè mmapwangané, nwamonu’s.

¹⁰² Kadi Mariya ne bakwabo abu, badicinkila anu cyôci aci. Ee, monaayi civwà bwalu abu, yèyè ùvwa mwangacike ku nkwaka. Yèyè—yèyè ùvwa ne... Yèyè ùvwa muswe kuleeja kumpala kwa baakwidi ne bakwabo aba ne—ne—ne yèyè kàvwa mukaji wa mushindu awu to. Nanku yèyè, mu kwenza kwa nanku awu, kakùyì mpatà to yèyè wakasunsula cishimikidi ciine civwà bujaadiki bwèndè bushindameene aci, paanyima pàà yèyè mumane kufila bujaadiki bwa ne Mwanjelo ngwàkalwa kùdiye ne: “Ne mmwambe ne: ‘Wèwè newimite difu ne neulele Mwànà wa balume,’ ncìyì mumanyangane ne mulume nansha umwe to, Mwànà wa balume mulela kùdi virgo.” Kadi apa kumpala kwa Cilumbulwidi cinènè cya beena Yuda aci, ùjuuka n’ă ne: “Yozefu, tatw’Èbè ewu, ne mémè, tudi baKukebee.”

¹⁰³ Kadi ki Mwànà wa balume wa mvula dikumi ne yibidi awu kwambaYe ne: “Ndi mudifile ku maalu a Taatù Wanyì.” KumutandishaYe ne: “*Awu kî n’Taatù Wanyì to!*”

¹⁰⁴ Monaayi ekeleeziya leelu ewu, mwangacike ku nkwaka wa nsangilu ne—ne bintu bya pa buloba abi, mpindyewu ùkaadi mufiikishiibwe fitutu. Nzambi’s ùdi ùmutàndisha!

¹⁰⁵ Kacya Yesu kàvwakù mumubiikile ne “maamù” to. Dituku kampanda kulwaye bwa kuMumwenekela ku masangisha Èndè, mu nzubu wa mushindu kampanda bu mùdi ewu nunku. Muntu kampanda kulwaye, kwambaye ne: “Pambelu pààpa, mamw’Èbè ne bânà Beenu’s nyawu baKwindile.”

¹⁰⁶ Yèyè ne: “Maamù Wanyì nganyì, bânà Beetu mbanganyì? Mbanganyì?” Ùtùma mèsù ùtàngila bayiidi Bèndè, kwambaYe ne: “Aba bàdi bènza diswa dya Taatù Wanyì abu, kî maamù Wanyì, mwan’Eetu wa balume, mwan’Eetu wa bakaji, ne bikwabo. Kî bóbò abu.”

¹⁰⁷ Kadi ku nkuruse, pàkaavwàYe ùpùnga ne lufu, kwambilaYe Yone, muyiidi mutekete awu, Yèyè ne: “Mona mamwèbè.” “Mukaji, mona mwaneebe wa balume.” “Mwànà wa balume, mona mamwèbè.” Nwamonu’s, kacyakacya, kaakambaku nanku Bwèndè Yèyè mwine to. Kàvwa Mwanèndè yèyè to. Ùvwa m’Mwànà wa Nzambi. Mukaji awu ùvwa anu ndifu cyanàànà.

¹⁰⁸ Ewu nnzubu mu dinda emu, kadi kî ng’Ekeleeziya awu to. Ekeleeziya awu udi munda mwenu amu, Kilisto. Nyuma ya bàà cifwaka bàdi basòmbe kaaba aka eyi, midisangishe mu myaba ya mu dyulu. N’Kilisto, kî nnzubu ewu to. Nzubu

mbîmpè, ùdi ùkumbaja kèndè kiipacila, kadi mwangaciibwe pèndè anu bu mwaba wa kudisangishila cyanààna. Mariya ùvwa anu difu cyanààna dyakangataYe bwa kuvwilamu pa buloba, bwa kuDimanyisha munkaci mwa bantu. Kàyi “maamù wa Mvidi Mukulu” to, anu mùdibi ne nzubu ewu kí ng'Ekeleeziya wa Nzambi to. Mmwangaciibwe pèndè nanku cyanààna.

¹⁰⁹ Eyowa, balunda bààbúngi batu beela meeji mpindyewu, bantu's, bantu bîmpè bu mùvwà Mariya ne Yozefu amu, bàtu beela meeji ne—ne Yèyè ùdi naabo mu kwenza kwa ciine eci. Kadi anu mwakadibo bôbò musangu awu amu, ki mùdibo pààbò mpindyewu, batupakane. Bôbò bààkeela meeji ne bàvwa Nendè, kadi kabàyi Nendè to. Kadi pààkabàtíijibwàbò, bantu bàvwa bafwànyine kwikala badyàmbidile ne: “Kaa, mèmè—mèmè ngàkaMupeta pàngààkaMwitabà ne pàngààkabàtíijibwà apu.” Kabyena nanku nansha. Ntoo ne pàdì Dìyi kampanda dyakula didileeja!

¹¹⁰ Kadi, Basungula wa yààyà, nudi nwamba bishi bwa Bukènkè mpindyewu? Ngàkùlù byàbúngi be pa bìdì bitàngilà mîdimà, ne nyewu nkàadi mwangate ne cyabibidi cimwe cya dîbà dyanyi diine, dîbà dikumi ne dimwe ne tusunsa makumi asatu. Mpindyewu twànji tucikùdimunaayi; mîdimà ya mupimbu yìdi pa bantu, kadi mpindyewu bishi bwa Bukènkè? Yèyè wákamba ne mîdimà ya mupimbu neyìikalè pa bantu, kadi's nekwikalè Bukènkè: “Juuka panshi, ne kenka, bwalu Bukènkè bwàlu.” Mmuni mùdiku mwa kwikala mîdimà ne Bukènkè, bìdì bikèngela bitapulululà. Kadi kùdi cintu anu cimwepele cidi cibitapululà, Dìyi dimwènèshìibwe, ki cidi citàpululà, Didi dîyisàka too ne ku luseke lukwabo lwa. . . Mîdimà *nyôyi eyi* pa buloba, kadi pàdì Dìyi dya Nzambi dimwènèshìibwe, dîbà, diine dyàkabìikidiibwà bwa kwikalaku ku Dìyi adi, didileeja, mîdimà yìdi yinyeema yìya ku luseke lukwabo. Nenku ki cidi munkaci mwa kwenzeka mpindyewu ncyôci aci, mîdimà miikàle yiditapulula ne Bukènkè. Mpindyewu kùdi Ekeleeziya musungula mu dîbà dya mîdimà edi. . . Bwalu, tudi bafwànyine kushààla pa cyôci aci munda mwa mêmè, kadi ndi ngeela meeji ne ndi mwakule bikumbane mu mushindu wa ne nudi bumvwe cidi—cidi Mifundu yumvwija, pândì mwambe ne “mîdimà ya mupimbu pa cisambà eci” apu.

¹¹¹ Mpindyewu nyawu ngambila Ekeleeziya ne: “Shalom. Ditalala dya Nzambi.” Ditalala! Mwena Ebelu mulelela yònsò, pàdìye utuutakeena ne mukwabo: “Shalom.” Mu ngaakwilu mukwabo ne: “Dinda dilenga! Nzambi ìkalè neebe! Ditalala dya Nzambi dikushindikije!” Ndyelangana dya mwoyi dya ne “Dinda dilenga! Wetwawu!” Ndituku diikàle dibanga, Ekeleeziya. Mmîdimà pa bantu, kadi cidi “Dinda dilenga” kùdi Ekeleeziya. Kilisto ngudi umweneka munkaci mwetu. “Shalom. Ditalala.” Aleluuyah! “Shalom.”

112 Patùdì tumona mîdimà yíkila, mîdimà anu kumpala kwa dituku menemene, tudì tumanya ne mutooto wa mu dinda mmulembelele kwaka bwa kuleeja ku bantu dîbà didì dyènda dilwa adi. Cìdi, apu mpàdì mutooto wa mu dinda wùkenkesha. Cìdi—cìdi—cìdi nntanta wa dîbà wa pankaci pàà bibidi abi. Kuulu kutu misangu yònsò anu mîdimà mitambidile mu tusunsa tukese cyanàànà kumpala kwa dituku, difiikishiibwa dya ngondo dilwa, ngondo upanga mwa kukenkesha. Mîdimà ya menemene kumpala kwa dituku, mbwalu bukênkè bùdì bwènda bùsàka mîdimà. Kadi mutooto wa mu dinda wùdì wùlwa wàmba ne: “Dinda dilenga. Shalom.”

113 N'Yèyè awu munkaci mwetu, Dìyì Dyèndè munkaci mwa kumanyishiibwa. Shalom. Dituku dinene dikaadi pabwîpi ne kumweneka, pàdi dinda dimweneka dya Cyendèlèlèlè, dya dibàlakana ne dilenga kumona, pààdìsangishà basungula Bèndè ku nzubu wabo dyamwamwa dya dyulu. Pààbiikilàbo mènà kuulu kwaka, mèmè nèngìikalèku. Mènà etu àdi àsanganyiibwa mu Mukanda Wèndè, twètù netwìkalèku. “Shalom. Dinda dilenga. Ditalala kunùdì.”

114 Mîdimà yìdì munkaci mwa kutapuluka ne Bukênkè. Nzambi ngudi munkaci mwa kucyenzeja awu, Bukênkè mbùdì munkaci mwa kucyenza abu. Nwamonu's, Bukênkè bùdì munkaci mwa kuDìsàka mu mushindu wa ne mîdimà yìdì ne cya kudikungwija kaaba kamwe. Mmipete mpùngà wa kuCiitaba kadi kayiyi miswe kwitaba to, pa nanku mmidikungwije kaaba kamwe. Ne bôbò bàdi bacyenza mu kusanga kwa maekeleeziya pamwe, ne Nsangilu wa Maekeleeziya, ne bamusanga ne mîdimà ya cimpangaanu. Kadi paabo's bàdi bàbèngangana bikole ewu ne ewu, kadi nansha nanku bivwa bikèngela anu bwa kwendabo pamwe bwa kufikishabo bufuku ku dilwa pa bantu.

115 Yeshààyì 60.1 ùdì wàmba ne: “Juuka panshi, ne kenka, bwalu Bukênkè bwafiki kùdì.”

116 Juukààyì panshi, nùkenkè, Bukênkè bwafiki. Dìyì, Bukênkè, nyewu bishindikiibwe cyakabidi. Bukênkè mbushindikiibwe cyakabidi, Dìyì dya Nzambi, bwa nupete mwa kumona Nzambi mumweneshiibwe mu mulayi Wèndè wa Bukênkè bwa dituku, anyì Dìyì dipèèsha cikondo eci, nwamonu's, milayi yìdì mifidiibwe bwa dituku edi eyi, milayi yàkambiibwà kùdì baprofeta eyi, ne kùdì Yesu Yèyè mwine. Mu dituku edi! “Nzambi, mu bikondo bya kale. . .” Ebelu 1: “Nzambi, mu cikondo cya kale, mu mishindu mishiileshilangane, wàkaakwila ne baataatù bààbò ku baprofeta, kadi mu dituku dya ndekeelu edi ku Mwan'Èndè, Yesu Kìlìsto.” Nwamonu anyì?

117 Bukênkè bunene bùvwà bulembelele mu cipeela bwàkenzà ne, Mòsà alekele Ejipitu abu, ùbala bundu bwa Kìlìsto bu mabanji manene matambe a Ejipitu.

118 Yèyè umwèumwè wákatuutakeena ne Shawula mu njila wa ku Damaseke awu. Bukênkè bunene bwakalembelera kumpala kwèndè, Bukênkè bumwebumwe abu, Dikunji dya Kapyra dimwedimwe adi. Shawùlà, mwikàle mwena Ebelu, kàvwakù mufwànyine kukuukwila nyuma kanà yònsò ewu anyi ní ncinyi ní ncinyi to, anyi kucibiikila ne “Mukalenge” to, mu mushindu wùvwàye yèyè awu. Yèyè kwamba ne: “Mukalenge, Wèwè udi nganyi?”

119 Yèyè kwamba ne: “Ndi Yesu.” (Yesu mmwambe ne: “Ndi mufume ku Nzambi, ne Ndi nya ku Nzambi.”)

120 Bukênkè bumwebumwe abu mbufike. Bwa kwenza cinyi? Bwa kumwenesha, bwa—bwa kumanyisha kùdi bantu milayi yidiYe mufile bwa dituku edi, Bukênkè bumwènèshìibwe bwa dituku. Mìdimà yàfikishiibu fitutu.

121 PaakalwaYe, Yèyè ùvwa Bukênkè bwa dituku. Kùvwa ne cya kulwa Maasiyà kampanda. Ne Yèyè wàkalwa menemene anu mùvwà Nzambi mwambe ne Yèyè wàkalwa, ùvwa mwa kulwa. Nenku pàakalwàYe, Yèyè ùvwa cinyi? Bukênkè bwa dituku. Ki Bwòbù abu kusaka mìdimà bikole kuMufinakaja! Ncya bushuwa anyi? Bìvwa bikèngela bwa kufilaYe Mwoyi Wèndè bwa Bukênkè abu kutungunukabu, bwa bwamona mwa kukenkesha. Yèyè ùvwa Bukênkè bwa dituku. Kadi bwa cinyi, Yèyè ùvwa Bukênkè bwa dituku bwa cinyi? Yèyè ùvwa Dìyi dishindika òvwà dyakùdiibwe, dimwènèshìibwe. Anu mùdibi ne. . .

122 Nzambi wakamba pa buloba ebu bwa mìdimà, bùdi bufila dibungama, bwa kaabukênkè kàà kaamùnyiiimùnyi, bwa bilembwalembwa bùdi bwimane mwaba ewu kabùyi ne bukênkè ebu, Yèyè kwamba ne: “Bukênkè bwikalèku.” Nenku kakùvwa anu bukênkè to too ne pàakamwèneshiibwà Dìyi adi, ki dîbà adi bukênkè kwikalabu kwòkò.

123 Yèyè kwamba ne: “Nekulwe Musungidi, Maasiyà.” Kacìvwa anu cimwènèshìibwe to too ne pàaluYè kumwenesha mulayi awu. Nenku pàakashindikàYe mulayi awu, Yèyè wàkamba ne: “Kenketaayi Mifundu, bwalu mu Yòyi amu mmunùdi nwela meeji ne nudi ne Mwoyi wa Cyendèlèlè; kadi Yòyi ayi’s ki Yidi yiMfidila bujaadiki.”

124 Bòbò kwamba ne: “Katwena bamanye kùdi Wèwè ewu mufume to, twètù tudi bayiidi bàà Mòsà.”

125 Yèyè kwamba ne: “Bu ne nwènù aba nuvwa bayiidi bàà Mòsà nunku’s nudi baMmanyè Mémè, bwalu Mòsà ngwàkafùnda bwa bwalu Bwànyi.” Nwamonu anyi? Yèyè ki uvwa dimwèneshiibwa diine. Yèyè ki uvwa dishindika dya Dìyi dyakula dya Nzambi kùdi Mòsà.

126 Nenku leelu utùdi ne mwoyi mpindyewu ewu, Nzambi mmumate mu cyalu bwa kushindika ne kujaadika milayi Yèndè. Pa nanku, m’Bukênkè bwa dîbà edi, bwa twamona mwa kajuuka panshi ne kukenka. Bukênkè bukaadi bukenka

cyakabidi pambidi peetu leelu ewu, Dìyì ki kumweneshiibwaDi eku. Didi Bukênkè.

127 Anu mùdì bukênkè bwabwa bwikàle bùkenkesha pambelu pààpa mwamwa, bukênkè bwa dîbà bwabwa, mu dinda emu. N'Dìyì dyakula dya Nzambi, kakwena cikwabo cintu nansha cimwe cìdì mwa kufila bukênkè mushindu wawa to. Kakwena cintu nansha cimwe cìdì mwa kucyenza to. Bukênkè kanà bwònsò bukwatakaja ebu bùdi bùjima anu mu katanci kakese, ne ma-àmpulè ne bikwabo byònsò. Kadi kacya bwabwa naka kabùtu bwòbù mwa bupangilaku to, bwalu bùdi Dìyì dyakula dya Nzambi dimwènèshìibwe.

128 Tututwìtabàayi tunyìitunyì twa cyena mangumba netutaayisha àmpulè, tutuucisha àmpulè dikubakuba, ne tutaayisha kiimanyiki kàà nzembu, ne bikwabo byònsò. Kadi Dìyì dya Nzambi dyòdì kadyadyakupangilaku to! Nedìikalè anuku Dyòdì diine, misangu yònsò, Dìyì.

129 Nkààdi nciina ne nkwèpì kùngààlwà kupicisha ndambu wa dîbà kaaba aka. Anyì, anyì bìdi anu bikumbane bwa kutungunuka bwa kujikija diyiisha edi, ki mmwòmò nansha? Eyo.

130 Juukàayi panshi, nukenke, bwalu Bukênkè bwafiki kunùdi. Dìyì, Bukênkè, mbushindikìibwe.

131 Mushindu wumwepele, bu mùvwà Nzambi amu, Yesu Kilisto ùvwa dimweneshiibwa dya Dìyì dyakula dya Nzambi, Bukênkè bwa dîbà adi.

132 Yone Mubatiji ùvwa Bukênkè bwa dîbà adi. Yèyè ùvwa Bukênkè kumpala kwa Yesu kwikalaYe Bukênkè. Muprofeta Yeshàayi ùvwa mwambe ne: "Dìyì dya ewu udi wela lubila mu cipeela ne, longololaayi njila wa Mukalenge, ne lulamijaayi kajila Kèndè." Aci ncìvwà Dìyì dyakula dya Nzambi, Dìvwa disanganyiibwa mwaba awu, kadiyi dyanji kulwa ku mwoyi to. Maalaki, muprofeta wa ndekeelu awu, bidimu nkama yinaayi kumpala kwa kwenzekaci, wàkamba ne: "Monaayi, Ndi ntuma musanjeela Wanyì kumpala Kwànyì, bwa kulongololaye njila wa Mukalenge." Ki muntu nyèyè ewu ùpàtukila mu cipeela, kàyi ne dingumba to, kàyi ne twìtabàayi to, kàyi ne dimanyishiibwa to. Kadi Bukênkè bwèndè ki bwàkamumanyishà. Dìyì ki dyàkamumanyishà.

Kwambabo ne: "Wèwè ki Maasiyà awu anyi?"

133 Yèyè kwamba ne: "Kì mmèmè to! Kadi mèmè ndi dìyì dya ewu udi wela lubila mu cipeela ne: 'Longololaayi njila wa Mukalenge!'"

134 Yesu wàkamba ne: "Nwènù's nudi bendèle bulelela mu Bukênkè bwèndè." Yèyè ùvwa Bukênkè bukole bwàkateemà bwa katanci kakese. Bwa cinyi? Too ne pàakalwà njila kulongolodiibwa, dîbà adi Bukênkè bwèndè kujimabu.

135 Kanwena mwa kwendela mu *abu* bukênkè to, nwênù ba-Baptistes, *Ebu* ki Bukênkè bwa dîbà edi! Bukênkè mbufike. Juukaayi panshi, nukenke. Dîyi, Bukênkè. Dîyi, Dîyi dya Nzambi dimwênèshìibwe (dimanyìshìibwe) ki dîdi Bukênkè.

136 Mpindyewu bishi bwa cidimu cipyacipywa cìdì kumpala kwetu eci? Tudi bafwànyine kwikala ne bikwabo byàbûngi bya kwamba pa ntanta wa dîbà wa pankaci pàà bibidi ewu, tuumuka ku mîdimà tuya batangile ku Bukênkè, dibweja dya Bukênkè bùdì bûlwa pankaci apu ebw, kadi mpindyewu tudi baswe kuya buludi ku cidimu cipyacipywa. Eyo.

137 Cidimu cipyacipywa, cidimu cipyacipywa, bishi bwa cyôci aci? Cìdì cìtwàdilangana ditekemena dipyadipywa. Tudi baseemene ne cidimu cimwe. Tudi baseemene pabwîpì ne dituku dimwe kutamba mutùvwà makeelela. Tudi baseemene ne dîbà dimwe kutamba pàngàabàngì apu, pàvwàku kushaadile tusunsa dikumi ne tutaanu—dikumi ne tutaanu bwa dîbà dikumi ne umwe apu, nyewu tukààdi dîbà dikumi ne ibidi kushààdile tusunsa dikumi ne tutaanu mpindyewu. Tukààdi baseemene ne dîbà dimwe! Katwena tutangila paanyima to, tudi tutangila kumpala. Nwamonu anyi? Kaa! Eyowa's, mukalenge. Cidimu cipyacipywa kî mbwena kwamba ne kwenza bu udi ubangulula nsòmbelu mupyamupya to. Huh-uh. To.

138 Byenze bu muntu awu mu dinda kampanda; mvwa muumvwe balonda bwalu abu. Muntu kampanda ùvwà mujuuke pa bwebwebwe mupatuke mukangate cibejibeji, mwalukile, ne musòmbèle panshi, mwambule makàsà kadi kuatèeka kuulu pa nkwasu muleepa wa mu cisòmbedi awu, kwasa binete, kubanga kubala cibejibeji aci. Mukàjèndè, mupatuke bwa kulongolola cyakudya cya mu dinda, kwambaye ne: "John, kùdikù bwalu bupyabupya anyi?"

139 Yèyè ne: "Bwālà. Anu cintu cimwecimwe cya kale aci, anu bantu bapyabapya's." Eyowa. Ncya bushuwa. Dishebeyangana, dilaala dya ne bakaji ku bukole ne bikwabo byònsò, muntu mukwabo kampanda mucyènzè, nwamonu's. Cya bushuwa.

140 Kî nkwenza bu udi ubangulula nsòmbelu mupyamupya to. Cìdì, kukùdimukila ku Dîyi, kumona ne ncinyi cìdì Dîyi dîlaya bwa leelu, kumona ne Bukênkè bwa dituku bùdì ne cya kwikala cinyi. Cìvwà cikèngelà bwa twètù kwenza cidimu eci kî nkwalukila ku twitabàayi ne bikwabo, kwalukila ku mangumba etu a kale awu to, kî nkwalukila ku mangumba a kale awu to; kadi nkukùdimukila ku Dîyi, bwa kumona ne m'Bukênkè bwa mushindu kaayi bùdì ne cya kukenkesha leelu ewu. Kaa, nwênù ekeleeziya, kùdimukilàayi ku Dîyi, alukilaayi ku Dîyi, twàyi munu pa mbota wa diteemesha ne dijìma nendè midilu udi ukengela, lekelaayi kutwàtwatwa minu eku ne eku bwa kuteemesha makênkè a nzembu, nwamonu's, a makwatakaja, menza kùdì bantu awu. Kùdimukilàayi ku Dîyi Dyèndè bwa

numone mulayi wa leelu. Ne pashiishe numone ne mulayi mwine ùdi bishi, kadi nutangile bwa kumona dimanyishiibwa dyawu. Pàdiwu wùshìndikiibwa, mpanùdì numanya dîbà adi ne nudi mu Bukênkè anyì kanwenamu. Tangilaayi numone ne mulayi wùdi cinyi.

¹⁴¹ Dishintulula dya mabeji anyì dishintulula dya tubala-matuku kadyena dishintulula cikondo nansha. Bantu bààbùngì bàtu bàmba ne: “Ee, cidimu cya kale aci cyàmanyì kuya, imanshaayi kabala-matuku kàà kale kàà ngondo wa dikumi ne mwibîdì aku mpindyewu nukudike kakwabo aku, kàà cidimu cipyacipya aku.” Aci, ki cìdì bidimu bipyabipya byumvwija bwàbò bôbò.

¹⁴² Bwànyì mêmè, ndi muswe kumona ne ncinyi cìdì cilayiibwe bwa dituku edi. Ndi muswe kumanya ne Bukênkè bwa dîbà edi bùdì cinyi, bwa mpete mushindu wa kumanya mwa kwendelamu. Ndi muswe kumanya mwaba wùndì mwikàle ne mwoyi, mu cikondo cìndì, nkààdi muye too ne penyi mu njila.

¹⁴³ Bu mwàkambà Pòlò, mbifwànyine kwikala bîmpè bwa kuciteela cyakabidi ne: “Mwikàle mpwa mwoyi bintu bikaadì bipite abi, mpindyewu ndi nkolesha ngenda nya mutangile ku kiipacila, dibiikila ditumbuke,” ku dimanyishiibwa mu kaabujima’s, piikalà cikondo cijiminangane cyònsò mu Cyendèlèlè pààlwà Yesu.

¹⁴⁴ Enzàayi mwàkenzà Davidi, teekaayi matuku enu àcìvwavwà mu byanza Byèndè. Kanwikadi batangile nî nku cinyi nî nku cinyi cikwabo cyònsò to, kadi teekaayi. . . Davidi mmwambe mwaba ewu, mmwambe—mmwambe ne: “Cyànyì cikondo cidi mu byanza Byèndè.” Nudi numona mwaba ewu mu Misambu mutùdì bacibalè, mu 62 emu ne: “Cyànyì cikondo cidi mu cyanza Cyèndè. Yèyè ki lwànyì lubwebwe.” Yèyè ùdi cinyi? “Yèyè mmubuulùdiiibwe kùndì. Yèyè ki Bulelela bubuulula. Cyànyì cikondo cidi mu byanza Byèndè.” Amen. Kaa, ekelekele! S’ki bwalu mbwòbù abu.

¹⁴⁵ Cyànyì cikondo n’Cyèndè Yèyè. Mêmè ndi Wendè Yèyè. Ndi mu cyanza Cyèndè bwalu Yèyè ngudi mulame cikondo. Ncyèna mumanye cìdì matuku àcìvwavwà malame to, kadi ndi mumanye ne Yèyè ngudi mulame matuku àcìvwavà. Pa nanku, Yèyè Udi mulame matuku àcìvwavwà awu ngudi mundame mêmè. Pa nanku cìndì mufwànyine kwikala anu ndyèlela meeji ncinyi bwa kulongolola cikampanda, cikansanga, ne cikankenga bwa cidimu cipyacipya? Mêmè ndi nditeeka anu cyanàànà mu byanza Byèndè amu, ngenda ngenda bu mwàkendà Davidi ne, “cyànyì cikondo cidi mu cyanza Cyèndè,” mùvwàye mumanye ne Nzambi nguvwa mulame matuku àcìvwà àlwa. Davidi kàvwa mumanye ne matuku àcìvwà àlwa àvwa cinyi to, kadi ùvwa mumanye ne Nzambi nguvwa ne matuku àcìvwà àlwa awu. Mêmè ncyèna mumanye ne matuku àcìvwavwà adi cinyi to, muntu nansha

umwe wa kutùdi kî mmumanye to. Kadi tudi bamanye ne Yêyè ngudi mulame matuku àcivwawwà.

¹⁴⁶ Lutuulu. Lutuulu. Bamwe bàà kutùdi bàdi bàkafika mu mushindu wa, bamwe bàà kutùdi bàdi bàkafika mu dilwijakaja dikole. Ndi ngeela meeji ne bantu bîmpè bààbûngì mbenze nanku awu. Udi ubwela mu dilwijakaja dipitepite—dipitepite bûngì. Ki mùdi wêwè muswe, wamonu's, udi muswe kucyenza wêwè mwine.

¹⁴⁷ Nenu nwênù bambi nàanyì, s'nudi bamanye ne nkuumukila ku dîbà kaayi kùndi ngaakula, nwênù bàdi bàtèelejà mukaba wa mêyi ewu abu. Nwênù mbândi ngambila aba, kî ng'anu kaadisangisha kakese aka to, kadi mbantu bàà buloba bujima.

¹⁴⁸ Bantu bààbûngì bàdi bàpàtuka, bapange lutuulu, kadi biikàle biitabuuja ne cikondo cikaadi pabwîpì, uteeta bwa kwenza cintu kampana mu wêwè mwine amu. Ikàlà mwindile Mukalenge. Lutuulu mbukole. Bu wêwè mwa kwikalaku ne lutuulu, mbukole. Mbukole bu wêwè mwa. . . “Aba bàdi bìndilà Mukalenge nebavwijulule dikanda dyabo dipyadipya.” Kî ng'aba bàdi bàteetà kudyanjidila Mukalenge, aba bàdi bàteetà kwambila Mukalenge ne: “Mukalenge, ndi mumanye ne Wêwè udi muswe bwa mêmè kwenza *cikampana*, nenu butumbi kùdi Nzambi bwa pândi. . .” to. Kwenji nanku to. Ikàlà mwindile Mukalenge. Bible mmwambe ne: “Aba bàdi bìndilà Mukalenge nebavwijulule dikanda dyabo dipyadipya.”

¹⁴⁹ Nzambi wakangata binunu bya bidimu bwa kuuja mulayi Wendè wa Musungidi ùvwa ne cya kulwa. Kadi, vùlukàayi ne, Yêyè ùvwa mumanye anu kwine kwònsò aku, dîbà divwàci ne cya kulwa. Kwakajuuka bantu bààbûngì bàvwà bàteetà bwa kwikalabo baaMaasiyà. Ekeleeziya yàbûngì yàkateeta bwa kupatula baaMaasiyà. Kadi Nzambi ùvwa ne cikondo citèeka bwa Maasiyà Wendè. Kàvwakù Yêyè mu dilwijakaja to. Nwamonu anyi?

¹⁵⁰ Nenu, mu cikondo cya bwine bwalu ebu, Yêyè wàkaleeja bifwànyikijilu byàbûngì bya Maasiyà. Wàkacileeja kubangila anu ku Adama too ne ku Maasiyà mwine, Adama wa kumpala ne wa ndekeelu; umwe wa kùdibo ùvwa wa pa buloba ne mukwabo Yêyè ùvwa wa ku Dyulu, umwe wa pa buloba ne mukwabo Yêyè wa ku Dyulu, umwe Yêyè mutuuluke mufumine mu Dyulu ne mukwabo mufumine ku buloba. Kadi Yêyè wàkalaya Maasiyà, kwangataYe binunu bya bidimu bwa kucyuja.

¹⁵¹ Wàkaleeja mu Yozefu anu civwàYe menemene. Yozefu wakaleeja cimfwànyì Cyèndè Yêyè.

¹⁵² Davidi wakaleeja cimfwànyì Cyèndè Yêyè. Pàvwà Davidi mfumu mubengiibwe, wàkabànda ku lusongo lwa kakuna ne wàkatàngila paanyima ne kwasa mwadi ùdila Yelusalema, bu mfumu mubengiibwe, awu's ùvwa n'Yesu mu Davidi. Bidimu nkama mwandamukulu bimane kupita, mwimane pa Yelusalema

bu Mfumu mubengiibwe, kwambaYe ne: “Wèwè Yelusalema, wèwè Yelusalema, mmisangu búngi kaayi yínkaadiku Mémè ewu muswe kukungwija mùtù nzoolo wa cikuka ùkùngwija twànà twèndè, kadi wèwè kwèna muswe to.”

153 Tàngilàayi Yozefu, mulela munkaci mwa bânà bààbò bàà balume, bankambwa abu; kàyi wa ndekeelu to (wa pabwìpì ne wa ndekeelu; Benyamina nguvwa wa ndekeelu), kadi anu kumpala menemene kwa wa ndekeelu awu, nwamonu’s, anu kumpala menemene kwa cyôci aci. Mukina kùdi bânà baabo, munanga kùdi tatwèndè. Bàvwa bamukine bwalu yèyè ùvwa muntu wa nyuma. Ùvwa mwa kuumvwija biloota, biikàle anu mu byôbi menemene. Ùvwa mwa kumona bikeena-kumona, kudyanjila kwamba maalù àvwà mwa kwenzeka. Kadi bôbò kumukina. Bààkamusùmbisha ku binjànjà bya mfranga makumi asatu.

154 Bààkakina Yesu bwa cinyi? BààkaMubiikila Beelezebula bwalu Yèyè ùvwa Dìyì, ne Dìyì dìdi mwa kujingulula meeji àdi mu myoyi. BààkaMukina. Ne bààkaMusùmbisha ku binjànjà bya mfranga makumi asatu.

155 Bààkamwela mu dijìmbà, Yozefu awu, byenze bu ne ùvwa mufwe. Cinkutu cyèndè civwà ne mashi aci kucishiyabo, byenze bu civwàlu cya Yesu civwà ne mashi cyàkangatàbo ku nkuruse aci, mùzàbi wùvwàYe muvwale awu, bwa kumanyisha lufu Lwèndè. Kadi Nzambi wàkenzela Yozefu cinyi? Yèyè wàkamupàtula mu dijìmbà amu, kumuteeka ku dyabalume dya Pàlò. Ne muntu nansha umwe kàvwakù mwa kumona Pàlò to, anu yèyè mumone Yozefu. Ne pàvwà Yozefu ùmuka ku nzubu wa bukalenge, mpungi yìvwa yìdila ne dìyì dikole dya patooke divwa dyàmbiibwa ne: “Cinù cyònsò citwe panshi, Yozefu nya’ ùkaadi pabwìpì.”

156 Cintu cimwecimwe aci, Yesu. BààkaMupàtula mu dijìmbà, byenze bu ne Ùvwa mufwe, ne kubiikaYe ku lufu ne kusòmbaYè ku dyabalume dya Mutambe bunene. “Muntu nansha umwe kàtukù mwanji kumona Nzambi musangu nansha wumwe to, pa kuumusha Mulela umwe wa Taatù awu. Ne puumukaYe mwaba awu, mpungi neyidile, ne cinù cyònsò necitwe panshi ne lùdimi lwònsò nelujikule.” Nwamonu’s, Yèyè ùdi Mfumu wa ditanta. Tàngilàayi numone cyàkenzà Ejipitu mwine musangu awu, s’wàkasùngila buloba bujima, pààkalwà mushipu apu. Pa nanku, ki mwikalàbi kabidi ku dilwa dya Mwànà wa muntu. Cinù, cinù cyònsò necitwe panshi ne ludimi lwònsò nelujikule ne n’Yèyè awu.

157 Yèyè yònsò wàkaleejiibwa mu bifwanyikijilu, kadi Nzambi ùvwa mumanye anu menemene ne divwa ndìbà kaayi divwaYe mwa kulwa. Ùvwa mumanye anu menemene pààkalwàYe apu. Nansha byôbi ne bàkaavwa naabo búngi kaayi kumpala kwa

dìbà adi, Yèyè ùvwa ne Maasiyà Wendè. Wàkabàleeja mu bifwanyikijilu, civwà cilwa aci.

¹⁵⁸ Anu menemene mwàkatùleejàYe Bikondo Mwandamutekete bya Ekeleeziya amu, civwà mwa kulwa aci. Anu menemene civwàYe mutuleeje ne necilwe pàvwàYe muteeke Bukênkè abu muulu mwamwa, mu dibuulula dyàci, bwa kuleeja bàà pa buloba. PààkatùmàYe Banjelo mwandamutekete bwa kubuulula baamusanjeela mwandamutekete bàvwà muntwamu abu, ne kuleeja maalu àvwà mashààdile mu njila awu, dituku dyònsò Mwanjelo yònsò ùlwa ne ùbuulula maalu àvwà mashààdile mu njila àvwà Luther mushiye, ne àvwà Wesley mushiye, ne àvwà Mpenta mushiye awu, ónsò awu mmaleejiibwemu. Ne mu cifwanyikijilu ciine ne mundidimbi wa Shalom munene awu, Yehowah, *Yahweh*. Nwamonu anyì? Menemene. KuCikupaYe mu mauulu, kadi's ki dísù dya cyamu didi diCikwàta fòtò dyadya. Nwamonu anyì? Twasakidila kùdì Mukalenge!

¹⁵⁹ Shalom! Ditalala! Kanuumvuku bwalu bunutonda to, Yesu ùdi kaaba aka. Bukênkè Bwèndè bunene mbufike kutùdì, ne twètù tudi ne kusakidila bwa bwalu bwàBù, eyowa's, Dìyì Dyèndè, bwalu busokoka bunene abu. S'ki Yèyè ewu leelu ewu munkaci mwa kuDimwenesha, wenza bintu bimwebimwe byakenzaYe musangu awu abi, anu bimwebimwe abi. Wènta cintu anu cyòci cimwecimwe aci.

¹⁶⁰ Twètù tudi bifukiibwa bya cikondo. Yèyè n'Nzambi wa Cyendèlèèlè. Tutu tuteeta bwa kudicincimika twètù biine, tutu tuteeta bwa kwenza cintu cishiilangane ne: "Kaa, bidi bikèngela bwa *cikampanda* cyenjiibwe." Vulukaayi ne, Yèyè mmumanye byònsò pa bwalu abu. Neciikalè ne cya kwenzeka, nansha bishi. Mulekelaayi Yèyè acyènzè. Difilaayi anu nwènù biine cyanààna kùdìYe.

¹⁶¹ Bándulukàayi, nukenke ne disanka dya Mukalenge, pa kumanya kwa ne nudi bapete dyèsè, mèsù enu mmakanguke ne àdi àmònakù dituku edi. Mweyemenaayi Yèyè bwa matuku acivwawwà. Nwènù's nukààdi baMumone mushindikeshindike Dìyì Dyèndè mu matuku àkaadi mapite. Yèyè mwine utu mushindikeshindike Dìyì Dyèndè mu matuku àkaadi mapite ne mwenze bwa ne bikwabo bintu byònsò ebi byenzekè anu mu byòbi menemene too ne ku dìbà ditùdì ne mwoyi edi awu, byònsò anu mu byòbi menemene, too ne ku Mukenji wa mwanjelo wa mwandamutekete, muCileeje ne mu dyulu, ne pa buloba, ne muCimanyishe mu mishindu yisatu bwa kakwikadi kalema nansha kamwe to, vùlukàayi ne, Yèyè mmulaye ne Nealwe cyakabidi. Aleluuyah! Dìyì adi nedishindikiibwe. Dìyì dilaya dya Nzambi, ne bidimu binunu bibidi bya dindila, Yèyè neafike pa dìbà! Kanuumvu bwalu bunutondaku to, Yèyè neikalè mwaba ewu. Bu mùdìYe mushindikeshindike Dìyì Dyèndè mu cikondo ne cikondo cyònsò, Bikondo bya Ekeleeziya bidi bileeja cintu cimwecimwe aci, ne dibuuludiibwa dya Mukalenge wetu

kùdi Mukenji wa mwandamutekete, ne bikwabo. Nzambi ngudi mucibuulule, mucimweneshe, ne mucijaadike. Ne munkaci mwetu leelu ewu, Yèyè mmuDileeje pamwe neetu mwaba ewu, ne mujaadike ne mushindike Dìyì Dyèndè. Ki mwàcyènzàYe kabidi!

¹⁶² Nekwikalè Bukalenge bwa bidimu cinunu. Bakulakaji nebiikalemu bansonga bwa kashidi. Mâsaamà neajimine ne lufu kalwakwikalaku kabidi to. Nebiibake nzubu, nebasombelemu. Nebakune mvinyo ne nebadye tumuma twàyì. Kabaakukuna bwa mukwabo kusòmbelayèmu (bwa mwanèndè wa balume ùyàngata), mwanèndè wa balume neasombele ku luseke lwèndè. Kaakukuna bwa mukwabo kudyye to, kaakufwa bwa muntu wa cyanààna kumwangataye to; kadi yèyè neasombelemu. Amen. Mbwa wa diitu ne mwànà wa mukooko nebidiiile kaaba kamwe. Ne nyama wa ntambwe neadye bisoosa bu mùdyadyà cimpanga cya ngombe, ne mwànà mutekete neikalè ùyilombola. Nekwikalè—nekwikalè butooke bwa munda. Kakwakwikala—kakwakwikala—kakwakwikala cintu nansha cimwe cifwànyine kwenzelangana bibi to. Netushintuluke tuumuke ku citùdi mpindyewu eci, tuye ku cimfwànyì cya butumbi cya Mwànà wa Nzambi Udi kàyì ùfwa awu aci. Bidimu kabyenaku mwa kuMulenga to, búngì bwa bidimu kabwenaku mwa kuMwenzela bwalu to, Yèyè ki Mwànà wa Nzambi udi kàyì ufwa awu. Pa nanku tudi bamanye ne—ne tukàadi ku cikondo cya nshiikidilu. Tukàadi pa ntwangeenu. Bintu byònsò ebi mbimanyishiibwe mu kaabujima, ki mwamanyishiibwabi cyakabidi.

¹⁶³ Mpindyewu, matuku àcìvwavwà, Yèyè ngudi muàlamè. Mmunyi mùndì mumanye dîbà dyàlwàYe? Nealwe dîbà kaayi? Ncyèna mumanye to, kadi Yèyè neikalè mwaba ewu. Aci's ncyà bushuwa. Ndîbà kaayi dyenzaYe *cikampanda* ne *cikansanga*? Mulawu neumuke pa buloba dîbà kaayi? Didileeja dibènèshiibwe dya dinanga dya Nzambi, dya mici miimane kaaba aka ne yikenkà, ne bilòngò ne bikwabo, nebitoloke biikàle kabiyi bifwa dîbà kaayi? Ncyèna mumanye to, kadi's nebitoloke. Dyela dyònsò dya meeji dya mu myoyi ya bantu biikàle bàjinga kwikala ne mwoyi edi, ne mpitaadi ne bangangabuka ne dipandanganà, ne myadi ne tunynganyinga, byònsò abi nebijiike dîbà kaayi, bwa kuya ne Yesu ku bukalenge bwa butumbi bwa bidimu cinunu bwa Shalom abu? Nebyenzeke dîbà kaayi? Ncyèna mumanye to. Yèyè mmwambe ne nebiikalèku. Ncyèna mumanye mwabyènzàYe to, kadi Dìyì Dyèndè dyakula nediiikalè dishindikiiibwe pàajuukà Dîbà dya Bwakane ne dyondopa mwinshi mwa mapwapwa Àadi. Ne dyondopa dîbà adi kadyakwikala dyondopa dya mubidi bu munùdi nubyelela meeji amu to, bu mùdi kwamba ne muntu mmupete dîsaamà ne nebamuumushe dîsaamà adi. Aci's neidiYe munkaci mwa kwenza mpindyewu, mu cifwanyikijilu. Kadi cifukiibwa cyònsò mu kaabujima necishintuluke! Cya cifwaka eci necivwale

dibenga-kufwa. Bukulakaji ebu nebwèlè cidya bùkabwelè mu bunsonga. Amen. Ee, nebiikalè bishi? Ncyèna mumanye to, kadi nebiikalèku.

164 S'nyewu ngenda nkulakaja, mèmè mwine. Cidimu eci, bu Mukalenge mwa kundama ne mwoyi too ne ku dikamòna dya matuku a6 a ngondo mwinâyi, nênkumbajè bidimu makumi ataanu ne bitaanu, muntu mukulakaji. Kadi mèmè ncyèna mwindile. . . ncyèna muswe kwalukila bwa kushààla cyakabidi nsongààlùmè to. Ndi muswe kukolesha kuya kumpala mutangile ku kiipacila kàà mwamwa kaka, kiipacila kiine kântù muswile aku. Kùkaadi mpindyewu bidimu bitwe ku makumi asatu ne bya mu njila bindi mwimane mu cyambilu eci, kacya pâncivwà nsongààlùmè wa citende wa bidimu makumi abidi ne bya mu njila, bu makumi abidi ne cimwe, anyi makumi abidi ne bibidi nanku awu, kùndi muditacishe bwa kutangalaja Mukenji ewu. Ne dyànyi paanyi dikanda dyònsò nkòong ndi mudyèlèMu. Bu makaaya àànyi mwa kukobama ne nsuki yànyi mwa kwandamuka mvyà ne kutuukayi, mèmè ncyèna ntangila paanyima ku ciine aci to, s'mbifwànyine kwalukilaku cyakabidi. Mèmè ndi ntangila kwaka ku dicya dya dituku kùdi Dîyi dishindika dya Nzambi dyambe ne "lusuki lwa ku mutu kwenu nansha lumwe kalwakubùtukakù to, ne Mèmè nêndùjuulè cyakabidi mu matuku a ndekeelu." Yèyè neàcyènzè munyi? Ncyèna mumanye to. Kadi ndi mutwishibwe ne . . .

165 Cidimu cipyacipya, ncyèna mumanye ne ncilame cinyi to, kadi ndi mumanye ne Yèyè ngudi mucilame. Ki ditekemena dya cidimu cipyacipya dîndi mèmè naadi ndyòdi adi. Yèyè mulwe, Amen. Yèyè kàyi mulwe to, mèmè nêngiikalè anu mutungunuke ne kwenza mudimu bu Yèyè mwa kundama. Ndi mèmè anu mMwomekela Yèyè matuku àcivwawwà. Ncyèna mumanye ne àdi bishi to, ndi mèmè anu mMwomekelawu. Nwênù's nukàadi bamonemone mùtùYe mushindikeshindike Dîyi Dyèndè, pa nanku's nudi bamanye ne nebyenjiibwe. Dîyi Dyèndè!

Wèwè udi wamba ne: "Mwaneetu Branham, udi upeta biine abi bishi's?"

166 Ee, indilaayi ngànji nnupeku meeji kampanda mu katanci kakese cyanààna mwaba ewu. Nutu bamanye cidi dinwàngana dya mijiki anyi? Ndi mumanye ne nudi badimanye. Mmujiki kampanda, ndinaya. Nwamonu's, bàtu bàdinàya.

167 Mpindyewu, nwênù bânà batekete, bwa nwênù kufika ku dyumvwa. Nudi bavuluke ne mu—mu tulaasa, ngeela meeji ne nutu ne. . . Ncinyi citù dinwàngana dikese dya mijiki dya beena Russie adi, misangu mikwabo bàtu—bàtu bàdyenza ne ngoma ya tutumbi, nudi bamanye ne ditu dibiikidiibwa ne, kî nkùdi. . . pa bidì bitàngilà nyuunyi mukese wa—wa mbonkòdi awu, nudi bamanye's, uvwa ubwela mu meetu awu; nenku yivwa yèza dipaapala adi, dituuta dya pa ngoma ya tutumbi ne bikwabo.

Nenku nuumvwa biine byònsò abi panùdi nuteeleja dinwàngana dya mijiki adi, pàdìbo bàyimba apu. Ngápù mwoyi dínà dya cyòcì aci: “Pierre ne Mbwa wa diitu.” Ncya bushuwa’s: “Pierre ne Mbwa wa diitu.” Mpindyewu, adi—adi ndinwàngana dya mijiki dya beena Russie. Nwamonu’s, kabeena—kabeena ne tuubantu tukese—tukese tùdi tupaapalà eku ne eku, tucimba to, kadi bôbò mbàdi bàcimba pa ngoma ya tutumbi ayi [Mwaneetu Branham ùdi ùtuuta pa ciimuci kampanda—Muf.], neashiishe [Mwaneetu Branham ùdi ùtuuta pa cintu cikwabo cya cyanàànà], ne bènza ngoma ya tutumbi ne mēyì ne bikwabo. Cìdi cìcimba, cyènza dinaya’s. Bwa ne, nwamòna mwa kuumvwa anu cìdi Mwaneetu Branham uteeta kwamba aci. Nwamònu anyì?

¹⁶⁸ Mpindyewu nwènù bantu bakole, Mifundu ki Dinwàngana dya mijiki dya Nzambi. Eyowa’s. Aleluuyah! Anu Musaki ngudi nkààyendè mumanye menemene cìdìbi byumvwija ne Yèyè ngudi ucibuulwila bàdi bàtèeleja abu, bàdi baswa kumanya cìdi dinaya adi. Kadi bivwa bikèngela bwa wèwè kwanji kwikala mumanye cìdi dinwàngana dya mijiki kampanda dyambedi, wamonu’s. Kacyena anu cintu kampanda cyanàànà cyùdi umona to, cìdi—cìdi ndishintuluka, ntwangeenu ya Dìyì, ya mijiki. Cìdi cipapulagana’s; misangu mikwabo ciyaaya mu *nunku* bwa katanci, dituuta kampanda, paanyima pàà katanci cìshintuluka anu cyònsò. Ncinganyì ciine aci? Bwenu nwènù bàdi kabàyi bafwànyine kuCyumvwa anyì kabàyi baCimanye nansha kakese, bàdi kabàyi bumvwa Cinùsankisha abu, cìdi anu mutooyi cyanàànà, cìdi didilakana kampanda. Kadi bwa aba bàdi bàCimanyè, ki Cìdìbo bôbò bindìle, mbamanye ne Cìlwalwa. Aleluuyah!

¹⁶⁹ Pa nanku tutu ne bikondo bya dinwàngana dya mijiki ebi dya Dinwàngana dya mijiki dya Dìyì dya Nzambi, mu mushindu wa ne dinaya dyònsò mu kaabujima didi dishintuluka. Bwenu nwènù bàdi bumvwa binùsankisha abu, ikàlaayi batèèlèje bwa dishintuluka adi. Nudi bamanye ne dikaadi dyènda diseemena. Nudi nuumvwa mùdi ngoma ya tutumbi yìtuuta, amen, baswe bwa cintu kampanda kwenzekaci. Nudi bamanye ne eci ndishintuluka, nwamonu’s, neciikalè mwa kutaayika ne kubwayika mu tusunsa tukese emu. Nwamonu anyì? Nenku nwènù mbàdi bacìndìle, nudi mwa kumanya mùdi myadi ya ngoma ya tutumbi yènda yìlondangana. Èyì Nzambi wa yààya! Bu nwènù mwa kuumvwaku ngoma ya tutumbi ya dyupula naayi eyi mpindyewu, bu nwènù mwa kuumvwaku mùdi cyona cya dikobola dya mujiki wa Dìyì dya mu Dyulu didi Dyòdi diine dìmba ne dìyì dikole ne: “Ne necyenzeke mu matuku a ndekeelu!” Dinwàngana dya mijiki dya dinaya dinene dya Nzambi didiYe munkaci mwa kwenza adi, Didi diMushintulula, dinwàngana Dyèndè dya mijiki pa ntwangeenu ayi. Musaki wa musambu ne aba bàdìci cisànkisha abu, mbateeleje bwa dishintuluka adi. Ki cìdi bintu byònsò ebi bwetu twètù, tudi

munkaci mwa kuteeleja, biikàle bindile. Musangu wònsò wùdìYe ùmwènèka, cintu kampana cidi cyènzeka, tudi tumona mùdi cikondo cyènda cìseemena. Tudi tumona paanyima pààpa kakùyi kwanji kwenza ntanta to pàvwà Bikondo bya Ekeleeziya bizòdiibwa, tuvwa munkaci mwa kuteeleja. Twètù kumona ne civwa cikumbànàngàne menemene anu ne Dìyì, cituuta pamwe ne Dìyì. Paanyima pàà katanci, cyàkenzekà ncinyi? Kì Yèyè wadivwidì ewu, Yèyè mwine, e kucishindika.

170 Tutu bumvwe Dìyì dyàmba, ne: “Mu matuku a mwanjelo wa mwandamutekete.” Mu Cikondo cya Ekeleeziya, Yèyè mmwambe anu ne: “Mukenji wa mwanjelo wa mwandamutekete ngwikalà Mukenji wa ndekeelu.” Kì pashiishe, kaa, tusangana mu Bwakabuulwibwa 10 emu ne: “Mu matuku a Mukenji wa mwanjelo wa mwandamutekete, maalu masokoka a Nzambi àvwa ne cya kujika,” Citampi cya Mwandamutekete civwa ne cya kukangudiibwa. Civwa ne cya kwikalaku. Pashiishe dyakamwe, pàdìci munkaci mwa kwenzeka apu, cikeena-kumona kubwayikaci, kwamba ne: “Nda ku Tucson, mutooyi mukole newenzeke pa dîbà edi mu mushindu wa wèwè umvwa anu menemene ne umanya ne ncitumiibwe. Necinyukushe anu buloba cyanàànà, cyàmba kubunyukusha’s.” Nwènù bònsò nudi bacimanye. Cidi pa mikaba ya mèyì, ngondo ne ngondo kumpala kwa kwenzekaci. Kì kwenzekaci! Kì kumwenekaci mu dyulu. “Shalom!” Ncinyi ciine aci? Ndituuta dya ngoma dyènda dishintuluka’s, dinwàngana dya mijiki.

171 Pashiishe musangu kampana Yèyè wàkamba bwa Nkokelu Mwisàtù, mùvwàye mwa kulwa mu mushindu kampana ewu, pashiishe mu kumanya kwa bìdì mu mwoyi, ne pashiishe Dìyì dyakula.

172 Yesu mmwambe ne: “Nenwènzè bintu binene kutamba ebi; bwalu Nyààya kùdì Taatù Wanyì.” Yone 14: “Byenzedi bìndì Mèmè ngenza, nenùbyènzè pèènù; binènè bitambe ebi, bwalu Nyààya kùdì Taatù Wanyì.” Anu mûngáfumu ku dyamba kwènji katanci ne, pàkaavwà Mariya uteeta kuMumanyishisha bu mwànà wa Yozefu, Yèyè kumulongolola. Mèyì Èndè kaenaku mwa kupangila to! Yèyè ngwàkamba nanku ne: “Maulu ne buloba nebipangile, kadi Mèyì Aànyi kaàkupangila to.”

173 Patùdì tuumvwa dinwàngana dya mijiki munkaci mwa kutuuta, dishintuluka, diikàle pabwípì ne kushintuluka, ncikondo cya ntwangeenu. Tudi tumona pàdìYe ùbanga bwa—bwa kutuuta, ne tudi bamone ne: “Byenzedi bìndì Mèmè ngenza, nenùbyènzè pèènù, ne nenwènzè bitambe bunene.” “Bitambe bunene,” mmwàkacilayàYe. Tuvwa tudikonka mùvwàbi bifwànyìne kwikalà.

174 Kadi nukààvwakù bamone pààkenzàYe cishima Cyèndè cya kumpala apu ne, Wàkangata màyì ne wàkaàndamuna mvinyo. Ncya bushuwa anyi? Wàkangata màyì, àvwà mu mushindu

mushààdile mafwànyine dîngà dituku kwikala mashààle mvinyo, kadi àvwà dyambedi màyi awu.

¹⁷⁵ Ne pààkadiishàYe bantu binunu bitaanu apu, cyàkenzàYe ncinyi? Wàkangata cintu kampanda cikaavwàku mùvwà màyi amu, Wàkangata mushipa wùvwàku musangu kampanda mwikàle wòwela ne mulediibwe mu diyi kampanda, ne Yèyè kuwùcibula, ne mushipa mukwabo kukolelawu ku bufuki bùvwà bufuki bwa ku cibangidilu abu. Wàkangata dyàmpà òvwà musangu kampanda diikàle blé, ne òvwà dimiinu kadi dilwè kushààla dyàmpà adi, ki Yèyè kucibula diine dyàmpà edi nenku ki bufuki kuvulanganabu anu cyanàànà.

¹⁷⁶ Kadi mu diitu amu, kamùvwà cintu nansha cimwe bwa kwenza nshindi to. “Kwikale,” nenku ki yèyè awu, kakùyi cintu nansha cimwe cya ne mbacibwileku to. Ncinyi aci? Yesu Kilisto umwèumwè awu’s! Nwamonu anyi? “Nenwènzè bintu binene bitambe ebi, bwalu Ndi nya kùdì Taatù Wanyì.” Kî nkwangata cintu kampanda cìvwà cifukiibwe, kucibwilaku cintu kampanda kadi kuvudija bufuki to, kadi kufuka anu kwa kakùyi kwa dyela mpatà eku. Uleeja ne Yèyè ùdi Yehowah umwèumwè awu wâkiimana kwaka ne wâkamba ne: “Kwikale,” ne cyòcì kwikalaku. Dìyi Dyèndè dyakamweneshiibwa! Musangu wakavwijiiibwaYe mubidi panu pa buloba awu, Yèyè wàkangata bufuki Bwèndè bwa ku cibangidilu, kubucibula ne kubuvudija. Kadi mpindyewu mu matuku a ndekeelu, pàdìYe ùtùuluka cyakabidi munkaci mwetu, Bukènkè bumwebumwe bùvwà bupwekè abu, bwàkamba ne: “Bukènkè bwikalèku,” nwamonu’s, Yèyè ùdi anu wàmba dìyi bufuki pààbu kumba kumweneka. “Nenwènzè binene bitambe ebi, bwalu Ndi nya kùdì Taatù Wanyì.” Nwavulukaayi ne, mu biine bikondo ebi ki mutùdì emu.

¹⁷⁷ Kadi bàà pa buloba kabeena buumvwaku to, bwalu: “Mmushiki wa lukutukutu.” Bwalu kî mba-Méthodistes to, ba-Méthodistes kabeena baCyumvwa to. Bwalu eci, kî mba-Baptistes to, ba-Baptistes kabeena baCyumvwa to. Bwalu kî nCya Katolike to, beena Katolike kabeena baCyumvwa to. Bwalu kî nCya beena Mpenta to, beena Mpenta kabeena baCyumvwa to.

¹⁷⁸ Kadi aba bàdì bìndilà Mukalenge, aba bàdì munkaci mwa kutangila’s! Kakwena muntu nansha umwe utùdiku nendè ne bwalu bulonda bwa nzubu wa cijoojelu kampanda, wàkamanyakù Mutooto wàkapìcilà kumutu awu to. Kadi beena meeji bààkajuukà abu bààkaWùlonda mu ntanta wa kilomeeta nkama, munda mwa bidimu bibidi, benda bàWùtàngila ne bàWùlonda. Nudi numona cìndì njinga kwamba aci anyi? Ncya aba bàdì bàtèèlajà dinwàngana dya mijiki adi.

¹⁷⁹ Vùlukààyi ne, Musaki wa musambu awu mmumanye ndekeelu kacya ku cibangidilu. Mmuwùmanyè wònsò, ki

bwa cinyi Yèyè ùwva mwa kuwùfùnda kaaba aka. Bushuwa menemene. Mpindyewu wèwè udi ne cya kubanga Nendè, udi ne cya kubanga. Pawikalà muswe kuumvwa dinwàngana dya mijiki, udi ubanga Nendè bu mùdì mu mujiki ku dinwàngana dya mijiki adi. Udi uteeleja, umanya ne didi dyàmba cinyi, neciikalè cìdì dinwàngana dya mijiki aci, pashiishe udi ubanga kuteeleja mujiki. Nenku udi umanya ne ncinganyì, pa nanku udi wamba kumanya dībà dyònsò ne: “Mwaba ewu ngùdì bintu *kampanda* byenzeka, mpindyewu bikèngela cishintulukè.” Mpindyewu, bwa muntu mukwabo kanà yònsò udi kàyì mumanye pa bìdì bitàngilà cìdibo. . . mmubwele anu cyanàànà musòmbe, cidi anu mushiki wa lukutukutu, lutooyitooyi. Kadi bwa ewu udi mumanye ne ncikampanda, ndituuta dya ne mijiki, mimba ne ngoma ya tutumbi ne madimbà, cìdì—cìdì cishindikija kùdì mpungi ne mpandalala, cimba ne nshinga ya lunzenze, bacímbe ne cindaala, biikàle—biikàle bàcìtuuta ne cindaalà cya matumbà, bàcìpàtwisha mèyi a mpandalala, bàcìtuuta ne ngoma ya tutumbi. Cintu cyònsò mu kaabujima mu mwadi mulondangane, nenku ciikàle cyènza dinaya adi—adi mu mushindu wa wèwè mwikàle mwa kubwita ne kwìsù kadi kwikadilamu ne mwoyi. Aleluuyah!

¹⁸⁰ Muntu mmufwànyìne kubwita kwìsù kwa mèsù èndè a cifwaka aa bwa lumònò lwa pa buloba elu kadi kwikala ne mwoyi mu Bwikadi bwa Yesu Kilisto, paùdì umona Dìyì Dyèndè bàdìmba mu dinwàngana dinene dya mijiki mutùdì ne mwoyi mpindyewu emu, biikàle bishintuluka. Udi ne cya kubangila mu Dinwàngana dya mijiki adi. Cintu cimwepele cyùdì mwa kwenza pawikalà mu Dinwàngana dya mijiki adi, dībà adi udi ubanga, udi ubanga kubwela mu mwadi mulondangane. Ki mushindu wùdì wenza ne Nzambi ngwòwò awu. Kwèna wimanyina pabule bwa kucibandila to. Udi ubwela mu mwadi Wàci mulondangane! Udi ubwelamu bishi? Udi ulediibwaMu, mu mwadi mulondangane wa Dìyì, paùdì ulwa citupa cya Dìyì adi.

¹⁸¹ Bivwa bikèngela bwa wèwè kulwa citupa cya maja bwa wèwè kupatuka mu maja. Bìdì bikèngela bwa wèwè kulwa citupa cya dinaya dya ndundu, cintu kampanda cyùdì umvwa ne cidi cikusankisha aci, bwa kubwela mu dinaya dya ndundu.

¹⁸² Bìdì bikèngela bwa wèwè kulwa citupa cya Dìyì, bwa wèwè kumanya Dinwàngana dya mijiki dya Nzambi. Dinwàngana Dyèndè dya mijiki mpàdìDi munkaci mwa kwimba apu, wèwè umvwa, udi wenda wenda ne dituuta dya ngoma dya cikondo. Wèwè udi ukeba bwa kucimòna cyènzeka: “Byenzedi bìndì Mèmè ngenza, nenùbyènzè pèènù; nenwènzè binène bitàmbe ebi,” matuku a ndekeelu aa. Kaa, ekelekele! Dishintuluka dinene dya cikondo. Tudi tubwela mu dituuta adi, dituuta dya Dìyì. Petààyi kiipacila Kèndè, dībà ditùdì ne mwoyi. Bwelaàyi mu mwadi wàkù mulondangane, mmunyi mùdì. . .

mushindu wùdìYe ùcyènza. Wèwè mubwele mu Dìyì, musangane mwàkacyènzaYe ku cibangidilu, dîbà adi udi umanya mùdìYe ùcyènza dîbà dyônso.

¹⁸³ Yèyè wàkanji kutuma Mukenji Wèndè bishi, dyambedi? CìdìYe wènza ncinyi? Yèyè kèna ùkwàta mudimu ne malongolodi to. Kacya Kàtukù mwanji kukwata naawu mudimu to, pa nanku Kèna ùcyènza mpindyewu nansha. Ki mwaba ngwòwò awu, pawikalà wèwè utèeleja mwadi mulondangane wa Nsangilu awu wa Maekeleeziya, udi mu mîdimà wèwè. Kadi wèwè utèeleja mwadi mulondangane wa Dìyì!

¹⁸⁴ Cyàkashebeelàbo Yesu ncinyi? “Wèwè ewu, mwikàle Muntu, uDìvwija Nzambi.”

¹⁸⁵ Nudi bapete Dìyiisha dyànyì dya *Mishindù Yisàtù Yà Beena Kwitabuuja*. Mùvwà yèyè awu mwimane kwaka ne . . . Kùvwa beena kwitabuuja bàà budingìbudingì, bààkalonda bwa katanci kakese, bàdingidija bu ne bàvwa biitabùuje. Ki dîngà dituku Yesu kubambila, kwamba ne: “Nenwèlè meeji bishi pìikalà Mwànà wa muntu, udi mufume mu Dyulu awu, ùbànda wàlukila mu Dyulu? Ndi mufume mu Dyulu, ngaalukila mu Dyulu.”

¹⁸⁶ Mona’s, musumbà wa bantu awu kuumukabo, bàmba ne: “Edi’s ndiyì dikole.”

¹⁸⁷ Pashiishe ki kulwaku beena kwitabuuja bàà budingìbudingì bàvwà bènda Nèndè abu, makumi mwandamutekete awu, pààkapetàbo cintu kampanda cya cikole aci, bôbô kabàakamòna ne cìvwa . . . kabàvwa bôbô bamanye Dinwàngana dya mijiki adi to. Kabàvwa bamanye Mulayi, wà ne Mwànà ewu ùvwa Yehowah to: “Dìnà Dyèndè nedibiikidiibwe ne Mubedyanganyi, Mfumu wa Ditalala, Nzambi wa Bukole.” Nenuk pàakambàYe ne: “Pàngàabàndà mu Dyulu Mùndì mufume!”

¹⁸⁸ “Ee,” mwàkambàbo, “edi’s n’Dìyì dikole. Udi mwa kuDyumvwa nganyì? Twètù’s tudi bamanye ne Wèwè udi anu Muntu. Twètù aba tudyà Neebe, tulaala Neebe, twenda Neebe mu meetu, biikàle Neebe kumpenga kwa màyi. Ee, Wèwè’s udi anu Muntu wetu ewu, kadi kajuuka kwamba ne Mwànà wa muntu ùdi wàlukila kùdìYe mufume? Cyùdì Peebe muswe kwamba ki cinyi? Edi’s n’Dìyì dikole!” Nwamonu’s, kabàvwa bamanye dituuta adi to. Kabàvwa bamanye mwadi mulondangane wa Dinwàngana dya mijiki dya Dìyì dya Nzambi adi to, dya ne Yèyè ùvwa Nzambi mumwènèshùibwe mu mubidi adi, bwalu Yèyè ùvwa—Bukènkè bwa Dìyì dishindikà dya dîbà adi. Kabàvwa badyùmvwè to. Baakamba ne: “Eci’s n’Cintu cikole. Udi mwa kuumvwa ciine Eci nganyì?” Ki kuumuka kuyabo. Kabàvwa bamanye dituuta adi to, nwamonu’s.

¹⁸⁹ Pashiishe tudi tumona kabidi ne, kùvwa Yudààsè, mwena kwitabuuja wa budingìbudingì awu, anyì mwena bupidya awu, wàkindila too ne pààkapetelàye pàà kudyudila. Dîbà adi ki kukùdimukilaYè kùdì bayiidi, kwambila anu dikumi ne babidi

abu, ne Yudaàsè ùvwa umwe wa kùdìbo, kwambaYe ne: “Nudi baswe pèènu kuya anyi, nwènu?”

¹⁹⁰ Dìbà adi ki Peetelo kwambaye ne: “Nkùdì nganyì kutùdì bafwànyìne kuya, Mukalenge? Wèwè’s ki Musaki wa musambu.” Amen. “Wèwè ngudi mumanye mùdìbi bipitakana. Wèwè ngudi Umwepele udi ne Dìyì dya Mwoyi. Nkùdì nganyì kutùdìku bafwànyìne kukùdimukila? Katwenaku bafwànyìne kwalukila bwa kwikalala Mufaalesa, anyi Musadoka, anyi mwena Heloode to,” anyi nì ncinyi cyònsò cìdì cifwànyìne kwikalaku aci. “Wèwè’s Ngudi ne Dìyì dya Mwoyi. Katwena ne mùngà mwaba wa kuya to. Twètù tukaadi, twètù tukaàdi bashàale bàà ku Cibilu cinènè cya mijiki eci. Twètù tukaàdimù, biikàle tutèeleja, ne tudi mu mwadi mulondangane awu. Tudi twitabuujà ne Wèwè udi Mwànà wa Nzambi, Yehowah mumweneshiibwe awu. Bwa eci kaayi twètù tudi batwishüibwe! Katwena bamanye cìdì mateeta ne ntatu, ne tunynganyinga ne bikwabo ebi to, ne Wèwè wamba muWikalà mwa ‘kuya bwa kalambudiibwa,’ ne *bikampanda*, *bikansanga*, ne *bikankenga* byònsò ebi, ne ‘mu dituku diisàtù,’ bintu byònsò ebi. Katwena twètù tuumvwa Aci to. Kadi twètù tukaadimu, tuteeleja Dinwàngana dya mijiki dya Nzambi, tukaàdi citupa cyàdì. Nenku tudi bindile bwa kumona ne cìdì cilondà ciikalà mwa kwenzeka ncinganyì, ne tudi twenda tulonda baKulamàkàje.” Kaa, ekelekele! Ki cìndì mèmè muswe kwenza ncyòci aci’s. Mulayi.

¹⁹¹ Yèyè wàkabanga bishi? Anu mwàkabangàYe ku cibangidilu amu. Nwamonu anyi? Kacya Yèyè kàtukù mwanji kutumina bulongolodi kampanda Mukenji Wèndè to. Kacya Kàtukù mwanji kutumina kasumbu Kèndè Mukenji to, Yèyè ùtu mutume anu muntu umwepele. Mu matuku a Noa, ùvwa n’Noa. Mu matuku a Mòsà, ùvwa m’Mòsà.

¹⁹² Kùvwa bakwabo bààkadyàmbidilà musangu kampanda, bààkamba ne: “Ee, wèwè’s udi mufwànyìne kudivwija muntu munsantu umwepele mu musùmbà ewu.” Nzambi kutangilaYe cyòci aci ne dipeetu.

¹⁹³ Mòsà wàkaya kùdì Mukalenge ne: “Ndi mwenze *cikampanda*. Ndi ne cya kwenza cinyi—cinyi?”

¹⁹⁴ Yèyè kwamba ne: “Tapuluka naabo. Mèmè nèntangilè bwalu bwa bikwabo abi. Utu mukutume m’Mèmè. Abu bujitu m’Bwànyì Mèmè.” Ki Yèyè kukangula buloba ne kuminaYe Koolà ne beena dyèndè bònsò. Misangu yònsò.

¹⁹⁵ Yone ne Yesu kabàvwa mwa kwikalaku cyapamwe musangu wumwewumwe awu to. Yesu... Yone mmwenze anu ùbànduluka, kwambaye ne: “Mpindyewu mèmè ndi ne cya kupweka, Yèyè ùdi ne cya kubànda. Yèyè ngudi Bukènè bushìndika.” Ki mwikalà kabidi Bukènè ebu ne cya kutungunuka too ne pààpetàye dilwa dya dishìndika mu kaabujima. Neya bushuwa. Neya bushuwa.

¹⁹⁶ Yèyè ùdi mùvwàYe ku cibangidilu amu. Mushindu awu ki wùdi ubanga, wùdi ubanga kuyiila civwà Nzambi. CyàkenzàYe ncinyi pàvwàYe pa buloba apa? Nnsòmbelu wa mushindu kaayi wùvwàYe nendè? Yèyè wàkiitabanganakù ku mèyi, Yèyè ùvwa mudì wa cibanga anyi? Yèyè wàkayakù kùdi malongolodi anyi? Yèyè wàkaDìmanyisha bishi? “Kenketaayi Mifundu! Nudi nwela meeji ne. . . Mu Yòyi amu mmunùdi nwela meeji ne nudi ne Mwoyi wa Cyendèlèlèlè, kadi Yòyi ayi’s ki Yidì yìMfidila Mèmè bujaadiki.” Nwamonu’s, ncintu anu cyòci cimwecimwe aci leelu ewu anyi mu cikondo cikwabo kanà cyònsò. Panwaswa Bukênkè, nwamonaayi cidì Mifundu yàmba bwa dībà edi. Eyo.

¹⁹⁷ Nudi nubangila penyi, dībà adi? Kwòkò ngènzàmpèkààtù kaaba aka, bangila ku nkuruse paùdi udìbala bu mufwe pamwe Nendè apu. Wàbwedì dībà adi mu—mu dinaya dinene adi. Ukàadi utèeleja, dībà adi, utangila dibèji dyebe paùdi mudikwate ku cyanza apu, diine—diine—diine Dinwàngana dya mijiki adi. Udi—udi mukwate dibèji mu cyanza didì difwànyine kukwambila maalu aa, mwaba wùdi dishintuluka dya mujiki dyenzekela bwa kudyenza dinaya, dībà adi udi umona dinaya adi ne didì cinyi. Paùdi umona Nyuma wa Nzambi ùpòna pambidi pàà bantu ne wènza cintu kampanda, tangila paanyima bwa umone ne cidì penyi. Monabi nî ncyòci aci, nî ncintu cidì bwa leelu ewu. Mona’s, bòbò bàvwa ne dibèji mu cyanza pààkalwà Yesu apu, dya Dinwàngana dya mijiki. Neya bushuwa ne, bàvwa naadi.

¹⁹⁸ Ndi ngamba mwaku awu mu wòwò anyi? Dinwàngana dya mijiki anyi? Dyumvwilangana dya luse anyi? Ki mùndi ntekemena’s. Uh-huh. Pa nanku dībà adi mbyenzeke anu ne ngìikalè mutumeku meeji’s. Dinwàngana dya mijiki anyi? [Muntu kampanda mu disangisha ùdi wàmba ne: “Dinwàngana dya mijiki.”—Muf.] Dinwàngana dya mijiki. Mmwòmò anyi? Eyo.

¹⁹⁹ Mpindyewu, bàvwa ne dibèji mu cyanza, kadi cyàkenzàbo ncinyi? Bàvwa bòbò bàteeta kutangila paanyima ku dituuta kampanda divwà dimana. . . citupa kampanda cikaavwàbo bamane kwimba. Ki cyòci aci cidì ekeleeziya yènza leelu ewu. Bàdi bàtàngila paanyima, bàmòna citupa cyàkimbàbo kùdi Luther aci; ki cidì ba-Luthériens bènza. Kì mbamanye dishintuluka dya mijiki adi to. Kì mbamanye cidì Nzambi munkaci mwa kwenza leelu ewu pàdiYe wènza bintu ebi apa to, ba-Luthériens biine abu. Beena Mpenta bàdi bàmba ne: “Kaa, twètù’s tudi baMupete.” Cinùdi naaci’s ndibèji dyena musambu wùdi mwimbiibwe kùkaadi bidimu makumi ataano. Nwamonu anyi? Cya bushuwa. Twikalàayi anu balame Dìyi edi mu byanza, ne twikalàayi batangile bwa kumona ne mashintuluka àdi àlwa dībà kaayi, dībà adi netumanye citùdi munkaci mwa kwenza.

²⁰⁰ Mpindyewu, bangila Nendè ku nkuruse ne: “Nyìngalalaaayi, nubatiijiibwe mu Dìna dya Yesu Kilisto, bwa dilekelediibwa dya mpekaatu; nenku nenupete Mujiki, Bulombodi,” nwamonu’s,

“Diyi Dyèndè, Nyuma Mwimpè ùdi umwènesha Diyi awu.” Dìbà adi ulonde too ne ku ndekeelu mwadi mulondangane wà Diyi. Cyònsò cidi Mujiki awu wùtuuta bwa dìbà adi aci, tuuta wèwè pamwe naaWu. Nwamonu anyi?

²⁰¹ Bantu bààbùngì bàkaadi bakonkekonke ne: “Bwa cinyi’s?” Bàkaadi bakonkekonke. Bàkaadi bakonkekonke, misangu mikwabo bankonka ne: “Mbwa cinyi’s? Bintu *ebi* bìdi ne cya kwenzeka bwa cinyi? Ncinyi, mbwà cinyi, mbwà cinyi bùdi *cikampanda* eci cingenzèkèle? Bwa cinyi ndi mwenze anu mbanga kadi *cikampanda* cyènzeka, ne mêmè—mêmè kupeta lutatu *kampanda* apa, ne *cikampanda* cilwa cimbìndulula apa, ne mêmè ngumba njimija *cikansanga* mwab’ewu?”

²⁰² Mìngà misangu ntu nkàadi mukonke ne: “Bwa cinyi’s?” Bwa cinyi, pàncìcìwà anu mwambi wa citende, mucikàle anu mbangilaku, Nzambi wàkangangata mukàjàanyi kumuumusha kùndi, kungangata mwanàanyi wa mu diboko kumuumusha kùndi, kubuumusha anu mwinshi mwa mwoyi wànyi? Wàkenza nanku bwa cinyi? Ncìwwa mumanye to. Bwa mpindyewu kaayi ndi mumanye. Mvwa anu kacya ngaakwata cyanza cyànyi mu Cyèndè ne mutungunuke anu ne kweyemena.

²⁰³ Yèyè mmumanye ntwangeenu ne ntwangeenu yònsò. Yèyè mmumanye ne mwadi mulondangane ùdi ne cya...ndìbà kaayi didìwu ne cya kwenzeka. Yèyè mmumanye ne ncinyi cidi cikèngelà bwa kukufwimba, Yèyè mmumanye ne mbintu bya mushindu kaayi bìikalàYe mwa kukwata naabi mudimu. Nwamonu anyi? Mu ndekeelu mwa cipeela misangu mikwabo, mùdi Nzambi ùfwimbila bantu baakane ùbàvwija beena meeji ne baprofeta amu. Nwamonu anyi? Nwamonu anyi? Mwòmò amu ki mùdi bantu batuucìbwa. Bantu bàdi batuucìbwa, mu Diyi. Pàdìbo ne twitabàayi ya mishindu yònsò ne bintu kampanda munda mwabo, bàlwe ku Diyi kadi Nzambi àbìpàtùlè munda mwabò amu ku mutuutu awu, àcìfwimbè àcìvwijè Eci, àcìvwijè Dinwàngana dinene dya mijiki ne, dya Diyi Dyèndè. Nwamonu anyi? Nenku dìbà adi bàdi bamona mùdi Diyi diya kumpala.

²⁰⁴ Nzambi ngudi mumanye ne ndìbà kaayi didì dikèngela bwa mwadi mulondangane wàci ne cya kushintuluka. Yèyè ngudi mumanye mùdi mwadi mulondangane awu wùya. Mêmè ncyèna mumanye mùyaayàwu to, kadi Yèyè mmumanye. Yèyè ngudi mumanye mùyaayàwu, kí mmêmè to. Kadi mêmè ndi ngutangila mwaba ewu, ngamba ne: “Ee, cidi anu cyenda cilwa.”

²⁰⁵ “Ntatu ya baakane yidi yàbùngì, kadi Nzambi ùtu ùbàsùngila ku yònsò ayi.” Nwamonu anyi? Nzambi ùkaadi mu maalu malonda mukwatekwate mudimu ne mwadi mulondangane wa mulayi wa Diyi Dyèndè, mu cikondo ne cikondo cyònsò, mu mwadi mulondangane wumwewumwe awu, wènza Diyi Dyèndè. Mushindu awu ngùtù Nzambi mukwatekwate mudimu munda mwa maalu malonda,

kuumukila anu kwine ku Genese kwaka too ne ku Bwakabuulwibwa, kùdìYe mukwatekwate mudimu ne Dìyì Dyèndè munda mwa maalu malonda. Ncya bushuwa, ne mwadi mulondangane wa—wa bukole bwa Nyuma Mwîmpè mwikàle ùshìndikila Basungula Dìyì Dyèndè. Vùlukàayi ne, Yèyè kàtukù mwanji kwikala mukumbane mwa kulenga ekeleeziya wa pambelu to. Cìdi anu Basungula.

206 Tàngilàayi baakwidi abu, bàakamba ne: “Muntu ewu m’Beelezebula. Mmwena lubuku. Mona’s, Yèyè—Yèyè—Yèyè ùdi ùbala mu meeji àbò amu.”

207 Cìdìbo bàvwa bapange kumanya ne: “Dìyì nditwe kutamba mwele wa mvita wa nseke yibidi, dijinguludi dya meeji adi mu mwoyi.” Ne Yèyè ùvwa Dìyì.

208 Kadi mukaji wa ndumba mutekete ewu mwimane ku ciina cya mâyi dituku adi, bwa kusunaku mbekeci wa mâyi, wàkamba ne: “Ndi njingulula ne Wèwè ewu ùdi Muprofeta. Twètù tudi bamanye ne Maasiyà ùlwalwa. Katwena bapete baprofeta to kùkaadi nkama ya bidimu, kadi tudi bamanye ne Maasiyà ùlwalwa. Ne pààlwàYe, cyôci aci ncìikalàYe.”

209 Yèyè kwamba ne: “Mémè ki Yèyè awu.” Aci’s cìvwa cikumbane. Bwa cinyi? Mwadi mulondangane wakatuuta! Yèyè ùvwa mwindile dishintuluka adi, dya kuumuka ku dingumba dya ekeleeziya kuya ku Maasiyà mushindika. Nenku ki Yèyè uvwa mwimane mwaba awu awu, Maasiyà uvwa Mòsà mwambe awu ne: “Mukalenge Nzambi webe neajuule Muprofeta mufwanangane ne mémè.” S’ki Yèyè awu. Mwadi mulondangane awu wumba ùshintuluka, Dimiinu dishindika kuCijingululadi.

210 Nenku pàdì Dìyì dilelela dya Nzambi dipòna pa Dimiinu, dishindika, ne pàdiye ùmòna dishindika dya Dìyì adi, yèyè ùdi ùDìjingulula. Yèyè ùdi ùtàngila Dìyì ùmánya ntwangeenu awu, ùmánya cikondo, ùmánya dishintuluka, ùmánya dituuta didi ne cya kwikala mu dîbà adi adi. Aleluuyah! Yèyè ùdi ùmánya dituuta, ùmánya cikondo, ùmánya mùdìbi ne cya kwikala byènda biya. Nwamonu’s, anu Musungula ngudi uCimanya.

211 Pàakacimòna Filipino, kàcìvwakù mwa kutungunuka kabidi ne didikànda to, wàkamanya ne ùvwa m’Maasiyà. Ki kuyaye kùdì mulunda wendè, uvwabò benze nendè pamwe dilonga dya Bible. “Natanaela,” mwàkambàye, “Iwàku, kùmonè Muntu. Lwàku, kùmonè citùdi bapete eci, tudi bapete Yesu wa ku Nazaleeta. Tudi bapete Yesu wa ku Nazaleeta, ki Muprofeta uvwa Mòsà mwambe ne nealwe awu. Twàmupeci. Twàmupeci.”

212 Yèyè kwamba ne: “Bìdi mwa kwenzeka bishi nanku? Ndi anu. . . Ùvwa kwèpì Yèyè mwine awu?” Nwamonu’s, yèyè kàvwa. . . Nwamonu’s, kàvwa anu mumanye menemene mùvwà mwadi mulondangane awu to. Bàvwa balonge. Kadi pààfikiye kuntwaku, kumwambilaye, kumutwadilaye Dìyì.

213 Kadi ewu mmwenze anu ùfikakù anyì, Yesu kwambaYe ne: “Monaayi mwena Izaaleela,” mwadi mulondangane awu ki kubangawu kukwata’s, dinaya dinene adi òkavwa munkaci mwa kwenjiibwa pa cibumba cya ku cyambilu apu, anyì mu cyalu amu, dituku adi. Pàmwápa Yesu ní ùvwa mwimanyine pa lubwebwe kampanda, wàkula ne bantu. Nenku Filipino mbenze anu bàfika mwaba awu ne Natanaela anyì, Yèyè kumutangila, kwamba ne: “Monaayi mwena Izaleela, mwena munda mùdì kamùyi budimu.”

Awu ne: “Laabi, Wèwè ukààdikù mummanyè dībà kaayi?”

214 Yèyè ne: “Kumpala kwa Filipino kukubiikilaye, paùvwà mwinshi mwa mucì apu, Mèmè mvwa mukumone.” Kaa, ekelekele!

215 Yèyè ùvwa citupa cyàcì’s! Kwambaye ne: “Wèwè udi Mwànà wa Nzambi! Wèwè udi Mfumu wa Izaleela.” Nansha mùvwà—mùvwà dituuta dya bàà pa buloba diikàle amu, ne ma-fêtes abo ònsò a mitooyi yàbùngì a—a mangumba àvwàbò bènzenza awu, kacìvwa Dinwàngana dinene dya mijiki dya Nzambi adi to. Amen. Yèyè kwamba ne: “Wèwè udi Mfumu wa Izaleela! Kì Wèwè awu! Mèmè ngàcìmonu. Ngàcìmanyì.” Bwa cinyi? Yèyè ùvwa Musungula. Dimiinnu Disungula dìdì dìcìmanya, ki mùtùbi misangu yònsò mu cikondo ne cikondo cyònsò ne, bàtu bòbò bàcìmanya.

216 Wèwè kaayi udi wamba ne: “Kadi, Mwaneetu Branham, kadi bishi bwa wanyì mààmù ne wanyì tààtù, bishi bwa bàà kwetu bòbò, bishi bwa dyànyì dingumba, nebènzè cinyi—cinyi? S’nebangiipate’s. Bidi . . .” Pawikalà kùyi mwa kutangila kumpala to, tangila muulu. Kuteeci bwa kutangila kumpala to, wèwè mwine, teeka cyebe cyanza mu Cyèndè Yèyè. Mulekele Yèyè akulombole. Tangila muulu, kutangidi kumpala to. Wèwè nyawu wamba ne: “Mona’s—mona’s, bakwabo badi banseka bwa nsuki yànyì mile eyi, ne mùndì muumushe tuputulu, ne mùndì muumuke mu ekeleeziya.” Huh! Kukenga bwa Dìnà Dyèndè’s mbisaamà bya dikola bya ngàsà Wendè. Eyowa’s. Kukenga bwa Dìyi Dyèndè, nwamonu’s, mbisaamà bya dikola bya ngàsà Wendè. Eyowa’s, mukalenge! Wavùluka anu ne, ngàsà wa Nzambi gudi mukupeebwe awu. Kaa, kèlekèleelee!

217 Byenze bu mwàkambà Pòlò, aleluuyah, yèyè ùvwa ne butekete kampanda, cintu kampanda cìmutàcisha. Yèyè ùvwa mufwànyine. . . Dyabulu ùvwa mwa—ùvwa mwa kwikala umutenkakaja, ùmukùma bisùsù wàmbakaja. Kì kukonkaye Mukalenge, misangu yisatu, bwa amuumushe cintu aci, wamba ne: “Ncyèna muswe cintu eci to, Mukalenge. Ùcìnguumùshèku!”

218 Kì pashiishe bufuku kampanda Mukalenge kwakulaYe nendè, wamba ne Shawula, anyì ne: “Pòlò, ngàsà Wanyì mmukumbane.”

219 Kwambaye ne: “Nanku nënditumbishilè mu mateketa àànyì. Nënditumbishilèmu. Ndi mumanye ne Wèwè ki Mwondopi mwine. Nkààdi muKumònèmòne wondopa babeedi, ujuula bafwe, ne wipata baadémons, utàbaja mèsù a bampofò. Kadi piikalàbi ne ndi muKukonke, ne Wèwè ungambila ne ngàsà Webe mmukumbane, nenku démon udi untacisha ewu ùdi— ùdi mbisaamà bya dikola bya ngàsà Webe. Nanku mèmè nënditumbishilè mu mateketa àànyì. Bwa cinyi? Bwa nciikadi ngâlwa kudibândisha kumutu bwa búngì bwa dibuulula.” Nwamonu anyi?

220 Nwamonu’s, yèyè—yèyè ùvwa ne cintu kampanda cìvwa bakwabo bayiidi kabàyi naaci to, yèyè wàkaMumòna paanyima pàà lufu Lwèndè, dijiikiibwa, dibiika dya ku lufu, ne dyambwibwa. WàkaMumòna. Bamwe bàà kùdìbò bàdi bàmba ne: “Ee, mèmè’s mwva mwendè Nendè.” Bantu bônso’s bààkenda Nendè mu mùsèèsù. Kadi paanyima pàà Yèyè mumane kufwa, mujikiibwe, mubiike ku lufu, ne mubànde mu Dyulu, ne mwalukile mu mmwenekelu wa Dikunji dya Kapyà, Yèyè wakaakula ne Pòlò. Aci’s cìvwa citàmbe ne cyònsò cìvwa bakwabo abu naaci’s. Amen.

221 Kwambaye ne: “Bwa nciikadi ngâlwa kudibândisha ne kuswa bwa kwibaka seminere minene ya menemene ne bikwabo byònsò, ne cintu kampanda cikwabo cya cinène menemene, bwa nciikadi ngâlwa—ngâlwa kudibândisha bwa búngì bwa dibuulula edi, Nzambi mmulekele musanjeela wa dyabulu mutungunuke anu ne kuntuuta panshi.” Yèyè ne: “Dìbà adi pàndi ne butekete, ndi ne dikanda.” Amen. Amen. Bìsaamà bya dikola bya ngàsà! Amen. Tudi bafwànyine kushaala pa cyòci aci mukùngùlù muleemule; dìbà dijima ne tusunsa makumi anaayi ne tutaanu nyewu dikaadi dipìte, kadi—kadi nyewu tusaama anu ne bìsaamà bya ngàsà Wèndè.

222 Kaa, Yèyè’s udi mwa kwanyisha masangu a njila. Ùdi mwa kwanyisha masangu a njila bwa kututeeta, bwa kutupwangaja bwa mudimu Wèndè. Ùdi mwa kwanyisha cyòci aci mpindyewu, Ekeleeziya, bwa bônso ne bàdi apa ne bàdi pa mukaba wa mèyi. Yèyè udi mwa kwanyishilangana masangu a njila bwa mudimu wetu twètù.

223 Anu mwàkaanyishilàYe Danyele amu. Wàkapèèsha Danyele kaadisangu kakese kàà njila dituku kampanda. Nudi bamanye’s, yèyè ùvwa muntu munene mu Baabulona mwamwa. Yèyè kucyenza, Yèyè kulekela mfumu ùmukùdimukila kadi kumwela mu bwina bwa ntambwe. Cyakamupwangaja anu cyanàànà’s. S’ncyà bushuwa nanku!

224 Wàkalekela bânà bàà beena Ebelu bàkabwela mu cikutu cya kapyà. Bòbò bàvwa bakange mwoyi bwa kutwa Dìyì Dyèndè nyama ku mikolo!

225 Yèyè udi mwa kwanyishilangana mèyi a ngeelulwilu, ùbàlekela bàkuseka bwa mùdi ne nsuki mile, ùbàlekela bàkuseka bwa paudi wamba bwa cinyi ukààdi mulwe munsantu mubunguluki wa mu malaba anyi nî ncinyi cikwabo cyònsò. Cidi mwa, bàdi mwa kukulekela useka. . . badi mwa kukuseka bwa cyòci aci, aci, aci, aci's ncîmpè. Aci's ndisangu dya njila, kàdi anu nkaadisangu kakese. Aci mbwa kujaadika cintu kampanda.

226 Nwamonu's, cintu cimwepele cìvwà disangu dya njila adi dyenzele bânà bàà beena Ebelu bàvwà biimane pa Dìyi abu, dyakabasuulula anu cyanàànà ku myonji yìvwàbo babaswike naayi ku makàsà ne ku mikolo ayi.

227 Ne misangu mikwabo bitu bikèngela mateeta makole bwa kukosa myonji ya maalu a pa buloba kutùdù. Misangu mikwabo Nzambi ùtu ùlekela tupeta kaaditeeta kakese, nudi bamanye's, bwa kumona citwènzà, bwa kukupatula mu maalu a pa buloba. Anyi, mu ngaakwilù mu kwabo, ùkulekela upeta kaaditeeta kakese ne bakwipata mu bwine bulongolodi abu, ne meeji awu a ne “ba-Méthodistes ki èhélè, ba-Baptistes, anyi beena Mpenta, anyi ki—ki cisumbu cimwepele cidìbo naaci. Wèwè kùyi mucitàbùtje mushindu wùdi wanyì ekeleeziya ùciitabuujà to, kwèna mwitabuujeku to nansha kakese.” Misangu mikwabo Yèyè ùtu ùlekela kaaditeeta kakese kenzeka. Pàmwäpa udi ne mwànà ùsaama. Pàmwäpa cintu kampanda cidi cyènzeka anu pa dîbà dya lufu menemene apu. Pàmwäpa mbakwangate muntu kampanda, anyi cintu kampanda. Ciine aci mbwà kwenza cinyi? Bwa kukutapulula, bwa kukuleeja cintu kampanda, kukukangula mèsù. Pàmwäpa udi mulwe bwa kudyula, misangu mikwabo. Pàmwäpa udi munkaci mwa kuteejeja mukaba wa mèyi ewu anu bwa kudyula. Pàmwäpa Nzambi ngudi wenza cyòci aci bwa kukosaku yimwè ya ku myonji ya maalu a pa buloba yidi mikuswike mikulaminyine panshi ayi.

228 Byenze bu muntu munkaci mwa kunwa tubalu ùfwa mu musulu, bidi bikèngela ùpatulè muntu awu mu musulu amu kumpala kwa wèwè kupatula musulu awu munda mwa muntu awu. Aci's ncyà bushuwa. Bikèngela wänjì kumupatula mu musulu amu dyambedi, ki pashiishe ùpatulè musulu awu munda mwèndè. Misangu mikwabo bikèngela bwa Nzambi kucyenzaYe mushindu awu. Yèyè ùtu wányishilangana ntwangeenu, masangu a njila bwa kwenzabi cyòci aci. Ikàlà wèwè mwimane pa milayi Yèndè, pa Dìyi, bwalu byòbì kabyadyakupangilaku to. Bwa matuku acìvwawwà kaayi, awu àdi mu cyanza Cyèndè. Imana wèwè mwakiimanabo bòbò amu, ku—kulekelediku to.

229 Abraham, pa èndè masangu a njila, wàkamanya ne Nzambi ùvwa ne bukole bwa kujuula mwanèndè wa balume awu ku bafwe, kwine kwakamupetelaye ku masangu a njila aku. Abraham kufikaye ku èndè masangu a njila. Nenku paanyima pàà yèyè mumane kwikala mweyemene Nzambi ne mumane kumona bishima byònsò bya Nzambi, munda mwa

bidimu makumi abidi ne bitaanu yêyè kwindila mwânà wa balume, mwânà mulaya, kadi pashiishe Nzambi kumwambilaYe bwa kuya kalambula cintu ciine civwàye mwindilendile aci. Ekelekele, kaa, kelekelelee, cikondo kaayipu's we! Kadi Abraham wàkatènkakanakù anyi? Balàayi Loomo, nshapita mwi4, mbambemu ne yêyè ùvwa "mutwishiiibwe anu menemene." Amen. Ùvwa mutwishiiibwe anu menemene bwa civwà Nzambi mulaye aci ne, Nzambi ùvwa ne bukole bwa kucyenza. Amen. Yêyè nguvwa mumwanyishile masangu a njila awu. Ùvwa uleejila ku Abraham aku, utuleeja twètù, nwamonu's, ne Yêyè udi ne bukole bwa kajuula bafwe.

²³⁰ Abraham kwambaye ne: "Mêmè nêmmupetè byenze bu udi mufumine ku bafwe." Matrice a Sarah ôwò àkaavwa mafwe, matrice a Sarah ôwò àkaavwa mafwe; ne mulume yêyè, wèndè mubidi wùkaavwa mufwe, yêyè ùkaavwa muntu mununu. Mukaji kàcivwa ne mijilu ya mabeele bwa kwamusha mwânà to. Nenku kabàvwa ne. . .Ee, kakùcivwa kantu nansha kamwe to. Ne mulume ùvwa nkumba, yêyè mwine, ne mukaji ùvwa nkumba. Nwamonu anyi? Kakùyi mushindu nansha mukese to. Nenku yêyè wàkamupeta byenze bu muntu mufumine ku bafwe, kwambaye ne: "Piikalàbi ne Nzambi ùvwa mwa kwenza aci, Nzambi's ùdi mwa kumujuula ku bafwe. Bwalu anu Yêyè Nzambi umwèumwè uvwa mungambile ne mwânà nealwe awu, ne mêmè kushààla mukwateku ne yêyè kulwaye awu, Yêyè awu ùdi mwa kumujuula ku bafwe." Bwalu, Yêyè ùtu wènza bwa maalu ônsò akwacishangane bwa dyakalenga dya bàdi baMunangè. Amen.

²³¹ Nzambi Yêyè wàkenza mulayi awu, ne mu matuku a ndekeelu bintu bitùdi tumona byènzeka ebi nebyenzeke! Piikalàbi ne Yêyè wàkalaya mwânà wa balume, ne mwânà awu kulwaye; piikalàbi ne Yêyè wàkalaya bintu byônsò bitùdi tumona mu Mifundu ebi, ne byôbi byènzèke, tubwelaayaaku mu mwadi wàbi mulondangane awu. Yêyè wàkalaya ne mu matuku a ndekeelu bintu ebi nebyenzeke, nenku's nyewu tubimona. Yêyè wakalaya ne Neatume Yesu. Aleluuyah! Nekwikalè Bukalenge bwa bidimu cinunu! Nekwikalè dituku dipyadipya. Nekwikalè dituku dîikalà dîbà kadiciyikù mwa kubwela kabidi to, bwalu bwa. . .katwakwikala kabidi naadi ne dijinga to, bwalu Mwânà wa mukooko ki Bukênkè bwa Cimenga cituyaayamu aci. Amen.

²³² Kabundubundu kàà dituku dipyadipya, nyewu nkùmva pambidi pajima patùdi twakulangana apa. Bukênkè bwa dituku dipyadipya! Bukênkè bwa dituku didi kadiyikù ne bufuku to, kamùyi mîdimà, nansha mindidimbi, nansha mauulu, nansha—nansha mauulu mabwacidile, mafiikuluke, nansha mundankulu, nansha nkita, nansha bilòngò kunseke ya tukuna, nansha milongo ya kadyàmashinda ya beena madilu, nansha bangangabuka, nansha nzubu wa bitalu. Amen. Ndi—ndi mwa kumvwa mùdi—mùdi nsèsà ya Bukênkè Bwèndè yibwayikila

pa musuuka wànyì. Dituku dipyadipya! Dya kale didi munkaci mwa kwongoloka kuya.

²³³ Pàndì ngumvwa mashi a cifwaka àpòngolokela mu mubidi wànyì, ndi ngumvwa difùkuka dya Nyuma Mwímpè dyènda diàlonda ne: “Juuka panshi, ùkenkè.”

²³⁴ Cintu kampanda cyàmbi ne: “Billy Branham, nyawu ukàadi wenda ukùlakaja, ukàadi wenda uteketa, makaaya ebe àkaadi ènda àkòbama, nsuki yebe yìkaadi yènda yitòloka mvyà ne yènda yitùka.” Aci’s ncyà bushuwa. Ne mîdimà ne mîdimà ya mupimbu pa buloba!

²³⁵ “Kadi juuka panshi, ùkenkè!” Ndi ngumvwa dilòpoka dya difùkuka dya Bukènkè bwa Evanjeeliyo wa butumbi wa Yesu Kilisto udi mumvwijè cifùkiìbwà cipyacipya munda Mwèndè awu. Ndi mwindile dituku adi, amen, dituku dipyadipya adi. Ncyèna mumanye cidi matuku àcìvwavwà to. Ncyèna mumanye ne mmandamine cinyi to, cidimu cya 1964, cidici cindamine anyi cintu cikwabo nansha cimwe to, kadi mèmè ndi mukwate ku cyanza cya Yèyè udi mulame Cyendèlèlèlè, Yèyè udi Cyendèlèlèlè awu. Amen.

²³⁶ Abraham ùvwa mumanye ne Nzambi ùvwa mwa kumujuula cyakabidi ku lufu, pa nanku yèyè kuMweyemenaye.

²³⁷ Pa nanku, bwa cidimu cipyacipya, ikàlaayi bapangadike bwa kushààla ne Dîyì Dyèndè ne cidiDi dilayè, bu mwàkènzà bakwabo (Basungula) mu matuku a bakwabo awu. Wèwè muumvwe ne udi mumone Bukènkè bùdì bukubwayikile pambidi abu, bwa Yesu Kilisto abu, dimwèneshiibwa Dyèndè dya Nyuma Mwímpè Wèndè munene mu matuku a ndekeelu aa. Nenku, wavùluka, wavùluka ne, ùshaalè naaci, cyàkènzàYe aci, wèwè udi umwe wa ku Basungula; ne cìvwàye yèyè, Basungula mu matuku makwabo awu, bu Abraham, pàakacimònàye, pàvwàci cyònsò cibèngangana ne cijaadiki cya maalu a mamanya. Noa wàkacimòna, ne cìvwa cyònsò cibèngangana ne cijaadiki cya maalu a mamanya. Mòsà wàkacimòna, ne cìvwa cyònsò cibèngangana ne cijaadiki cya maalu a mamanya. Bikondo bya beena meeji matwe bidì bipite ebi; kadi Basungula bàakacimòna abu, bàakimana kabàyi bànyunga to! Amen.

²³⁸ Nenku bwa matuku àcìvwavwà, twikalàayi biimane pa mulayi katùyi tunyunga to. Nzambi ngudi muwufile, bwalu mbwà Nzambi bwa kuwùtábalela too ne pàakumbanàwu. Mèmè ndi ngenda ndonda anu cyanàànà mwadi mulondangane awu. Pààtuutàwu e kuupula ngoma wàmba ne “ndekeelu wa William Branham pa buloba nyèyè ewu,” dîbà adi pàanyì ngumba nya ne mwadi mulondangane awu. Pashiishe nènjuukè cyakabidi ku lufu ne mwadi mulondangane awu. Aleluuyah! Yèyè udi muwutuute bwa kubwelawu, udi uwùtuuta bwa kupatukawu awu, ùdi ùwùtuuta cyakabidi bwa kubwelawu. Mmwadi mulondangane wa Nzambi ne: “Nèmmujuulè ku

matuku a ndekeelu. Ewu udi ungiitabuuja Mémè ùdi ne Mwoyi wa kashidi. Ewu udi umvwa Dìyì Dyànyì ne wìtabuuja Ewu udi muNtume, ùdi ne Mwoyi wa Cyendèlèlèlè; ne yèyè kààkupita ku cilumbulwidi to, kadi ùkaadi muumùke ku lufu muye ku Mwoyi.” Mémè nëndondè dituuta dya Dìyì! Amen. Kaciyi dituuta dya mwoyi wànyì to; dituuta dya Dìyì!. Nansha ciikàle cinyi, mwoyi wànyì wòwò kawùyi wùtuuta pamwe ne Dìyì to, dībà adi mwoyi wànyì mmupiile. Amen. Bwalu, Yèyè udi Dìyì! Amen. Bible ngudi utwàmbila nanku, Dìyì dya Nzambi.

²³⁹ Mvwa munkaci mwa kuteeleja ndongamu kampanda, twenda tubànda, mémè ne Billy, kwènjì cikondo kampanda. Nenku cìvwa m’Bible ewu...dì—dībà didìbo bàbìikila ne nciprofeta adi, dībà dya...Bàdi bàdìbìikila bishi apa? Cintu kampanda cya citàngila ciprofeta. *Dìyì dya Cipròfetà*. Mu bushuwa bwa bwalu, mba-Adventistes du Septième jour. Bàtu bàngata mènà mashìlàngàne anaayi anyì ataanu nanku awu. Ba-Millérites ki cìvwàbo, bangabanga.

²⁴⁰ Bòbò mbàvwà bambe, mu disangisha kampanda mwamwa ne, mémè ntu mwambe mündi Yesu Kilisto, ne—ne Taatù wa Cijila ùdi pambidi pàànyì, Dikunji dya Kapyà adi, ne mémè ndi Yesu Kilisto. Kwenzekabi ne kwikalè mulunda wanyì mu kwabo usanganyibwa mwaba awu mu disangisha dyabo dikese adi, kujuukaye e kwambaye ne: “Nebikengele bwa nwènù kujaadika aci, bwalu mémè nèmubìikidishè kaaba aka. Ndi muswe bwa nwènù kuleeja musangu wumwe cyanààna wùkaadiyekù mujikule aci,” nwamonu’s, ne bya mushindu awu. Úvwa wàkula pa bìdi bitàngilà tusumbu tushiileshilangane ne bikwabo pa buloba.

²⁴¹ Bòbò’s mbamanye. Musangu kampanda mvwà mupyangane naabo pa bwalu bwa *nsabatu* ebu. Bòbò bàdi ne dituku dya kale dikaadi dimanè kupita adi. Nyuma Mwimpè ki wetu Nsabatu, ki mùdi Bible mwambe: “Lwâyì kùndi Mémè, nwènù bònsò bàdi bàditàcisha ne mudimu mukole ne bambule majitu makole, Mémè nènnpèeshè nsabatu wa misuuka yenu.” Kaciyi “dituku kampanda” to. Pòlò mmwambe ne: “Nwènù bàdi balamè dituku abu, ndi nciina’s bwa bwalu bwenu.” Nwamonu’s, aci’s ncyà bushuwa. Eyowa’s, mukalenge. “Kucidi kushààle diikisha,” Ebelu 4, “bwa bantu bàà Nzambi, dilama dya nsabatu. Bwalu twètù bàdi babwelè mu diikisha Dyèndè abu, tukààdi biikishè ku midimu yetu, bu mwàkiikishà Nzambi ku Yèndè.”

²⁴² Kadi mwakudi wabo bòbò, abidi àdi panshi aa, ndongamu mulenga wa dikema, mémè ncyèna naabo cilumbu to. Ndi mufwànyine kwenza cyònsò cìndìku mufwànyine kwenza aci bwa kubambulwisha. Ndi mbafwila luse ne mwoyi mujima bwa dyamba dyàbò dya bwalu abu, bwalu mbambe cintu kampanda cìvwà kaciyi cya bushuwa to. Kadi kakwena bwalu to. Dilongesha dyàbò’s didi anu mùdi dya ba-Témoins de Jéhovah ne beena Science Chrétienne amu, ne tusumbu tukwabo twònsò

twa ntendelelu etu, nwamonu's, cintu anu cyôci cimwecimwe aci. Kadi monaayi ne, bôbò badi anu mùdi bulongolodi bukwbabo kanà bwônsò ebu, kî mbapiile kupita, mùndi mêmè ngeela meeji, kupita bakwbabo abu to. Dîyi ditu misangu yônsò anu dibingè, nwamonu's, nediDijaadike Dyôdi diine ne ndya cya bushuwa. Monaayi.

²⁴³ Kadi pàvwàye wàkula apu, muntu awu kwambaye ne: "Twètù mbàdi ne mukanda-wa-cidimu." Mufundi ewu, kaa, dîna dyèndè nganyi apa's, mwakudi mwine uvwa mucyâmbè awu? S'nyewu ngâpù ne dîna dyèndè mwoyi mpindyewu mudidi menemene. Úvwa wàkula bwa beena Kilisto bàà Kantu-ku-byanza bàà mu Seattle emu anu abidi àdi panshi aa mu Cislau cya Cinsangânsàngâ. Neku yêye—yêye kwamba, mwine mufidi wa mamanyisha ewu kwambaye ne: "Muntu ewu mmufunde mukanda, mukanda mutambe kwikala wa pabwàwù bwa cidimu eci." Mêmè ndi mubenga aci.

²⁴⁴ Mukanda bwa cidimu eci m'Bible! Yêye ki udi Bukênkè bwa bàà pa buloba. Yêye ki Nzambi Yêye mwine. Wètù Mukanda-wa-cidimu m'Bible. Bwa cidimu cya 1964 eci, wètù Mukanda m'Bible. Ne bwa bidimu bikwabo byônsò bìcìvwavwà, wètù Mukanda m'Bible. Bwa bidimu byônsò bikaadi bipite, Yêye nguvwa Mukanda wa bidimu bikaadi bipite abi, Mukanda wa bidimu bìcìvwavwà, ne Yêye m'Mukanda wa Cyendèlèlè. Údi usokolola ne n'Nzambi. Eyowa's, Údi ùbuulula Nzambi. Bwa cidimu ne cidimu cyônsò cìcìvwavwà, ki Mukanda-wa-cidimu ngwôwò awu. Dìbà—dìbà kanà dyônsò dinùdi nuumvwa Bible wàmba cintu kampanda nansha cinganyi, mulayi Wèndè mmushindikìibwe, nekulwe cya Cyendèlèlè kampanda, dîngà dituku. Bible ki Udi utùpèèsha mulayi ewu, panùdi nuumvwa Bible wàmba ne nekulwe dituku dyàlwà Yesu. Ne pândi ngamba leelu ewu mpindyewu. . .

²⁴⁵ Bidi bìkèngela mêmè kwoya, bwalu nyewu—nyewu ngénji mwaba ewu mêmà abidi, nwamonu's, matwe ku abidi.

²⁴⁶ Tàngilàayi, pàdi—pàdi Bible ùtwàmbila bintu bìdi ne cya kulwa ebi, wàkula bwa mêmà ônsò atùdi—atùdi bapicile aa, matuku a Noa àkaavwa madyànjile kwambiibwa, matuku a bakwbabo bônsò aba aa, Mifundu yikaavwa midyànjile kwamba, matuku a Martin Luther àkaavwa madyànjile kwambiibwa, matuku a Wesley, matuku a beena Mpenta, dîbà ditùdi ne mwoyi edi dikaavwa didyànjile kwambiibwa, bintu byônsò mbyenzeke anu menemene mushindu wùvwàbi, pashiishe pàvwà. . . ncinyi ciine aci? N'Dîyi dyakula dya Nzambi, didi dishindikìibwe kùdi Nzambi, diCìvwija Bukênkè bwa dîbà adi. Nwamonu's, anu mùdi dîbà dya muulu amu. Pàdi Dîyi, Dîyi Dyôdi diine, didi Bukênkè pàdiDi dishindikìibwe bwa cikondo cìdiDi ne ndyàci. Nwamonu's, nDishindikìibwe, apu kaayi Didi Bukênkè bwa dîbà adi.

247 Yone ùvwa Bukênkè, yèyè—yèyè ùvwa Bukênkè butambe bùvwà naabu Eliya ne bakwabo bônso abu. Eliya. Yèyè kàvwa Bukênkè bwa Eliya to, kadi ùvwa Eliya mu mmwenekelu mukwabo, mwikàle ùshindika Bukênkè. Nwamonu's, ki cìvwàye. Kadi pàakalwà Yesu, Wàkamba ne: “Yèyè ùvwa Bukênkè bùvwà bùbàlakanà ne bùkenka bwa muvù kampanda. Nwènù nudi banange kwèndèla mu Bukênkè bwèndè.” Nwamonu anyi?

248 Ki Yone kwambaye ne: “Mpindyewu mèmè ndi ne cya kubwicidila. Ndi ne cya kujìma mpindyewu, bwànyì Bukênkè dyabu diteema dyajiki. Ndi ne cya kujìma. Yèyè ngudi ne cya kubànda. Yèyè ngudi Bukênkè.”

249 KwambaYe ne: “Mèmè ndi Bukênkè bwa bàà pa buloba.” Amen. Ncya bushuwa. “Umwèumwè awu makeelela, leelu, too ne kashidi.” Ne Yèyè ngucidi anu Bukênkè bwa bàà pa buloba. Ne Yèyè ùdi cinyi? “Ku cibangidilu kwakadi Dìyì, ne Dìyì dyakadi ne Nzambi.” Yèyè ùvwa Bukênkè bwa bàà pa buloba bwa cinyi? Bu Yèyè mulwe, mwambe ne Yèyè m'Maasiyà, kadi Kàyì wènza mùdi Bible mwambe ne Maasiyà ùvwa ne cya kwenza, dībà adi Yèyè kàvwa Bukênkè bwa bàà pa buloba to. Nwamonu's, n'Dìyì dishindika didi dìcìvwija Bukênkè bwa bàà pa buloba.

250 Nenku mu dībà ditùdì ne mwoyi mpindyewu edi, Dìyì dishindika dya dībà edi edi! Nwènù beena Mpenta, nutu nwamba ne, “dyakula dya mu myakulu,” ne bikwabo. Adi's dìvwa n'Dituku dya Mpenta, aci's cìvwa m'Bukênkè bwa dībà adi mwine musangu awu. Nwamonu's, edi ndikwabo dituku pàadi. Yèyè ùdi Bukênkè bwa dībà edi leelu ewu.

251 Cikondo cya Mwandamutekete cya Ekeleeziya, cipàtakaja mweyelu cyònsò, ne Kilisto ùsanganyiibwa pambelu. Ngondo munkaci mwa dicìmanyisha, mídìmà yònsò yilwa pa buloba. Bukênkè bwènda bùdisàka munda mpindyewu, bubangè kuleeja cìikalà ne cya kwenzeka. Cintu necibutudiibwe, ne Bukênkè nebulwele ne nebulbutule. Ne Bansantu nebapanye buloba, bapole nebapanye buloba. Buloba, mídìmà ya ngondo neyish- . . . yòyì neyumushiibwe. Mídìmà ya bufuku neyijimine, mídìmà ne lufu lwabo alu ne twìtabàayi, ne biyè kule ne Dìyì dya Nzambi, bintu binyangakaja bìdìbo bàmba abi. Nenku Bukênkè nebulwayikile pa dituku.

252 Ne vùlukaayi ne, pàdi Bible mu kaabujima . . . Tèelejaayi, bwa kwoya. Pìikalà Bible ewu mu kaabujima mushindikìibwe yònsò nkòong, dībà adi nekwìkalè Shalom wa Cyendèlèlè, Ditalala dya Cyendèlèlè. Nwamonu anyi?

253 Yèyè wàkalwa, ne wàkamba ne Ùvwa “Ditalala pa buloba, budiswìle kùdì bantu,” kadi bàà pa buloba kabaakacyakidila to. Nwamonu anyi? Nwamonu anyi? Yèyè ùvwa Ditalala kùdì ewu yònsò ùvwa ulwa kùdìYe bwa Ditalala awu. Nwamonu anyi? Ditalala pa buloba, meeji malenga kùdì bantu, Yèyè

ùwwa Ditalala ku ntwadijilu wa cidimu cipyacipya aci, dituku dipyadiyya dya Nzambi. Bwa cinyi? Yèyè ùwwa Bukênkè bushindika bwa dituku adi. Nwamonu anyi?

²⁵⁴ Kadi kùdi Dîyi dyàbùngì kabidi dya kushindika. Bìdi bikèngela bwa Yèyè kushindika Dîyi dikwabo dyàbùngì. Nenku pààshindikiibwà Dîyi dya ndekeelu, dimane kushindikiibwa's, eyo, dîbà adi lufu neluminyiibwe mu bucimunyi, ne bafwe mu Kilisto nebabiike, Bukalenge bwa bidimu cinunu nebubange, ne nekwikalè Ditalala dinene dimwepele, Shalom. Twikalàayi ne mwoyi bwa diine dituku adi, mwaneetu wa balume, mwaneetu wa bakaji, bwa Shalom umwepele munene awu.

²⁵⁵ Vùlukàayi ne, Bible ki mpokolo mwine wa lungenyi lwònsò, ne ngudi mulame ditekemena dyònsò dya matuku àcìvwavwà. Kùdi Ekeleeziya, Shalom! Tùsambilàayi.

²⁵⁶ Kasumbu kakese kàdì apa aka mpindyewu. Nyewu—nyewu ngènjì mèbà abidi majima pa—pa Dìyiisha dikese edi dya cidimu cipyacipya. Nudi bashàale ne lutuulu lwàbùngì be. Kùdikù muntu mwaba ewu mu dinda emu, anyi—anyi mu mapingaja emu's we, udi kàyi ne Shalom, Ditalala dyàkùlù adi, Dîyi dya Nzambi dimanyishiibwe adi pawàlu wèwè ne Dîyi cintu cimwe apa anyi? Dîbà didì, pàdì Bible wàmba Cintu kampanda, wèwè wamba ne “to, ncyènàku mwa kwitabuuja anu bipeepele nunku ne aci ncyà bushuwa to,” dîbà adi kwèna ne Shalom to. Kwèna mu ditalala ne Nzambi to, bwalu Dîyi Dyèndè ndyadi dyàmba Cintu kampanda pèèbè ubèngangana naaDi.

²⁵⁷ Kadi byòbì ne Dîyi didì dyàmba ne: “Shalom, Ditalala,” ne wèwè pèèbè mwikàle ne diine Ditalala adi, ne Dîyi dyònsò didì Nzambi wàmba, wèwè udi mwa kucitwa “amen,” ne kuDitabuuja. Ne paudi uDimona dishindikiibwe, udi wamba ne: “Amen, ki Dîyi ndyòdì adi!” Kadi twitabàayi kampanda, bukênkè, bukênkè kampanda bwa dishima, maalu a pa buloba àdìfindamu mu mundidimbi wa bukênkè bùdi buleejùbwe bwa kucivwija mîdimà abu, twitabàayi kampanda, bwa kwamba ne: “To, ndi—ndi ngeela meeji ne—ne Aci cìvwa mbwà cintu kampanda cikwabo. Kacyena cìswa kwamba menemene aci to,” kadi pààbì Dîyi diCyàmba? Wèwè udi ulonda mundidimbi awu, anyi udi umweneka pamwe ne Bukênkè abu?

²⁵⁸ Mwaba ewu ne mu mukaba wa mèyi, ewu yònsò wàjinga kuciteeleja awu, ànjì èlanganèpu meeji katanci kakese cyanààna. Ne kwòkò kampanda mwikàlepù mwaba ewu udi muswe, udi kàyi ne Bukênkè abu, udikù mwa kwela cyanza cyebe muulu bwa kudimanyisha wèwè mwine ne, udi mudilongolole bwa kwendela mu Bukênkè abu leelu ewu anyi? Ne kwòkò kwikàle kampanda mu ditunga mwamwa mu mwaba waya mukaba wa mèyi ewu, ne wèwè kùyi naaCi to, swaku wéle cyanza cyebe muulu kùdi Nzambi anu mene mwaba. . . Kànga cisanji cyebe cya dikwata naaci mikaba ya mèyi aci bwa

katanci kakese cyanààrà patudi tusambila apa, twaku binù, wàmbe ne: “Mukalenge Nzambi, ndi mwele mpatà, ndi—ndi mwenze *cikampanda*. Ndi mudyàmbidile ne: ‘Ee, bu mùvwà ekeleeziya mwambe ne bintu abi kî mbifwànyine kwikala nanku to, ne *cikansanga* kî ncifwànyine kwikala nanku to.’ Nenku, kadi nyewu mmona ne ncilayiibwe mu Bible, ne ndi mmona bintu bipitepite bûngì. Nansha mene mauu mmaCileeeje patooke, ôwò miine. Ne bintu bìdi byambiibwe ebi, s’mbyebi byènzeka anu mu byòbi menemene. Ne Nzambi mu Dyulu nyewu wàmba patooke cintu cimwecimwe aci. Pa nanku, ndi muswe kucyakidila mpindyewu. Enzaku bwa Dìyì dya Nzambi dibwele munda mwànyì. Ne enzaku bwa mèmè mbwele mu mwadi mulondangane awu, wa kubenga kuteeleja bìdi ekeleeziya anyi muyiishi wàmba abi; kadi enzaku bwa mèmè mbwele mu mwadi mulondangane wa Dìyì awu, bwa mmone cidìDi dyàmba aci. Ne enzaku bwa Dintwadile, mu Dinwàngana dinene dya mijiki dya Nzambi edi, dituuta dya diswa Dyèndè mu nsòmbelu wanyì.”

²⁵⁹ Taatù wetu wa mu Dyulu, nyewu mpindyewu tuKutwadila cyaanza cyònsò cidì cyela muulu mu myaba yònsò. Nenku enzaku bwa Nyuma Mwîmpè wa Nzambi abatwadile mwadi mulondangane wa Dìyì ne Bulelela bwàDi ne, bìdi bikèngela bwa kufwimbiibwabo mpindyewu bàvwijiibwè bàrà bàà balume ne bàà bakaji bàà Nzambi, ne bìdi bikèngela bwa kwikalabo dileeja dya Bukènkè bwa Nzambi pa buloba. Bìdi bikèngela bwa kwikalabo Dìyì dimwènèshiiibwe, bwa kukengelabi bwa balume ne bakaji biikalè ne nsòmbelu wa bwena uwwa nendè Yesu awu, ne bwa—bwa kwitabuujabo Dìyì dyònsò dya Nzambi ne kwikalabo ne mwoyi ku Dyòdì bu mwàkenzàYe Yèyè amu, bwalu Yèyè wakamba ne: “Muntu kààkwikala ne mwoyi anu ku dyàmpà nkààyaadi to, kadi ku Dìyì dyònsò didì dipàtukà mukana mwa Nzambi.” Kaciyi anu ndambu mukese wa Mèyi, citupa cya Mèyi to, kadi “ku Dìyì dyònsò didì dipàtukà mukana mwa Nzambi.”

²⁶⁰ Dìyì dya cikondo cya Mòsà kadyakakumbana mu matuku a cikondo cya Yesu to. Mudimu. . .Dìyì dya mu matuku a bapostolo, kadyena dikumbana mu edi dituku to. N’Dìyì dilaya bwa edi dituku. Bàakamba bòbò biine, ne bàakacyàkula ku Nyuma Mwîmpè, bàmba cìvwà mwa kwenzeka mu matuku a ndekeelu, mùvwà maekeleeziya mwa kwikala ne mitu mikole, midibandishi, mùvwà mukaji wa masandi awu mwa kujuuka ne mùvwà bandumba mwa kwikala anu nendè mene, ne mùvwà. . .mùvwàbo mwa kufiikisha buloba fitutu. Ne cikondo cya ndekeelu cya ekeleeziya, cya Laodikiya aci, Yesu ùvwà mwa kwikala anu menemene muumushiibwe mu ekeleeziya.

²⁶¹ Éyi Mukalenge, enzaku bwa mèmè nshaale Nendè Yèyè, Dìyì. Ne mweneshaku Bukènkè Bwèndè, munda mwetu bònsò, patùdì tubanga cidimu cipyacipyà eci apa, ne dipangadika. Katuyi bamanye cidì cidimu cipyacipyà eci citulamane to, kadi

tudi twètù anu batungunuke ne kuMukwata Yèyè, Dìyì, udi mumanye Dinwàngana dyònsò nkòòng dya mijiki kuumukila ku ntwadijilu too ne ku ndekeelu awu. Yèyè ngudi mumanye nkwaka yònsò ne ntwangeenu yònsò. Nenku, Mukalenge, tudi baMutangidile anu Yèyè, kacya twatangija mèsù anu kùdìYe Yèyè, Dìyì. Dìbà adi patùdì tumona bintu ebi bimweneka, tudi tumanya ne tudi menemene anu mu mwadi mulondangane wa Dìyì. Enzaku nanku. Sungilaku musuuka wònsò wùdì mujimine, Mukalenge, wùdì kaaba aka, ne wònsò wùdì ùtèèlejà mukaba wa mèyì awu. Tudi tubalambula Kùdì, bwa bwalu bwa Bukalenge Bwebe, mu Dìnà dya Yesu Kilisto. Amen.

²⁶² Mpindyewu, kùdì . . . Ndi ne disanka dya kwikalaku neenu bònsò mu dinda emu. Pa nanku, ndi mfuma anu menemene ku diikala, kacya anu ncibanga, mèbà abidi bulubulu, kubangila pa tusunsa dikumi ne tutaanu kumpala kwa dìbà dikumi ne umwe, too ne ku tusunsa dikumi ne tutaanu kumpala kwa dìbà umwe. Nkààvwa mwambile Meda, mwambe ne: “Nèngiikalè mwalukile patwamba kufika dìbà umwe ne tusunsa makumi asatu.” Mpindyewu, twètù katùtu twitabuuja bya dishipa dya mikenji ya mbilu ya dinyeemesha dya mashinyi abi to. Ncyènà ngiitabuuja ne bìvwa bìkèngela bwa twikalè twenza nanku to, nudi numona’s, kucyenza. Mpindyewu tudi tunusakidila. Ndi muswe kwamba mpindyewu . . .

²⁶³ Terry wimànyìkì cisanji cyèndè cya dikwata naaci mikaba ya mèyì, bwalu awu ki mukaba mwine wùdì wùpàtukà. Ngeela meeji ne *nwènù* kaayi nucìdì anu ne byenu bicìkàlè bìkwàtà, bìdì anu bilenga, nwamonu’s, bwalu nèngiikalè ne cya kwakula ne ekeleeziya.

²⁶⁴ Neya bushuwa ne ndi nnwanyisha nwènù bònsò kaaba aka. Nenku kùtu misangu yàbùngì yìntù ngeela meeji ne eci cidi ndambu bu dipengama bwànyì mèmè, bwa kwikala kulwa apa mu ndekeelu mwa cipeela emu, mùndì mpabiikila. Kwalukidila mu cipeela emu, lwà mu ndekeelu menemene emu, ne nkenzakanaku eku ne eku, mmona kasumbu kakese aka mwinsi mwa mici emu, kumpenga menemene kwa musulu. Kabidi tudi mpindyewu tusanganyibwa ku luseke lwa ku esete lwa musulu’s. Nenku ndi—ndi—ndi mutwishiibwe ne Nzambi neanubeneshe, muntu ne muntu. Nzambi, Shalom, ikalèku neenu. Ki ditalala Dyèndè ndyòdì adi.

²⁶⁵ Kadi ndi nnulombaku luse, lwàbùngì, bwa mungànùlami mushindu ewu, kadi anu bwa kupetaku mukaba wa mèyì wa cyòcì eci mpindyewu. Nenku, bu Mukalenge mwa kwanyisha, pa cyòcì eci mpàngiikalà mwa kwakula, ku—ku Phoenix, mu mapingaja a mu dyalumingu. Pashiishe, mu dimwe, nèngiikalè mwa kwenza, tuumasangisha tukese, twa tutupa, ne bikwabo. Ndi mupangadike munda mwa mwoyi wànyì bwa cidimu eci, bu Mukalenge mwa kwanyisha . . . ndi—ndi anu wa bakokangana nendè’s, ku nseke ne ku nseke. Nwamonu anyì?

²⁶⁶ Kadi's tudi anu bamanye twètù bônso ne ki dimanyishiibwa ndyôdi adi. Tudi bamanye cidi Nkokelu Mwisâtù. Twètù bônso, twètù bônso tudi bumvwe aci. Mpindyewu, nwâpecì, nenupete mukaba wa mèyi awu. Nwamonu anyi? Nenku ndi ngeela meeji ne neikalè anu mwanji kushààla kàyi wènta cintu to bwa ntanta mukese, too ne paalwa dîbà dinene dya dikengeshiibwa adi. Ki piikalàye mwa kwenzeka. Neakule. Neamweneshiibwe anu menemene bu bimanyinu bitaanu abi kàyi ùpangilakù to, mu bupwangane bwônso. Kadi mpindyewu ndi ngeela meeji ne, ikalaayi anu bindile, nwamonu's, bwa kumona cikaadiye mwenze. Mpindyewu ndi nganji kwalukila, bya mwomumwe cyakabidi, mu mishindu yônso, bwa kujandula.

²⁶⁷ Tuumasangisha twa tutùpà, ki tûngiikalà mwa kuteeta kwenza, mpatuka diloolo ne diloolo dyônso, kumpala kwa dîbà. Kwangata anu bu mùdi tusunsa makumi asatu nanku awu, ne kwakula pa cintu kampanda bu mùdi dyondopa dya kùdi Nzambi anyi cintu kampanda cya mushindu awu. Ne dîbà kanà dyônso dîngiikalà mpilongolole bwa kwenza cyakabidi mukaba wa mèyi, anyi nênyeemenè kuneeku lwà mu ndekeelu mwa cipeela emu, anyi ku tabernacle kwaka anyi mwaba kampanda wutùdi mwa kwenzela mukaba wa mèyi, wutùdi mwa kwikala anu twètù pa twètù, pândiku mwa kwamba bìndi muswe kwamba abi, mushindu awu. Kadi, nwamonu's, Yesu . . .

²⁶⁸ Nwavulukaaayi. Nwamonu anyi? Bikèngela ngiikalè ntangila. Pâmmwènè bantu abu biikalè anu ne madyambi pa madyambi, bààsa lwendu bàya, ngeela meeji ne ngaateeci kucyamba mu dinda emu. Mmîdima ya mupimbu pa bôbò's. Kabeena pààbò ne cikwabo cya dyezabo to. Mêmè ndi mbafwila luse, nwamonu's, bwa dibenga kuteeleja adi. Ne pààbò bamònèmònè bintu bikaadi Nzambi mwenze, kadi kabeena anu bàtèeleja to. Ndi mêmè mutùngùnùke anu ne kusambila ne: "Nzambi, wabâfwilakù luse." Ne ndi ncyamba bifumina munda mwa mwoyi wànyi. Ncyèna ncyamba ne bwalu Mfùm wànyi mmucyàmbè to, kadi ndi muswe kuumvwa munda mwa mwoyi wànyi, dyambedi ne, ndi ncyàmbilamù.

²⁶⁹ Ncitu nditola ne bantu to. Ncitu muswe kwenza nanku to. Nwamonu anyi? Bwalu ndi—ndi. . . Ndi ne Mukenji bwàbò bôbò, "lupandu." Bikèngela ngiikalè mpatuka nya munkaci mwabo. Nwamonu anyi? Mpindyewu, ntu mpetangana ne ba-Trinitariens, ne ba-Méthodistes, ba-Baptistes, ba-Luthériens, beena Mpenta, ba-Adventistes du Septième Jour, ne bakwabo bônso. Bwalu, ndi munkaci mwa kwenda kukeba bwa kusungila bàvwà bajimine, mêmè ne mushindu; bwa kulwa kuCibweja, bwa kubaleeja Bukênkè. Nenku Mukalenge ikalè neenu.

²⁷⁰ Ngâkenzela kasumbu keetu—keetu kakese kàà kumpala kàà masangisha kaaba aka. Ncyèna mumanye ní nutu nuènta, anyi kanutu nuènta, ndongamu awu kaaba aka. Bu bamwe bàà kunùdi nwènù aku mwa . . . Nèmmushiye kaaba aka. Mpaasata

neanubadileyi, mwaba wutwikalà ne cya kudisangishila, ne bu Mukalenge mwa kwanyisha. Mbwena kwamba ne, bu Mukalenge mwa kwanyisha. Ncyèna ne bulombodi nansha bumwe bwàwò wòwò to, ndi anu mpatuka pàànyì nanku awu, bwa kuteeta kwenza cyònsò cingùikalà pàànyì mwa kwenza aci. Nenku nwènù mwa kwikala ne bananga beenu mu nyungulukilu amu, mwômò amu, biikàlè bàjinga kulwa mu dimwe dya ku masangisha awu, mona's, nubafundile mukanda bwa kubambila bwa kulwabo mu dimwe dya ku masangisha awu.

²⁷¹ Nzambi anubeneshe. Mbilenga be bu mûngănùmònkù emu, Mwaneetu wa balume Stricker ne Mwaneetu wa bakaji Striker, ne nwènù bakwabo bònsò aba. Mpindyewu, bamwe bàà kùdibo, ncyèna nansha mumanye mènà enu to. Kadi ndi—ndi munumanye ku bujaadiki bwa Nyuma Mwimpè, bwa ne nudi bàna beetu bàà balume ne bàà bakaji. Nenku—nenku dinanga dyànyì ne kaneemu bidi bwa bwalu bwenu. Kabidi bidi byenza disanka dinene, bwa kwikala neenu kaaba aka.

²⁷² Ne ndi mumanye munùvwà—munùvwà balongolole didya dyenu dya mundaamuunya muneemu, nuya bwa kuya kadya didya dikese dya bwobumwe. Mvwaku mwa kujinga ne kwikalaku mushindu bwa mèmè mufwànyine kunengakana apa's. Ne—ne ndi mumanye ne ndidya dîmpè. Ndi—ndi mumanye ne nudi ne biipiki bàà batambe bwîmpè bàà mu ditunga edi. Ndi mumanye ne aci ncyà bushuwa. Kadi pàmwàpa ne bikengele bwa mèmè kudya dyànyì dya dyâmpà dipaya minyiinyi adi, mu njila. Kadi, nansha bishi, ndi ne bipungidi bìdì bikèngelà mèmè kuuja. Cyànyì cikondo cidi anu cyabanya, ndambu *apa* ne ndambu *pààpa*. Nwènù bònsò nudi bumvwe, ndi mutwishiiabwe. Kì mbwena kwamba ne mbwalu ncyèna muswe kushààla to. Nzambi mmumanye aci. Bwa cyanààna ncivwa mwa kwikala mulwe kaaba aka . . . Nwamonu anyi?

²⁷³ Muntu kampanda ùvwa wàmba ne: “Udi muswe kuya kuntu kwaka bwa kayiisha bantu makumi asatu, paùdì mufwànyine kuyiisha cintu cimwecimwe aci kùdì bantu binunu dikumi anyi?” Cya bushuwa's. Aci kaciyena ne cìdici cishintulula to, bwine búngì bwa bantu abu. Mèmè cìndì muswe nkumona mwaba udibo baCyakidila.

²⁷⁴ “Kanwedi masanga enu panshi kumpala kwa ngulube to. Neyikudimuke kadi kuàdyatakaja mwinshi mwa makàsà enu, pashiishe kunukùdimukila kadi kunusunsulula.” Nwamonu anyi? Kadi kanwediku masanga enu panshi apu to.

²⁷⁵ Nenku ndi ngumvwa ne, cìndì ngamba apa eci, kì nkwele kwa masanga panshi kumpala kwa ngulube to. Ndi ngeela meeji ne, nkuleeja kwa bàna mabwe a mushinga mukole, àdì abo bôbò awu. Nwamonu anyi? Nwamonu anyi? Mabwe a mushinga mukole àtu àsanganyiibwa penyì mîngà misangu? Mu bitoci ne mu manyaanu.

²⁷⁶ Kaçya nukaadiku bamone mbata, mwaba udiye ufumina anyi? Upàtukila buludi mwinshi mwa ciinà cya bitoci cya dijiba. Ne ùdi ùkwàta mudimu mukole, muunya ne bufuku, bwa kupatukilaye ku bukênkè. Kadi udi anu ufikila ku bukênkè anyi, ùdi wèla bilôngò, ne ùshààla cilôngò cya citambe bulenga cya nî mpenyi nî mpenyi. Ki cidi mbata ncyôci aci. Ùdi ùbànda ùfùmina mu manyaanu a mu buloba, ne mu bukooya.

²⁷⁷ Ki mwômò amu mùdì mabwe a mushinga mukole àsanganyibwa, mabwikilamù mwab'ewu mu province wa ngòlò ewu wa mu ditunga. Nudi nusangana ngòlò penyi? Mwinshi mu manyaanu. Nudi nusangana mabwe a rubis ne mabwe a mushinga mukole penyi? Mu bitoci bya manyaanu. Ncya bushuwa menemene. Ki mutùdi twètù bônso aba tufumina, mu bitoci ne manyaanu a pa buloba. Kadi aba bàdi apa aba . . .

²⁷⁸ Mémè ntu mwenji wa bukebikébi. Mwenji wa bukebikébi ùtu wènda cinyi? Ùtu wènda ùkèbangana ne ngòlò. Pashiishe, pàdiye ùmupeta, ùdi ùmwengeleja. Nenku ùdi ùmutuuta, ne umwengulula, ne umulongolola.

²⁷⁹ Ewu ki mine wa Ngòlò. Nwamonu anyi? Ndi nkeba mwônso *emu*, dîbà dyônso, nkeba mabwe a mushinga mukole. Nwamonu anyi? Ndi ngapeta mwômò emu, mwaba kampanda mu lupwishi, kadi ngapela pambidi, ngamba ne: “Mukalenge, ki bôbò aba. Ki mwaneetu wa balume nyêyè ewu. Ki mwena Kilisto mulediibwe cyakabidi nyêyè ewu. Ki inâbânzà mutekete mulenga, nyêyè ewu. Mukaji mulenga mushindame, mukaji mukulakaji, ekelekele, nsongaakaji, nyêyè ewu,” cyônso cidiku aci. “Ki bôbò aba, Mukalenge. Badi mabwe Ebe a mushinga mukole. Ùàsè ku cifulu Cyebe cya butumbi, Mukalenge. Nebiikalè bàbàlakana kashidi ne kashidi, mushindu awu.”

Too ne pângàànùmònà, Shalom. Ditalala dya Nzambi diikalè neenu!

²⁸⁰ Eyo, mpaasata, lwâku kuneeku. Eyo. Nzambi anubeneshe bwa mpindyewu. Nenku nènnumònè bwônso bwenu pashiishe ndambu.



SHALOM LUA64-0112

(Shalom)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matùkù 12 a ngondo wa kumpàla, cidimu cya 1964, mu Disangisha dya mu Nzùbu mu Sierra Vista, Arizona, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org